



कॉशुर रामायन



सरवानन्द कौल प्रेमी

कॉशुर रामायन - सरवानन्द कौल प्रेमी - देवनागरी कश्मीरी रूफ : म.क.रैना



**अमर शहीद सरवानन्द कौल प्रेमी
(१९२४ - १९९०)**

काँशुर रामायन

(साँरी हकूक छि राजिन्दर प्रेमी सुंदि नावु रँछरिथ)

किताबि हुंद नाव	...	काँशुर रामायन
मुस्सनिफ	...	अमर शहीद सर्वानन्द कौल प्रेमी
पब्लिशर	...	राजेंदर प्रेमी, ई-१७२, सरिता विहार, नई दिल्ली
मोल	...	५००/-
प्रेस	...	
किताब मेलनुक पताह	...	राजेंदर प्रेमी, ई-१७२, सरिता विहार, नई दिल्ली ११००७६
		रविंद्र रवि, १३/४९४, लोधी कालोनी, नई दिल्ली ११०००३
		किताब घर, कनाल रोड, जोम मौलाना आज़ाद रोड, श्रीनगर
देवनागरी-काँशुर रूफ		म.क.रैना, मुम्बई

काँशुर रामायन - सरवानन्द कौल प्रेमी - देवनागरी कश्मीरी रूफ : म.क.रैना

व्यस्तार

अख	ग्वडुन्युक बोग	बाल कांड	ल्वकुचार
ज़	दोयिम बोग	अयोध्या कांड	अयोध्यायि मंज़
त्रै	त्रैयिम बोग	अरन्या कांड	वनवास
चोर	चूरिम बोग	किशकंधा कांड	किशकंधायि मंज़
पाँछ	पुंछिम बोग	सुंदर कांड	स्वंदर वार्ता
शे	शैयिम बोग	लंका कांड	लंका वेज़े
सत	सँतिम बोग	उत्तर कांड	वनवासु पतु अयोध्यायि फ़ीरिथ युन
ऑठ	अुठिम बोग	उत्तर रामायन	राम कथायि हुंज़ पँतिम हन



ॐ

पनुनि अर्ध-शरीर उमायि
येमि
सीतायि हुंघ पॉठ्य
कॉत्यह वनवास चॉल्य
तु
कॉशिरि माजि जेवि लोल बरन वाल्यन
हुंदि नावु
श्रधायि, प्रेम, लोलु तु पानुन्यारु सान



द्वयनुवन - कति क्याह

जु शब्द	सरवानन्द कौल प्रेमी	१०
म्योन्य व्यनथ	राजिंदर प्रेमी	१५
ग्वरस त्वती		१६

ग्वडुन्यक बोग - बाल कांड ल्वकचार

१.	आरम्भ	२०
२.	अश्वमेध जग	२३
३.	राम जन्म	२६
४.	वेद्या प्राप्ती	२८
५.	वेशामेत्रुन संकल्प	३०
६.	वेशामेत्रस सुत्य राम लक्ष्मण	३३
७.	कथा अहलियायि हुंज	३५
८.	सीतायि तु राम चंद्ररुन ग्वडुन्युक मिलन	३८
९.	सीता स्वयंवर	४३

दोयिम बोग - अयोध्या कांड - अयोध्या वार्ता

१.	राजु तेलकुच तैयौरी	४९
२.	मंथरा नाटुक	५१
३.	परिवर्तन	५५

४.	रामु सुंद वनवास नेरुन	६१
५.	दशरथ राजुन प्रान त्याग	६७
६.	आदर्श संतान	६९
७.	भरत जीयुन श्री राम फीरिथ अनुनि नेरनुक संज	७६
८.	भरत जीयुन नेरुन	७८
९.	श्री राम ब्रोंठ पकान	८५

त्रेयिम बोग - अरन्य कांड - वनवास वार्ता

१.	वनवास वार्ता	९०
२.	श्रूपनखा कथा	९२
३.	सीता हरन	९४
४.	श्री रामु संद्य व्यदाख तु छांडव सीतायि हुंद	९७
५.	सीतायि हुंद पय लबुन	१००

चूरिम बोग - किश्कंधा कांड - किश्कंधायि मंज

१.	पम्पासरोवर वातुन	१०४
२.	स्वग्रीव सोजान हनूमानस सीतायि छांडुनि	१०६

पाँचिम बोग - सुंदर कांड - स्वंदर वार्ता

१.	हनूमान द्राव सीता छांडुनि	१०९
२.	हनूमान लंकायि मंज	१११
३.	अशोक वाटिकायि अंदर	११२
४.	हनूमान सीता सम्वाद	११४

५.	लंका दहन	११५
६.	हनूमानु सुंद लंकायि नेरुन	११७

शेयिम बोग - लंका कांड - लंका वेजे

१.	रावुनुनि द्रोक्	१२०
२.	रामु चँदरुन सुम सोथ	१२४
३.	रावुनुन्य छल	१२५
४.	रामु सुंद व्यलाफ	१२८
५.	दुबारु य्वद्ध	१३२
६.	सीतायि हुंज अग्नी परीक्षा	१३४
७.	वनवास म्वकल्योव	१३७

सँतिम बोग - उत्तर कांड - अयोध्यायि वातुन

१.	भरत जीयुन प्रारुवुन रोजुन	१४०
२.	श्री राम वोत अयोध्यायि	१४४
३.	श्री रामु सुंद राजु त्यलख	१४८

ऑँठिम बोग - उत्तर रामायन - पँतिम हन

१.	सीता वनवास	१५२
२.	वाल्मीक आश्रम	१५४
३.	अश्वमेध जग	१५६
४.	लव तु क्वश राजु दारस मंज	१५९
५.	सीतायि अनान यज्ञस प्यठ	१६१
६.	सीतायि हुंज दँरथी मंगुन्य जाय	१६२

कॉशुर रामायन - सरवानन्द कौल प्रेमी - देवनागारी कश्मीरी रूफ : म.क.रैना

७.	महा प्रस्थान	१६४
८.	म्यौन्य त्वता	१६५
९.	समाप्ती	१६६



जु शब्द

मे छि मॉज ल्वकृटिसुय त्रॉविथ गॉमुच। अमि किन्य वुछ नु मे पनुनि माजि हुंद लोल, प्यार, टाठिन्यार तु रछुन कैह ति ल्वकृचारस अंदर, ख्वदुवय बु डेग्यजल गरस अंदरुय रछनु आस। तारायि, ख्वसु मे बिजॉती पेचेन्य ऑस, लोग मे मॉजुय क्याजि बु ओसुस तॅम्यसुय कुन मॉंगिथ आमुत थवन। मीलि कलमु कडुन तु दॅह्यमि जमॉच तान्य वातुनावुनस अंदर छु तारायि हुंदुय दखुल रूदमुत। ख्वदुवय स्व यिकुवटु गरस अंदर मे लोल बरिहे नु, मॉलिख लागिहे नु, बु आसुहॉ ऑठ्यमि जमॉच पतय वुनि ति कृष्ण सुंदी पॉठ्य गॉव गुपन रछान तु ग्रीस्यतिल करान रूदमुत। यि ति ओस दयि सुंद यछुन।

पनुन पिताजी ओस मे स्यठाह रछान, लोल बरान, टाठिन्यार करान। तोति यि सु करुन यछान ओस, ति ह्योकुन नु वॅरिथ। क्याजि सु ओस गरस अंदर ज़नानि रोस। सु ओस वनान जि यिकुवटु गरस अंदर छि ज़नानु आसान मर्दु सुंज वकीलु दरबार। तु येलि नु वॅकीलु दरबारुय ओस अति, वारया फॉसलु ऑस्य पेठ्य गछान तु पिता जीयिन्य राय या मशवर् रद गछान। खॉर, यि छि ज़ीठ वार्ता। वारयाहव कारुनव किन्य वोत पिता जीयस ति तु मे ति वारयाहि रॅग्य कष्ट, युस बु ति तु पिता जी ति छ्वपु दम वॅरिथ च़ालान रूद्य। ब्याख कारन ओस जि पिताजी ओस गरस अंदर धर्मस कर्मस कुन लॅंगिथ, युथ ज़न जि सु ओस अख थोद महात्मा, थोद साधू माननु यिवान। मुसलमान ऑस्य तॅमिस थोद दरवेश मानान। सु ओस धार्मिक ग्रंथ, गीता, महाभारत, रामायन बेत्रि वारुया मज़हबी प्वस्तक राथ दूह परान तु नेत्य पूजा पाठ करान। सु ओस अख स्यध पोरुश अख। गरि मा मानुहॉनस नु महात्माँयी, दरवेशी कैह, अमि किन्य ओस गृहस्तस अंदर रूजिथ च़ोक मोदुर छ्वपु दम वॅरिथ च़ालान। अॅमिस निश

ऑस्य दूरि प्यठु साधू, महात्मा, दरवेश बेत्रि यिवान रोज्ञान। खॉर, पिता जीनि अमि माहोलुक प्यव मे प्यठ गरु मंजु स्यठाह असर तु बु ति रूदुस अँथ्य वति पिताजीयस पतु पतु पकान, तु रँट मे ति यिहॉय वथ। यिहोय वँहरि ऑठोवुहि आसुहॉव बु जि मे रँट्य पनुनिसुय पिताजी सुंद्य पाद तु बनोवुम पनुन गुरुदेव। यि छि मे पनुनिस गुरुदीव सुंजुंय कृपा, दया, अथुरोट, ऑही, ऑशीर्वाद तु लोल तु प्यार जि बु बन्योस अथ योग्य तु ह्योकुस श्रीमद भगवद्गीतायि पतु रामायनुक यि कॉशुर रूफ त्वहि ब्रॉह कनि वातुनॉविथ।

मँज्य छम यि कथ वनुन्य बासान जानुय जि बु किथु पॉठ्य लोगुस रामायनस कुन धनु पनु। सनु दूयितॉजी तेयितॉजी ओस। बु ओसुस पोम्परु खँदुर भंडारस अंदर नोकरी करान। मे ओस तिमनुय दूहन हँदी परुन ह्योछमुत। दँह्यमु जमॉच तानी ओस मे उर्दू तु अंग्रीज्य पोरमुत। खँदुर भंडारस थोवुख हँदी लेखुन तु परुन ज़ोरूरी। तु मे ति ह्योत बडि शोक सान हँदी लेखुन परुन तु भगवद्गीतायि सुत्य सुत्य ह्योत मे रामायनुक पाठ ति करुन। मे अननुव गीता प्रेस गोरखपोर प्यठु गोस्वामी तुलसीदासु सुंद बृज भाषायि मंज वोनमुत रामायन। सतुतॉजी वँरी गछनु पतु ति छु यि रामायन म्यानि लाईब्रॅरी मंज मूजूद। पज़र छु यी जि मे तोग नु ग्वडु ग्वडु यि रामायन परनुय। पतु वॉच कथ ओत जि येमिस नु हँदी परुन लेखुन तगनुय ओस, सुय ह्योक वँरीयि वादव पतु हँदीयस अंदर मास्टर्स डिग्री हॉसिल वँरिथ। यि ति ओस दयि सुंदुय यछुन। तु येलि अमि ब्रॉह मे प्रभाकर परीक्षायि अंदर रामायनुक बाल कांड (दोयिम कांड) ति ओस परुन, मे गन्यव रामायनुक राग। अमि पतु पॅर्य मे वारयाह रामायन। हँदी, अंग्रीज्य तु उर्दूहस अंदर। तु यिथु पॉठ्य गॅयि मे राम कथा वारयाहस हदस ताम गतार्थ। तु वॉच कथ यि कॉशुर रामायन काव्यस अंदर लेखुनस प्यठ।

रामायनुच कथा छि आदि कवि महर्षी वाल्मीकी जीयन ग्वडु संस्कृत भाषायि मंज वँन्यमुच। तमि पतु छु गोस्वामी तुलसीदास कॉशुर रामायन - सरवानन्द कौल प्रेमी - देवनागारी कश्मीरी रूफ : म.क.रैना

महाराजु सुंद बृज भाषायि अंदर रामायन ल्यूखमुत अज्ज गरु गरु परनु
 यिवान तु सॉरिसुय जगुतस अंदर अथ लोल यिवान बरनु।
 कॉशिरि ज़बॉन्य अंदर छु पँडित प्रकाशराम कुर्यगॉमी सुंद रामायन ति
 छँपिथ द्रामुत। अमि वरॉय ति छि बेयि ति कैह कॉशिर्य कवी
 ऑस्यमुत्य यिमव ज़न राम कथा कॉशिरिस नज़ुमस अंदर वॅन्यमुच
 छि। तिमु कथायि छेनु न्यबर द्रामचु तु अँथ्य रज़ि मंज़ व्वन्य म्यॉन्य
 यि लोलु हँच तु श्रधायि पूर्न कॉम कॉशुर रामायन रूपस अंदर त्वहि
 ब्रॉह कनि। टाठ्यन राम बँख्यन तु कॉशिरि ज़बॉन्य पोज़ लोल बरन
 वाल्यन खस्या यि म्यॉन्य अरज़थ टारि, ति हेकिव
 तोह्य परन वॉल्य तु कँहवॅट लागन वॉल्य वॅनिथ। खॉर, बु वनु यी जि यि
 ति ऑस म्यॉनिस ग्वरुदीवु संज़ुय यछा।

यि राम कथा कॉशिरिस काव्यस अंदर लेखनु विज़ि छि मे
 कैह कथु नज़रि तल थविमचु।

अखः मे छु तुलसी कृत रामायन आधार बनॉविथ पनुन कॉशुर
 रामायन ल्यूखमुत, ख्वदुवय बेयि ति वारयाहन प्वस्तकन
 हुंद ति छु सहारु न्यूमुत।

ज़ुः मे छि कूशिश वॅरमुच जि भाषा गछि सहल, मोदुर,
 मीठ तु रॅसिल बनून्य।

त्रेः कॉशिरिस अंदर छे अख परंपरा रूज़मुच जि महाभारत,
 रामायन या भागवतस तर्जमु करनु विज़ि छि तर्जमुकारव
 पदि पथ पदि लीलायि लेछिमचु। येमि सुत्य तिमन धार्मिक
 प्वस्तकन हुंद बाडवुय योत छुनु बड्योमुत, कथायन
 हुंद बहाव ति छु अमि सुत्य रोटु गछान रूदमुत। मे छि
 यि लीलायि लेखनुच प्रथा चॅटमुच। मे बास्योव यि अख जान
 कदम।

- चोरः अवु, 'ग्वरस तोती' तु 'अख आदर्श संतान' य्वसु अख हुर वार्ता छि, छे मे राम कथायि हना न्यबर ऑसिथ ति रामायनस अंदर थँव्यमुत्य, य्वदुवय यिम छेनु लीलायि।
- पांछः शब्दावली अंदर बासन म्यान्यन केंचन टाठ्यन कॉशुर परन वाल्यन संस्कृत, तत्भव या तत्सम शब्द ति। यिम छिनु जॉनिथ मॉनिथ वरतावनु आमुत्य। रामायन हिविस अँकिस धार्मिक ग्रंथस अंदर यिथ्य शब्द वरतावनु छु स्वता स्यधुय। क्याज़ि यि कथा ति छि अँकिस ब्योन नँहजि प्यठ आदनु प्यठय वननु आमुच, तु अँकिस खास माहोलस सुत्य वाठ थँविथ।
- शेः मे छि कथा सेदि स्योद दशरथ राजुनि प्यठय आरम्भ वँरमुच। अमि ब्रूठिम वार्ता, पार्वती शिव सम्वाद, प्राचीन रेश्यन मुनीयन हुंघ सम्वाद तु पँत्यम्यन य्वगन मंज रामु सुंदि औतार बननुचि वार्तायि थवि नु मे जॉनिथ मॉनिथ यथ राम कथायि सुत्य।
- सथः म्यॉन्य कूशिश रोज़ि यिहॉय जि यि कथा गछि अँज्यकिस कॉशिरिस साहित्यस अंदर ति रुच जाय रटुन्य। अमि किन्य कँह कँह वार्तायि अदबी त्रकरि खॉरिथ वरुनन करिमचु तु तिमन शॉयिरानु रंग द्युतमुत। तु कँह वार्तायि पकृवनिस तँरीकस प्यठ वनिमचु। कँह घटनायि व्यस्तारु सान व्यछुनाविमचु, तु कँह छोटिस हमंजुय पकृनाविमचु। यि म्योन कदम क्युथ बासि, ति छु टाठ्यन परन वाल्यन तान्य।
- ऑठः तुलसी रामायनस छि राम कथायि सतय कांड। ऑठिम बोग याने उत्तर रामायन छु मे यथ राम कथायि मंज हुरोवमुत, येमि वरॉय यि राम कथा रोज़िहे अडु लेच।

खदुवय यथ म्यानि अरज्जथ मंज्ज कैह खॉमी बासि, तमि बापथ छुस बु
परन वाल्यन व्यनुती करान जि तिम दिन मे पनुन्य रुच तु पॅज्ज राय,
युथ ब्रॉठ कुन फुट नेरि।

सरवानन्द कौल प्रेमी

बसंत पाँचिम, ३१ जनवरी १९९०, ब्वधवार
प्रेम आश्रम, सोफ शाली, अनंत नाग, कश्मीर



म्यॉन्य व्यनथ

वार ओस ग्वरवार, तौरीख ओस २७, र्यथ ओस जनवरी तु सन् ओस १९९० तु दूहचि लगबग आसुहन त्रे बजेमचु जि म्यॉन्य पिताजी आयि अनंतनागु प्यठु अँकिस मीटिंगु मंज शरकथ वॅरिथ तु वॉत्य पनुन गरु यथ नाव ओस 'प्रेम आश्रम'। रछाह आराम करनु पतु ह्योत तिमव कॉशिरिस मंज मंजूम रामायन लेखुन शुरू करुन। हालांकि यि समशय ओस तिमन सन् १९४२-४३ हस मंजुय वोथमुत येलि तिमव मुख्तलिफ भाषायन मंज रामायनुक अध्ययन करुन ओस ह्योतमुत।

यि ओस सु वॅरी येलि हालात बुथ्य फिर्य गछुन्य ऑसिन हेत्यमुत्य तु इनसान ओस अँदुरय बिहुन मुनॉसिब ज्ञानान। खॉर, पिता जीयस ओस भगवान श्री रामु संज कृपा तु अनुग्रह, जि यिमव त्रोव कम खोतु कम वख्तस मंज रामायनस कॉशुर वरदन नॉल्य।

मे छे आशा जि परन वॉल्य प्रावन येमि कॉशिरि रामायनुक पाठ वॅरिथ पोशिवुन आनंद। ज़बान छे शौज तु मोदुर। ख्वशनुमा कॉफियु तु प्रयिवुन्य रँदीफ छि मिसरन अख ताज़ुगी तु मेछर बख्तान। अथ मंज छु सु अख साजुत युस मनस अब्दी स्कून दिवान छु। तु हरगाह पाठकन यि टारि खसि, तमि खोतु बोड उपहार क्याह आसि म्यानि बापथ।

राजिंदर प्रेमी

भॉदुर शुक्ल पक्ष द्वय, बोमवार

ई-१७२, सरिता विहार, नई दिल्ली ७६

३० अगस्त २०११.

फोन: ०११-२९९४१११६



कॉशुर रामायन - सरवानन्द कौल प्रेमी - देवनागारी कश्मीरी रुफ : म.क.रैना

ग्वरस तोती

ग्वडुन्य छुम ना करुन ग्वरसुय नमस्कार
 ग्वरुय छुम मोल ज़गुतस प्रान आधार
 ग्वरुय सोरुय ग्वरुय छुम सौर्यसुय मंज़
 ग्वरु सुंद नाव ह्यथ छुस बो करान संज़
 ग्वरुय ज़गुतस अंदर छुम प्रान म्योनुय
 ग्वरुय हृदयस अंदर छुम ध्यान म्योनुय
 ग्वरुय हावान छु अंधकारस अंदर वथ
 ग्वरुय ज़गुतस अंदर मनुशस छु बँड सत
 ग्वरुय यस आसि सुत्यन ज़ेनि संसार
 ग्वरुय नय आसि प्यतुरन्य छस प्यवान खार
 गुरु सुंद येम्य अमा ज़ोन महिमा
 तँमिस येति कुनि रंगय अदु कांह वँमी छा
 गुरु यस सुत्य मनि कामन सफल तस
 गुरु सुंद नाव बडि खोतु बोड छु बल तस
 गुरु ब्रह्मा गुरु विष्णु च्चु ज़ानुन
 गुरु साक्षात महेश्वर पानु मानुन
 गुरु माता गुरु पिता छु पँज्य पॉठ्य
 गुरु बांधव मेथुर सॉरी वंदस टॉठ्य
 ग्वडुन्य ग्वरुदीवसुय पूज़ा करुन्य जान
 दिवान सुय तार प्रथ कारस पज़र मान
 छु युस न्यर्बल तँमिस ग्वर बल दिवान छुय
 दयस निश पानु ग्वरुदीव तस निवान छुय

छु हावान बोज़ दयि वथ पानु ग्वरदीव
 लबान छुय थान दयि सुंद पानु अदु जीव
 ग्वरुय नय आसि मनुश्यस कांह हसर छा
 मनुश्य ऑसिथ तँमिस अदु ज़ांह हसर छा
 गुरु येम्य लोब तँमी लोब ज़न्मुकुय सार
 गुरु यस आव अथि तँम्य ज़्यून संसार
 ग्वरस अदु युस न्यमान न्यथ आसि पँज्य पॉठ्य
 वंदान तस च़रनु कमलन सासु बँद्य टॉठ्य
 गुरु संज़ यस कृपा सुय भाग्यवाना
 गुरु संज़ सेज़ नज़र सुय राज़ दाना
 ग्वरस सीवा स्वमनु अदु येम्य सना वँकर
 तँमिस अदु नाव पानय भवुसरस तँर
 ग्वरस सीवा छि मनुश्यस व्याध गालान
 गुरु यामथ कलस तस अथु छु डालान
 ग्वरस पनुनिस बु वंदुहॉ पान पनुनुय
 तँमिस च़रनन बु वंदुहॉ पान पनुनुय
 बु दिमहॉ मीठ्य ग्वरसुय च़रनु कमलन
 मे फवलिहे यावुनुक पम्पोश हन हन
 मे पनुनुय मोल ग्वर रखिपाल म्योनुय
 छु गूपीनाथ म्योन, गूपाल म्योनुय
 छु सुफ़ता शालि पोज़ परिवार म्योनुय
 येती गंगा येती हरद्वार म्योनुय
 प्यवान पादन छुसय ग्वरदीवु म्याने
 यिवान छिम तॉर्य मुच़रनु लोलु चाने

अतुर मा आसि य्वदुवय कांह मे कोरमुत
 फिरिथ मा कांह अछुर अदु आसि पोरमुत
 मनस मा आसि लॅजमुच्च ग्राय कुनि ज़ांह
 तु माया ज़ालुसुय कांह त्राय कुनि ज़ांह
 क्षमा वैर्यज्यम मे रॅछिज्यम पादनुय तल
 पनुन अनुग्रह मे वैर्यज्यम सुय मे बोड बल
 मे वैर्यज्यम पानु अथुरोट सातु सातय
 बु योद कुनि पूज करुने चौर्य वातय
 मनस छुम संकल्प दिम लालु वरदान
 कथा श्री रामु संज बो लेखुहॉ जान
 करुम अथुरोट बरुम चुय लेखुनी बल
 सहायुतस यिम चु ग्वरुदीव पानु जल जल
 वनख यी ती बु लेखय म्योन क्याह छुय
 यछुख यी लेखुनावख लेखु बो सुय
 स्यद अस्यद मान तय अवमान चुय छुख
 वेद्या लक्ष्मी तु पजि पोज़ ज्ञान चुय छुख
 मे क्या छुम यंत्रा अख छुस बु चोनुय
 वेद्या चुय मंत्रा अख छुस बु चोनुय
 छुसय ग्वरुदीव आमुत बो शरन च़ेय
 श्रधा तय भाव भक्ती ह्यथ परन च़ेय
 करुम अथुरोट बु लेखय रामु संज कथ
 बरुम बल लेखुनी हावुम सतुच वथ
 बु प्रेमी प्रेम होत अज़ आस लारान
 तु चाने ऑगिन्याये छुस बु प्रारान

गवडुन्युक बोग
बाल कांड (ल्वकृचार)

व्योठ पूठ व्यस्तार :

१.	आरम्भ	२०
२.	अश्वमेध जग	२३
३.	राम जन्म	२६
४.	वेद्या प्राप्ति	२८
५.	विश्वामेत्रुन संकल्प	३०
६.	विश्वामेत्रस सुत्य राम लक्षमन	३३
७.	कथा अहलियायि हुंज	३५
८.	सीतायि तु रामचंद्रुरुनगवडुन्युक मिलन	३८
९.	सीता स्वयंवर	४३



गवडुन्युक बोग बाल कांड ल्वकचार

आरम्भः

स्यठाह पथ कालि येलि त्रेत्या य्वगा ओस
 प्रस्यध ऑस राजसी अख येति स्वखाह ओस
 स्यठाह बॅड राजसी अथ नाव कौशल
 चक्रव्रथ राज् दशरथ ओस शीतल
 अयोध्या राजदौनी अथ ऑस स्वंदर
 नगर ओस त्युथ योहय स्वरुगस बराबर
 बॅसिथ नगरी अयोध्या जान शाये
 वसान सॅर्यो नॅदी निशि लोलु माये
 स्यठाह स्वखु सावुया अति ऑस शाँती
 च्वपॉर्य स्वरगुक्य गछान अति ऑस्य ब्राँती
 छर्यर अति कुनि ति रंगय ओस नाये
 प्रजा न्यशपाप रुज्जिथ लोलु माये
 चक्रव्रथ राज् मशहूर ओस दाना
 दयावान सत प्वरुश तय धर्मवाना
 प्रस्यध त्रेन भवननुय मंज ओस दशरथ
 च्वपॉर्य व्यवहार लोलुक अति सतुय सत
 पराक्रमी तु देवता ओस पानय
 सिर्यि वंशुक यि दशरथ तीजवानय
 करान ऑस्य देवता जयकार राजस
 प्रजा सॉरुय करान सत्कार राजस

ग्वनी सॉर्य अति चर्यत्र वान सॉरी
 तु सॉरी ऑस्य पापरजा च्वपॉरी
 यि दशरथ राजु कोताह ओस बुधिमान
 रुचर तय भागवानी ओस कांछान
 दयन द्युतमुत अँमिस सोरुय पज़र ओस
 व्यवाह त्रेन रॉनीयन सुत्यन बजर ओस
 कोशल्य्या ऑस तस ज़िठ रॉन्य ग्वनुवान
 दोयिम ऑसुस स्वमित्रा जान शूबान
 त्रेयिम य्वसु काँछ कैकयी ओस तास नाव
 यिमन ओस त्रेनवुनी पज़रुक सतुक भाव
 अमा अख शूख राजस ओस चापान
 अँमिस ओस प्राफ सोरुय बस नु संतान
 छे क्याह शूब यस नु अख संतान आसे
 तँमिस सोरुय ति ऑसिथ फान बासे
 छु संतान गाश अँछुनुय, होश क्वठिनुय
 छु येहुलूख बेयि छु परिलूख डोख छु बठिनुय
 अमा यस आसि नय संतान क्याह तस
 ज़न्म तँम्यसुंद सफल क्यथ वनतु क्याह तस
 यिमन त्रेन रॉनियन क्याह शाफ ओसुय
 अमा ज़न्मस यिमन क्याह पाफ ओसुय
 अमा तस राजसुय त्युथ पाफ क्याह ओस
 पोरु ज़न्मुक तिमन अदु शाफ क्याह ओस
 ज़गत सोरुय तँमिस ओस पादुनुय तल
 करान यस देवता ऑस्य पानु म्वरछल

तँमिस संतानु सुंद अभिलाश ओसुय
तँमिस गोलमुत अँछन हुंद गाश ओसुय



अश्वमेध जग

दूहा सपद्यव अमा राजव व्वशा त्रोव
 युथुय ऑनन तँमिस छोट हंग गोमुत होव
 दोपुन ऑखुर बुजर अथ क्याह करव व्वन्य
 यि सॉरुय राजसी यथ क्याह करव व्वन्य
 येम्युक अदु कुस सना बनि वनतु अधकॉर्य
 मे छुम नेरुन तु अथ वन आसि क्याह चॉर्य
 स्वरान गव यी करान गव कम वेखृत्य रूफ
 अमा व्वन्य सिरिं वंशुक छ्यतु गछ्या दूफ
 अमा पँज्य किन्य गछ्या क्वल म्योन नाशस
 सिरिं वंशस युतुय छा आय, वनु कस
 अँथ्य अंदर क्वल गुरु तस अदु च्यतस प्यव
 वशिष्ठ महाराजु सुय मनु किन्य शरन गव
 अमा लीला यि दयि संज गवर त्युथुय आव
 वुछिथ दशरथ तँमिस तस थोद कोरुन भाव
 द्युतुन प्रनाम वशिष्ठस, गुल्य गँडिथ रूद
 द्युतुन आसन गुरुहस छ्वपु वँरिथ रूद
 पृछुस कारन गुरुहन अज कम्युक शूक
 छु अज क्याह राजु ज़न मँशरिथ बिहिथ लूक
 मनस मंज ओस राजस बोवनस हाल
 यि संतानु शूक राजस वोत यँचकाल
 वशिष्ठ जीयन व्वपाय अदु राजसुय वोन
 अश्वमेध जग करुन वोनस त्युथुय नोन

मनोकामन च्चे अमि सुत्य पूर सपदी
 च्चे छुय युस शूक रोटमुत दूर सपदी
 च्चे संतान चोर नैश्चय राज्जु थव पूर
 गछन साँरी च्चे अँदरिम शूक अदु दूर
 तैयॉरी हेच़ करुन्य अदु राज्जु दारन
 अश्चमेध जग करुन साँर्य आयि लारन
 श्रंगी र्योश आव अनुनय हवनु बापथ
 वेदी य्वसु आयि वनुनय हवनु बापथ
 श्रंगी र्योश स्यठाह थोद ज़ानुवुन ओस
 वशिष्ट महाराज येमिस थोद मानुवुन ओस
 वनस मंज़ दूर तपसी र्योश करान ओस
 नगर त्रॉविथ कुनुय ज़ोन ब्रह्म स्वरान ओस
 नँदी सँर्यो वसान येति ऑस न्यरमल
 स्यठाह स्वंदर बँठिस तति ओस श्वध ज़ल
 अँती आव करनु अश्चमेध जग स्यठाह जान
 दिवान आहोथ मुन्य रेश्य साँर्य मंत्रान
 अँग्न प्रज़ल्यव तु ज्यूती खँच़ स्यठाह ह्योर
 अमी मंज़ु द्राव स्वनु सुंद अख कलश दोर
 यि ओस अमृत बँरिथ रेश्य दून अथन रोट
 पतव अदु राज्जुसुय अँम्य पानु द्युत नोट
 दोपुन राज्जस दियिव बाँगुरिथ यि खिर पूर
 यिमन त्रेन राँनियन गछि शूक अदु दूर
 यिमन त्रेनवुन्य ज़्यवन संतान बूज़िव
 गँछिव संत्वशठ सेधी गँयि शांत रूज़िव

यि अमृत पानु राजन रॉनीयन द्युत
यि ओस सोरुय यिमन त्रेन रॉनियन क्युत
न्यसुफ राजन कोशल्यायि द्युत यि अमृत
न्यसुफ दून रॉनियन आव पानु सुय ह्यथ
कोशल्यायि वॅर्य ज़ु बॉग्य पनुनिस नॅवीदस
स्वमित्रायि अख द्युतुन अख ख्योन पानस
तु यिथु पॉठ्य अख च्वबाग ख्यव कोशल्याये
तु कैकी अख, ज़ु बॉग्य वॉत्य स्वमित्राये
समय वोत रुत तु सार्यन टूठ भगवान
तु त्रेनवुन्य रॉनियन म्यूल गर्भ आदान



राम जन्म

खबर गॅयि राज्सी अंदर च्वपारी
 यि बूज्जिथ गॅयि प्रजा हरुशस ति साँरी
 स्यठाह गव राज् दशरथ पानु हरुशस
 सिर्यि वंशुक सिर्यि व्वन्य पूर प्रज्जल्यस
 योतामथ जग छु रूज्जिथ, रोज्जि अदु नाव
 सिर्यि वंशुक तोतामथ प्रज्जलि सत भाव
 च्चिथुर र्यथ ज्जून पछ करकट लग्न जान
 नवम आँस त्यथ तु ब्वधवार आँस प्रज्जलान
 च्वपॉर्य आँस्य पोश, कोसम पूर फोल्मत्य
 शोगुन बद आँस्य यिम तिम आँस्य च्चॅल्मत्य
 तु अँथ्य समयस अंदर जाव राम भगवान
 सु आव ज्जन्मस तु सपद्यव पूर कल्यान
 कोरुख अदु दीवताहव पोशि वर्शुन
 अमी विज्जि आयि साँरी करनि दर्शुन
 प्रजा साँर्य करान गॅय हर्शु व्वलास
 च्वपॉर्य साँरी च्चॅसिथ आमत्य गिंदान रास
 दयन अज्ज पानु नोव औतार दोरुन
 सिर्यि वंशस दुबारय नाव खोरुन
 कोशल्यायि राम तय कैकी भरत जाव
 स्वमित्रायि जायि लक्षमन, शत्रुगन नाव
 स्यठाह हर्शस यि दशरथ राज्ज अदु गव
 बुज्ज्यर आँसिथ ति बुथि तस यावुना प्यव

काँशुर रामायन - सरवानन्द कौल प्रेमी - देवनागारी कश्मीरी रुफ : म.क.रैना

वुछिथ च्वन फवलुवन्यन पम्पोशि दूर्यन
लोबुन ज़न सारि ज़न्मुक फल यि हन हन
यिथय पॉठ्य कोशल्यायि बेयि स्वमित्रा
तु कैकी सान त्रेनवन्य आयि शूभा



वेद्या प्राप्ती

लक्षन रामस तिथी ऑस्य ओस भगवान
 स्यठाह स्वंदर तु ग्वनुवान पानु नारान
 सु ओस औतार आमृत भूमि प्यठ योर
 करुन्य तस रॉछ धर्मस धर्मकुय ज़ोर
 सतुक सत्कार रामुन राज हावुन
 करुन व्वधार, गालुन पानु रावुन
 दूहन मंज़ गॅयि खसान, मेनान अख अख
 अँछन ब्रॉह कनि बडान गॅयि सॉर्य बालख
 यिहुंद ल्वकचार कूताह लूबुन ओस
 पकुन, बोलुन, गिंदुन क्याह शूबुन ओस
 यिमन वुछ वुछ लबान शाँती बराबर
 यि दशरथ राज़, माताये सरासर
 शु वुहुर्य बालख यिथुय वॉत्य लोल बोरुहख
 यिमन नॉल्य योनि त्रोवुख प्यार कोरुहख
 वेद्या प्रापथ करुनि आश्रम सोज़नु आय
 वशिष्ट मुनीयन तिमन बोर लोल तय माय
 अँती वेद्या परान गॅय रेश्य कुटी मंज़
 तु सुत्य सुत्य कला हैछिनुक कोरुख संज़
 स्यठाह कीरथ यिमव प्रॉव सॉरिसुय मंज़
 महर्षी करनि लोग यिम सोज़नुक संज़
 दूहा सपद्यव वशिष्ट जी आव पानय
 तु यिम बालख अँनिन गरु लोल सानय

वुछिथ यिम राजु दशरथ ख्वश स्यठाह गव
तु सीती पानु ग्वरुदीवस परन प्यव
यिथय पॉठ्य चोर बालक स्वख बरान गॅय
तु लूकन राश तय आशा हुरान गॅय



वेश्मामेत्रुन संकल्प

दूहा अख राजु दशरथ चाव दरबार
 बिहिथ सॉरी ऑस्य मंत्री, स्वरगुकुय द्वार
 गुरु वशिष्ट यिमन मंज ओस शूबान
 तिथुय युथ तारुकन मंज जून ज़ोतान
 वनुनि लोग राजु पानय सारिनय कथ
 मनस मंज संकल्प छुम बूज्यतव सत
 हेतिन व्वन्य वॉसि वातुन्य राजु कुमार
 मनस कांख्या मे छम दिमुहा बु तथ तार
 दपान छुस व्वन्य यिमन व्यवहुक समय आव
 खबर पानस मे क्या छुम कर करुन वाव
 बु वुछुहा पानु पोत्रन हुंद व्यवाहकार
 अदय लगीहेम मे पोज़ येमि भवुसरय तार
 यि बूज़िथ सॉर्य दरबॉर्य ख्वश स्यठाह गॅय
 'तथा अस्तु' यिमव कोर ज़न लॅबुख ज़य
 यिमव कोर सारिवुय जयकार राज़स
 स्यठाह आदर कौरुख सत्कार राज़स
 च्वपॉर्य गव पॉदु ज़न अख हर्शु व्वलास
 तु दरबारस अंदर ओस स्वरगुकुय बास
 तिथय गॅयि क्रख नेबुर्य किन्य आव कुस ताम
 यि ओस विश्मामेत्र आमुत करान राम
 वॅथिथ गव राजु पानय ब्रॉठ तस द्राव
 कौरुन स्वागत महर्षीयस अंदर चाव

स्यटाह आदर कौरुस जयकार राजन
 द्युतुन आसन तँमिस सत्कार राजन
 पृछुस राजन यिनुक वँन्यतव प्रयोजन
 महर्षी छिवु स्यटाह थँद्य ख्वश मे गव मन
 वँनिव क्याह छुम करुन आज्ञा तुहुंज क्या
 वँनिव अभिप्राय क्याह तथ तौर कैह छा
 शब्द युस तुहुंदि म्वखु मंजु नेरि करु ती
 थँविव नेश्वय ब्रु छुस सेवक तुहुंद अख
 वँनिव आँखुर करुन क्याह छुम छु शूभ वख
 यि बूजिथ राजु सुंद अदु र्योश वनान गव
 कथव सुत्यन सु राजस लयि अनान गव
 पतव वोनूनस मे छुम श्री राम न्युन सुत्य
 मे छिम राक्षस अनान सेथ राजु तिम कुत्य
 छु बस अख राम चोनुय युस कर्यख नाश
 सुभाहो बेयि छु मारीच अनि तिमन गाश
 यिहोय छुम राजु बूजिव अख प्रयोजन
 कँरिव व्वन्य पूर वॉनी म्योन फवलि मन
 अमा बूजिथ यि राजस होश जन डोल
 ह्योकुन नय कैह वँनिथ अदु राजु गव कोल
 पतव लाकन सिरिं वंशुक ह्यसस आव
 तु राजस जन त्युथुय यकबार जुव चाव
 अँनिन अदु राम लक्ष्मन बाँय लालय
 कँरिन दृशुवय रेशिस अदु तिम हवालय
 अमा ख्वश कूत अदु वैश्वामेत्र गव

तु दशरथ राजु तस पादन परन प्यव



वेशामेत्रस सुत्य राम लक्ष्मन

महर्शी द्राव यामथ बालुकन सुत्य
 यिमन द्वन बालुकन सुत्य तीर कमान कुत्य
 स्यठाह स्वंदर तु शूबान तीज़ प्रावान
 वतन अँद्य पँख्य प्रकरती पूर छावान
 यिमव सँर्यो नँदी निशि राथ गुज़रॉव
 पकान ब्रॉह गँयि यिमव शख्ती पनुन्य बॉव
 छंडान गँय वन तु कोह यिम ब्रॉठ कुन द्राय
 येत्यन कांह आश्रम ड्युदुक तोतन चाय
 पृछान गँयि प्रश्न कौत्याह राम लक्ष्मन
 यिमन सोरुय वनान गव र्योश ति सत ज़न
 पकान ब्रॉह कुन दिवान थख कुनि करान वास
 स्वंदर जायन हुंदुय बोज़ान यितिहास
 रेशिस प्रुछ रामनुय वँन्यतव यि कथ जान
 यि गंगा किथु सना पॉठ्य योर वातान
 अमिच क्याह वार्ता असि ज़ॉन्य अँन्यतव
 यि किथुपॉठ्य आयि पृथवी प्यठ ति वँन्यतव
 वनान गव र्योश स्यठाह व्यस्तारु सानय
 तु बोवुन सोर यितिहास दानु दानय
 वँरिथ राथा अँती वेश्राम प्रोवुख
 पगाह अदु प्रातुकालस कदम त्रोवुख
 पकान गँय ब्रॉठ बुथि अख आश्रम आव

स्यठाह स्वंदर तु पावन दर्शनी नाव
अमा अति ओस नय कांह अख ति रोजान
वनस मंज रूदमुत क्याहताम बासान
पृष्ठनि लोग राम अमिची वार्ता जान
पतय वैश्वामेत्र गव बोजुनावान



कथा अहलियायि हुंज

स्यठाह पथ कालि गौतम अख र्योशाह ओस
 सु तपसी ज्ञानवाना महर्योशा ओस
 करान तपसी सु येति तति आश्रम ओस
 च्वर्पोर्य अख स्वरगु द्वार अति पोज धर्म ओस
 त्रिया तस अहल्या ऑस भागिवाना
 स्यठाह स्वंदर तु रुपिठ धर्मवाना
 तॅमिस हिश ऑस नु स्वंदर ब्याख कांछा
 च्वर्पोर्य ओस रुफ तॅम्यसुंद अख मिसाला
 स्व ज़न ऑस सिर्यि प्रज़लान ज़ून ज़ोतान
 स्व ज़न ऑस भवुसरस कुन्य अप्सरा जान
 तसुंद अंग ओस अख अख साफ न्यरमल
 तसुंद आकार व्यवहार श्वध तु चंचल
 अकॉय बुतरॉच प्यठ ऑस बस अहल्या
 पती गौतम रेशी टॉठ तस अहल्या
 पवित्र, पतिवृता अख नाव ओसुस
 पती सुंद राथ दूह पोज भाव ओसुस
 करुन्य सीवा दरुन वृत सॉमियस सुत्य
 पछ्यन पूजा, तिमन यिम ओत यिवान कुत्य
 दूहस रातस ब्यहन अथ दारुसुय मंज
 पज़िच सीवा, पज़्युक भावा यिहोय संज
 च्वर्पोर्य शोहरत असुंज ऑस तीच स्वंदर
 ति बूज़िथ कोल अमा गव राज़ इंद्र

तँमिस मन गव क्वट्चल व्यच्चार व्वपुद्योस
 द्वहस रातस यिहोय अख भाव तस ओस
 दपान ओस कर वुछन अहल्या बरस लोल
 रटन येलि सुत्य पानस अदु चलयम लोल
 द्वहा सपद्यव तु इंद्र राथ क्युत द्राव
 बेशूंक्य पॉठ्य चूरि पॉठ्यन आश्रम आव
 मुनी गौतम स्यठाह सुलि यारबल ओस
 अहल्या अति कुनी , वॉतिथ अंदर प्योस
 तु लोगुन रुफ अति गौतम रेशी सुंद
 अहल्यायि ज़ोन युन पनुनिस पती सुंद
 पती ओस श्रान ध्यानस मंज़ नॅदी प्यठ
 क्वट्चल मन ह्यथ इंद्र आमुत बॅदी प्यठ
 मुनी सुंद रुफ इंद्रन दोरमुत ओस
 अहल्यायि भास तामत गौतमु सुंद गोस
 अमा यामथ मुनी आव, आश्रम चाव
 वुछुन इंद्राज़ अँत्यनुय तस क्वट्चल भाव
 यि ज़ोनुन याम द्वश्वय पापुलद यिम
 छि पॅज्यपॉठ्य म्यानि द्रश्टी शापु लद यिम
 द्युतुन शाफ पानु इंद्राज़स कोरुन शोर
 च़े व्वन्य सहवास नॉरी हुंद नु येति योर
 दोयिम शाफ अदु अहल्याये द्युतुन बोज़
 च़ु बन शिला तु येतिनुय वॅन्य बॅनिथ रोज़
 यपॉर्य येलि वाति श्री राम पानु कुनि द्वह
 च़रन तँम्यसुंद च़े लगुनय अदु लबख छोह

लबख बेयि अदु स्वंदर त्रुयि रुफ यकबार
अहल्या बेयि बनख अदु बो करय प्यार
वॅनिथ गौतम रेशी अति द्राव गव दूर
यि आश्रम पानु त्यूगुन गव अत्यन सूर
तनय प्यठु आश्रम वॉरान सपद्यव
च्वपॉर्य अदु सॉर्यसुय अति फान सपद्यव
वेश्चामेत्रन कथा श्री रामसुय वॅन्य
अंदर चाव राम अति तॅम्य पानु वुछ वॅन्य
अमा यामथ चरन श्री रामु संद्य पेय
शिला गयि गॉब अहल्या थोद वॅथिथ गॅय
यपॉर्य गौतम रेशी आव ओत दुबारय
वॅरुन अहल्या स्वीकार वारु कारय
अमा येति आश्रम ज़न प्रोन नोन द्राव
हर्श व्वलास च्वपॉर्य बेयि लोग चलेजाव
वॅरिथ लीला यि श्री राम ब्रॉठ कुन द्राव
पकान गॅय ब्रॉठ अदु मिथिला नगर आव



सीतायि तु रामु चंद्ररुन गवडन्युक म्युल

युथुय नगरस अंदर वॉत्य राम लक्ष्मन
 स्यठाह हर्शस वुछिथ गॉय बॉय सत ज़न
 महर्षीयन च्वपॉर्य अदु दृश्टिया त्रॉव
 यिमन दून राज़ पोट्रन तॅम्य नॅगर हॉव
 वोनून पतु रामु चंद्रस पोश छॉविव
 च्चु निन सुतुय पानु लक्ष्मन कुनि मु रॉविव
 गॅछिव मंदुरस अंदर पूजा वॅरिव जान
 मनोरथ स्यध करान मॉज पूर कल्यान
 गॅछिव व्वन्य पोश लॉगिव भावु माये
 सफलता त्वहि छि प्रारान जायि जाये
 यि बूज़िथ राम लक्ष्मन द्रायि दृश्वय
 महर्षी यस कोरुख प्रनाम स्वय ज़य
 युथुय यिम बॉय दृश्वय ब्रॉह हना द्राय
 वुछिख अति वाटिका स्वंदर स्यठाह जाय
 वुछिख साक्षात ज़गत अम्बा नचान ज़न
 च्वपॉर्य स्वंदर यि अति प्रज़लान हन हन
 अमा ज़न ऑस्य प्रज़लान सिरिं सासा
 पॅज्य पॉठ्य ओस अति ज़न स्वर्गवासा
 यि दृश्य वुछ वुछ स्यठाह गव राम हर्शस
 फुलय ऑस कोसमन बेवायि बरजस
 वुछान अँद्य पॅख्य दिवान वॅन्य कोसुमन राम
 अँकिस अख पोश स्वंदर नेत्र अभिराम

युथुय पथ कुन नज़र त्रॉव रामु चँद्वन
 वुछ्यन कन्यायि वाराह शामु स्वंदुरन
 स्यठाह स्वंदर स्यठाह रीपठ ग्वनुवान
 यिवान पूजायि मंदुरस आसु लारान
 अमा ज़न आसु आमचु अप्सराये
 यिमय आकाशि वछमचु लोलु माये
 यिमन ओस सारिनय खसुवुन यि यौवन
 यिमन कोमल शरीर प्रज़लान हन हन
 अमा ऑस्य मीन्य मीन्य यिम पूर्य त्रावान
 च्वपॉर्य ऑद पोख यिमय ज़न मुश्कुनावान
 स्वगंधी ऑस फॉलान दूर तेलान
 तु सॉरुय वाटिका यकबार शोलान
 यिहुंद मस वावु सुत्यन ग्रायि मारान
 अँछन तुलत्राव क्याहताम आसु छारान
 यिमन सुत्य ऑस अख बाला स्यठाह प्रैन्य
 यिमन मंज़ ऑस कुन्य नँन्य बस स्व अख ज़ँन्य
 स्व ऑस स्वंदर स्यठाह स्वंदर स्यठाह जान
 स्व ऑस ज़न ज़ून आकाशस करान मान
 यिमन ऑस सारिनय मंज़ तीच स्वंदर
 स्व ज़न ऑस क्रेक प्रज़लान वाजि अंदर
 शँरीर कोमल तु अंग अंग नारु ब्रेयि ज़न
 वुछिथ तस दीवुताहन लछ ब्रमान मन
 नेथुर पम्पोश, म्वख प्रोन, सिरिं प्रकाश
 च्वपॉर्य ऑस्य छायि हँल्य तामथ रटान गाश

तसुंद श्रंगार हेरि ब्वन तीज़ प्रावान
 नपान आँस्य ज़ून तारख तस करान मान
 अँछन तुलत्राव तँम्यसुंद जोद ज़न ओस
 तसुंज़ दृश्टी तिथय फटुनस यिवान बोस
 दँछिन्य खोवुर्य युथुय अमि अख नज़र त्रॉव
 मनुच कांक्षा यि ज़न तमि कोसुमन बाँव
 यिथुय दृश्टी अँनिन फीरिथ वुछुन क्या
 अँती तस ब्रॉह पहान कुमार जोराह
 स्यठाह स्वंदर स्यठाह अख लूबुवन्य जूर्य
 अमा कमि बागु मंज़ु आमृत्य फोलिथ टूर्य
 यपॉर्य बालक हुपॉर्य ज़न देवता यिम
 यपॉर्य सादय हुपॉर्य थँद्य आत्मा यिम
 यिमन दून बालुकन ज़न राज़ लक्षन
 यपॉर्य कमि रायि आमृत्य क्याह प्रयोज़न
 यिमन दून मंज़ छु बोड अख पूर औतार
 यि मा आमुत छु असुरन करनि सम्हार
 यि पूर्न ज़न छु औतार पानु भगवान
 लक्षन अँम्यसुंद्य पँज्य पॉठ्य राज़ संतान
 अमा दय बोज़ि ना म्योन ज़ारु पारय
 मनोरथ म्योन गछि ना स्यध दुबारय
 मुदय गँड युथ ज़नक पुत्री अँमिस कुन
 पनुन्य स्वध ब्वध मँटुस अदु लँज तँमिस कुन
 खबर आँसा अँमिस कैह राम मा छुम
 यि मा दैवी मिलन छुम शाम मा छुम

वुछिथ सीता यि रामस रूज़िथुय गॅय
 मुदय गँड ताम रामन मन ज़ु गॅय लय
 सखी सीतायि सुत्य यिम लोलु माये
 तिमन गव आश्वर योर कोर आये
 तिमव यामथ यि ज़ोन सीतायि गव क्याह
 तॅमिस लॅग्य करनि ठठु यिम लोलु वाराह
 गोछुय पॅज्य पॉठ्य आसुन यिहोय सॉमी
 यि जूर्य ऑस शूब्वन्य ज़न राम रॉमी
 यि बूज़िथ अँदरु सीतायि लरि फिरुन लोग
 स्यठाह हर्शस गॅछिथ लोयुन अँकिस दोग
 बेयिस कुन कलु फिरुन अख ज़ीर दिचुनस
 सँखी ऑस ब्याख अख तस चुमुट हेचुनस
 यिथय पॉठ्य तमि अँदुर्य किन्य पूज भगवान
 नेबुर्य किन्य रूज़ सँखियन सुत्य मंदुछान
 गँडिन गुल्य अँदरु मनु किन्य तस दयस जान
 मे करतम पूर मनि कामन दयावान
 हुपॉर्य नारद मुनीश्वर आव आकॉश्य
 वुछिन सीता लॅगिथ अति ज़न तु वलुवॉश्य
 त्युथुय आकाशु वॉनी गॅयि अमा ज़न
 चु बोज़ सीते सफल गछि चॉन्य कामन
 कनन सीतायि गॅयि आकाशु वॉनी
 तु आयस लबनु अँथ्य मंज़ भागवॉनी
 पतव लाकन स्व मंदुरस याम चाये
 तॅमिस सुत्यन सँखी अँद्य पॅख्य ति आये

परन पेयि पानु सीता माजि दीवी
 छे ख्वसु त्रिपुरा तु वरदौनी भवौनी
 मनोरथ म्योन कर मॉजी सफल चुय
 छसय आमच ख्वरन पेमुच परन बुय
 हर्श सीतायि गव अँदुरी त्युथुय बस
 हेचुन फोरुन्य यि खोवर अँछ अत्यन तस
 वँरुन आराधना सीतायि माजे
 वजुनि लँग्य सुत्य तस अति ज़न तु बाजे
 त्वता लँज करनि माजे भावनाये
 सफल कर व्वन्य चु म्याने कामनाये
 चु मॉजी आद तय अंत, सार चुय छख
 तु म्याने कर्मु नावे तार चुय छख
 'तथा अस्तु' यि बूज़िथ मंदरु नीरिथ
 पतय अदु राजुदारस आयि फीरिथ



सीता स्वयंमवर

विश्वामेत्रस यि श्री राम सुत्य लक्ष्मन
 तु वॉत्य मिथिलापुरी यिम सॉर्य सत ज़न
 स्यठाह ऑस शूबिदार नगरी वनव क्याह
 च्वपॉर्य सीता स्वयमवरुची यि रचुना
 स्यठाह ब्रह्मन, पंडित अति कुत्य व्यदवान
 यगुन्य करुनस लॅगिथ यिम ऑस्य मंत्रान
 चलान ओस वीद पाठ मंथुर ग्रज़ान ऑस्य
 च्ववापॉर्य कम स्वगंधी क्याह दज़ान ऑस्य
 त्युथुय बूज़ राज़ ज़नुकन राम आमुत
 तॅमिस सुत्यन महर्षी नगर च़ामुत
 अँनिन सत्कार कोरुनख, लोल बोरुनख
 निमंत्रन पानु द्युतुनख साल कोरुनख
 धनुश जग वुछनुकुय अबिलाश ओसुख
 विश्वामित्रय यिमन बोड राश ओसुक
 धनुश बोड नाव यथ पीनाक ओसुय
 धनुश शिव सुंद सु हॉबतनाक ओसुय
 करुन सीता स्वयंवर राज़ ज़नुकस
 धनुश जग वुछनुकुय अबिलाश ज़गुतस
 स्यठाह ऑस्य राज़ कौत्याह ओर आमुत्य
 तिमन सुत्य राज़कुमार नगर च़ामुत्य
 दपान सॉरी वरोन अँस्य पानु कन्या
 तुलोन अँस्य थोद धनुश ज़ेनोन सीता

कॉशुर रामायन - सरवानन्द कौल प्रेमी - देवनागारी कश्मीरी रुफ : म.क.रैना

स्यठाह बलवान स्वंदर ओर आमृत्य
 मनन मंज संकल्प ह्यथ ऑस्य द्रामृत्य
 अकिस अख थोद स्वंदर बलवान कुमार
 अकोय संकल्प तिमन सौर्य ऑस्य तैयार
 क्वमॉरी राजु संज तीचाह स्वंदर ऑस
 स्व ऑस साक्षात दीवी क्याह ज़बर ऑस
 तॅमिस म्वख माजि दीवी शूरमुत ज़न
 तॅमिस अंग अंग स्वंदर क्याह पूरमुत ज़न
 स्यठाह ग्वनुवान ब्धिमान ऑस सीता
 स्यठाह रीपठ प्रज़लान ऑस सीता
 च्वपॉर्य ज़गतस अंदर ओस शोहरु तॅम्यसुंद
 लक्षन तॅम्यसुंद स्यठाह ओस अँहरु तॅम्यसुंद
 यिहॉय सीता, यिहॉय स्वंदर, यिहॉय कूर
 यि ज़न ऑस सिर्यि आकाश ज़ोतुवन्य पूर
 तुलिथ युस हेकि धनुश सुय ज़ेनि सीता
 स्वयंवर शर्त यी, कुस मेनि सीता
 अमा यामथ स्वयंवर गव यि आरम्भ
 व्वथान अख अख दिवान फीरिथ करान दब
 स्यठाह वॅथ्य राजु काँत्याह वीर कुमार
 अमा काँसि ति ह्योक नय धनशुकुय बार
 नु गॅयि कांह हरकथाह धनुशस नु लॅज ग्राय
 स्यठाह गॅय लूख हॉरान हे यि क्याह छाय
 स्यठाह क्रकनाद वोथ हे व्वन्य करुन क्याह

अनहॅरिशय रोज़ि सीता व्वन्य सोरुन क्याह
 परेशान गव ज़नक राज़ा दिवान गथ
 अमा पॅज्य पॉठ्य छुना वीरा, यि किछ कथ
 छुना धिकार राज़न योर आमृत्य
 अमा कम राज़ कूमार गरि छि द्रामृत्य
 यि छा पृथवी गॉमुच़ क्या वीरु रोस्तुय
 तु छा धरती गॉमुच़ बलवीरु रोस्तुय
 शब्द बूज़िथ यि लक्ष्मन आव जोशस
 दिचुन अख क्रख मंडप आव सोर होशस
 यपॉर्य सीता व्वदुन्य जयमाल ह्यथ ऑस
 तॅमिस अँद्य अँद्य सँखी वाराह श्रॅपिथ ऑस
 करान अँदुरी दयस ऑस ज़ारुपारा
 दपान ऑस नेरि ना कांछा कूमारा
 अमा छा यूत म्यॉनिस कर्मसुय वर
 छुना अख वीर ऑखुर भूमि अंदर
 व्वथिथ गव शांत घम्बीर पानु भगवान
 इशारा अख कोरुन खोरुन धनुश जान
 तुलुन थोद पानु तामथ टास कोरुनस
 तु कॅर्यनस टुकरु जोराह फास कोरुनस
 अमा श्री रामु सुंद वीरुथ वुछिथ सॉर्य
 च्वपॉर्य जय नाद ग्रज़ वोथ गॅय रुहिथ सॉर्य
 हर्श सीतायि गव कूताह वनव क्याह
 पुनिम हुंज़ ज़ून प्रज़लान द्रायि सीता
 तुलिन पॅद्य वारु वारय ब्रॉठ कुन आय

येत्यन श्री राम तोतन जयमाल ह्यथ द्राय
 तुजिन वरमाल त्राँवन नॉल्य रामस
 वुछुन म्वख ज़ोतुवन यँचकाल रामस
 तिथय पॉठ्य क्याह स्वयंवर गव स्वफल अज़
 तु सीता राम द्दशवन्य गव यि म्युल अज़
 दबादब सूज़ ज़नुकन दशुरथस दूत
 समाचार वोत राजस गव हर्श कूत
 दूयव तरुफव तैयॉरी खांदरुच गॅय
 तु अँद्य पॅख्य सारिवुय राजव ति लोब पय
 लगुन गव वारुकारय सारिनुय मान
 कन्या दान राज़ ज़नुकन कोर स्यठाह जान
 तुजिन सीता ग्वडुन्य रामस पुशुरनय
 दौयिम जूर्य उर्मिला लक्ष्मन लॅबुख ज़य
 श्रुती कीरत तु मांडवी कोरि द्दशिवय
 अँमिस यिमु बॉय सुंज़ कोरि आसु द्दनुवय
 दिचुन अख कूर भरुतस लॅगुन कोरुनस
 दौयिन शत्रूगनस पोज़ लोल बोरुनस
 अमा कैह दूह गॅछिथ अति द्राव दशरथ
 न्वशन च्वन ह्यथ अयोध्या आव दशरथ
 अवधपूरी स्यठाह गव हर्शु व्वलास
 च्वपॉर्य ओस राज़सी मंज़ स्वरगुकुय भास
 स्यठाह आनंद तु स्वख बूगान सॉरी
 पज़िच स्वख सावया, वनुवुन च्वपॉरी
 यिथय पॉठ्य राज़ दशरथ रानि त्रेनुवय

पोथुर चोर बेयि तिमन त्रुयि सुत्य च्वनुवय
हर्श व्वलास अति ओस स्वख तु कल्यान
नचान ओस राज़सी मंज़ पानु भगवान



यिथुपॉठ्य वोट
सरानंद प्रेमी सुंद वोनमुत कॉशरि रामायनुक
बाल कांड याने ल्वकचार अंद।



दोयिम बोग

अयोध्या कंड / अयोध्या वार्ता

व्योठ पूठ व्यस्तार

राज्जु त्यलकुच तैयॉरी	४९
मंथुरा नाटक	५१
परिवर्तन	५५
रामु सुंद वनवास नेरुन	६१
दशरथ राज्जुन प्रान त्याग	६७
आदर्श संतान 'हॉर वार्ता'	६९
भरत जीयुन श्री राम फीरिथ अनुनि नेरनुक संज	७६
भरत जीयुन नेरुन	७८
श्री राम ब्रॉठ कुन पकान	८५
पतीवृथ धर्म व्वपदीश	८६



दोयिम बोग
अयोध्या कांड / अयोध्या वार्ता

राज् तुलुकुच तैयौरी

दूहा सपद्यव, वुछान ओस ऑनु दशरथ
छँत्योमुत हंग वुछुन अकि पौर्य तामथ
स्यठाह तस शोक सपद्यव गव व्यचारस
पँतिम दूह वॉत्य पँज्यपॉठ्यन बहारस
सँनिथ गव अँथ्य खयालस व्वन्य बुजर आव
हरुद वोत व्वन्य जवॉनी हुंद समय द्राव
पज्ज्यम व्वन्य रामु चँद्रय राज् थावुन
छु अँथ्य योग्य, ज्युठ छु, अँम्यसुय बार त्रावुन
अँनिन मंत्री तु सौरी राज् दरबौर्य
रेशी, मुनी, सौर्य सत ज़न, सत प्वरुश सौर्य
यिमन बोवुन पनुन अबिलाश राज़न
तथा अस्तु, यिमव कोर रुत प्रयोज़न
चिथुर मासस अंदर सौंतुक प्यवान पर्व
यिहोय र्यथ राज् अभिशोकुक ति स्यध गव
तैयौरी व्वन्य हेचुन सपदन्य च्ववापोर
ह्योतुन श्री रामु सुंद वातुन सतुक दोर
समय वोत श्वभ रटुन्य गँद्य रामु चँद्रस
निमंत्रन दीवुताहन सुत्य इंद्रस

निमंत्रन सारिनय राजन च्वर्पोर्य द्राव
रुतिस दूहस जगत सौरुय चँसिथ आव
स्यठाह व्वतुसाह स्यठाह व्वलास नगरस
हर्श कोताह छु स्वरुगुक भास नगरस
पगाह ओस रामु चँद्रस राजु तेलख
पगाह बनि राजु, श्री राम अथ नु कांह शख



मंथुरा नाटक

अखाह ऑस मंथुरा, कोब ऑस दौसी
 स्यठाह हॅज वॅज क्वरूप ज़न नर्कवौसी
 क्वट्चल बस कार तय व्यवहार तॅम्यसुंद
 क्वट्चल मन तय क्वट्चल आचार तॅम्यसुंद
 वुछिथ व्वलास मंज़ बाग प्यव तॅमिस गम
 च्वपौर्य ओस हर्श आनंद, क्वबडि मातम
 स्व किथु पॉठ्य सहन करिहे अद् यि व्वलास
 दपान ऑस हाय गछि ना सौरिसुय डास
 त्युथुय गॅयि मंथुरा, कैकी निशे वॉच
 तॅमिस लोगुन कथव सुत्य ज़न गर्युक बॉच
 स्यठाह दौदी दर्दमंद लोगुनस पूर
 दोपुन तस क्याह करान छख गव नेबुर्य सूर
 छु रामस राज़ अभिशेक बोज़ सुबुहन
 तु भरतस छुय बनून तस दास थव कन
 कोशल्य़ा राज माता आसि यामथ
 तु कैकी दौस्य बॅनिथुय रोज़ि तामथ
 यि कूत अन्याय यि कूत गटुकार वनतम
 यि क्युथ गव न्याय यि क्युथ व्यवहार वनतम
 चु व्वथ थोद, गछु चु राज़स वन यि अख कथ
 कडुन वनवास श्री राम छय यिहय वथ
 दपुस दिन्य राज़ गॅद्य भरतस दौयिम कथ
 वनय युथ त्युथ मे वॉतिन पानुसुय सत

कर्योव कैकी स्यटाह गच्छि मंथुरा शांत
 तगिहेस क्वबडायि निशि क्याह त्रॉवनय ब्रांत
 पतव मोनुन वोनुस क्वबडायि तस यी
 गॅछिथ राजस निशन कैकी कोरुन ती
 कुठिस मंज ऑस रॉनी राजसुय निश
 बिहिथ रुज क्रूध रॅटिथुय सिम्हनी हिश
 वोनुस राजन मे वन क्याह दूख च़े अज छुय
 नेबुर्य वोसु द्रोस पगाह राम राजु बनि सुय
 मे वन ऑखुर छे क्याह कथ छुय च़े क्या गम
 बु करु यकबार सम्हार चोन मातम
 मे वन क्याह छुम करुन, करु चानि बापथ
 यि कैह वनुहम परुन परु चानि बापथ
 बु मा ज़रु चोन अख अँश्य फ्योर वनय क्याह
 मे छख टॉठ सारिवुय खोतय अपुज छा
 रघू क्वल रीथ अज तामथ यिहय जान
 वचुन पालुन दूहय योदुवय गछन प्रान
 यिथुय कैकी यि वुछ गव राजु तैयार
 वनस यी बो ति करि अदु राजु यकबार
 त्युथुय पोवुन यि राजस याद प्रोनुय
 ज़ु वर मँग्यमुत्य मे ऑस्य आंकार चोनुय
 वोनुस राजन छे क्या कथ वन चु पोज़ पोज़
 करख बो पूर तिम व्वन्य गम गछी दूर
 वोनुस कैकी चु वनवास राम सोजुन
 भरत रटि राजु गॅद्य बस यी मे बोजुन

यिथुय राजन यि बूज प्यठु बाल प्यव तस
 ब्वधी रॉवुस त्युथुय बदहाल गव तस
 कर्योनस ज़ारुपारा खोर रँटिनस
 लँजिस अँश्य दार प्रानस ज़ोरु खस वस
 दुमट्टस रींज्य गछिना, रॉन्य डलिहेस
 होछिस ज़्यव थर लँजिस गव दशरथस च़स
 नैदुर गँज राज़सुय प्यव पथर सुत्य
 तु ब्रॉह कनि भूतनी ज़न ऑस कैकी
 यिथय पॉठ्य राथ गँयि दूशवुन्य अँदुर्य किन्य
 स्यठाह वोसु द्रोसु व्वलासा बस नेबुर्य किन्य
 सुबुहय यामथ ह्योतुन युन गाश न्युक न्युक
 ह्योतुन वातुन समय त्युथ राज़ु त्यलुकुक
 नेबुर्य ग्रज़ मंथुरन हुंद आसुमानस
 अँदुर्य राज़स प्योमुत ज़न पॉज़ पानस
 अँदुर्य हाँकल बरस येति राज़ु दशरथ
 नेबुर्य खोत सिर्यि ज़ोतान बालुनय पथ
 छि प्रारान सॉर्य रामस, राज़ु श्री राम
 छि प्रारान वाति श्वभ गँर वाति स्वखदाम
 खबर ऑसा नेबुर्य किन्य अँदुर क्याह गव
 अमा अथ पोशि फुलुये डोठ मा प्यव
 खबर मा काँसि ऑसुय क्याह परुन व्वन्य
 दयस अदु वनतु ऑखुर क्याह करुन व्वन्य
 वनव क्याह न्याय क्याह, अन्याय क्याह गव
 वनव क्याह रानि कैकी हाय क्याह गव

सपुदवुन क्याह छु ऑखुर ज़ानि कुस सॉ
पज़र क्याह गव अपुज़ क्याह, मानि कुस सॉ



परिवर्तन

नेबुर्य वोसु द्रोस च्वर्पोर्य हर्श व्वलास
 च्वर्पोर्य अज राजु दारस स्वरगुकुय भास
 करुन व्वन्य रामु चँद्रस राजु अभिशोक
 बनुन व्वन्य रामु चँद्रस राजु विवेक
 च्वर्पोर्य आकाश दँरथी सिर्यि प्रकाश
 गोमुत अंधुकारसुय अति पूर पॉठ्य नाश
 स्यठाह ह्योर सिर्यि खोत दूह योर आमुत
 छुना वुनि राजु दशरथ अँदरु द्रामुत
 छि प्रारान सॉर्य राजस चेर व्वन्य गव
 करान तीज आव जगुतस पानु व्वन्य रव
 यर्पोर्य हवनस दिवान ऑहोत छि ब्रह्मन
 हुर्पोर्य हर्शस अंदर प्रजा ति सत ज़न
 कोशल्य्या बेयि सुमित्रा हर्शसुय मंज
 छु लक्ष्मन पानु श्वभ कारुक करान संज
 दिवान ब्रह्मन छि आलव राजु अँन्यतोन
 समय वोत राजु अभिशोकुक, सतुक सोन
 हेचुन रुच गँर यि वातुन्य रुत यि स्वखदाम
 बनुन वुन्य रामु चँद्रस राजु श्री राम
 यर्पोर्य आव पानु दोरान याम श्री राम
 नँदुरि वोथ कोनु राजा अज वुन्युक ताम
 सु गव ननुवोर दोरान राजसुय निश
 सुली नँदुरे व्वथान ओस राजु दूहदिश

अमा कारन छु क्याह अज़ राज़ वोथ ना
 प्यता अज़ यूत हर्शस मंज़ गोमुत छा
 तँमिस छा यूत पानो स्वख तु आनंद
 मे छा कैह पाफ कोरमुत छुम तम्युक डंड
 तँमिस अज़ ज्युठ पोथुर बनि राज़ अधिकॉर्य
 बरान यस रामसुय छी लोल पोज़ सॉर्य
 छु पानय राज़नुय न्यरुनय यि कोरमुत
 छु पानय राज़नुय ईह लूक सोरमुत
 मे ओसा ज़ांह अम्युक कैह लूभ पानो
 करुन्य सीवा लूकन बँड शूब पानो
 अमा अदु क्याज़ि राज़स च़ेर गोमुत
 तँमिस मा प्रोन अज़ कैह याद प्योमुत
 सु गव दोरान दवान अदु राज़ येति ओस
 कुठिस बर याम मुच़रन राम कति ओस
 वुछुन दशरथ प्योमुत अकि पॉर्य यामथ
 वुछिन कैकी अमा बेयि पॉर्य तामथ
 न कैह ओस होश तय कुनि हाल राज़स
 न कुनि ऑस राज़सी हुंज़ चाल राज़स
 पलव लिथुनॉव्यमुत्य ज़न हाल बे हाल
 कलस मस्तस ति गोमुत ओस ज़न ज़ाल
 कँरिथ छ्वपु दम बिहिथ सँह ज़न बँनिथ शाल
 तु ब्रौह कनि त्रुय अँमिस कैकी महाकाल
 न कथबाथ नय वुठन फिसराय कैह ऑस
 न कुनि लोलुच तिमन दून त्राय कैह ऑस

वुछिन कैकी बॅनिथ ज़न सीमनी अख
 अमा द्युतमुत तमी ज़न रॉयिलस टख
 स्यठाह सपद्योस दूख यामथ वुछुन दृश्य
 वुछिथ गव रामसुय ज़न पानसुय खश
 गॅछिथ हयबुंगु कलेयस ज़्यव रुहिथ गव
 स्यठाह दौरा कोरुन राज़स परन प्यव
 वॅनिव राज़ा यि क्या बदहाल गोमुत
 वॅनिव कारन यि कुस अज़ चूर प्योमुत
 वॅनिव ऑखुर छु क्याह कारन, यि क्याह गव
 यि वुन्यक्यन पोशि फुलये डोंठ कवु प्यव
 अजोध्या शोलु मारान, हर्श गारान
 नेबर्य प्रज़ा छि स्वरगुक मान छारान
 छे क्याह कथ क्याह करुन छुम क्याह बरुन छुम
 तुहुंज़ ऑगिन्या कमिच छम क्याह करुन छुम
 बु करु सोरुय बु करु ना त्याग सम्सार
 तुहुंज़ सीवा करुन्य म्योन राज़ दरबार
 वॅनिव जल जल करुन छुम क्याह बु करु ती
 यि आस्यम ऑगिन्या तुहुंज़ुय बु स्वरु ती
 अमा कैह ओरु व्वतरा द्युत नु राज़न
 दज़ान ऑस राज़सुय च़म ज़न तु हन हन
 पतव ह्योत रामु चँद्रन माजि वनुनुय
 वॅनिव माता छे क्या कथ, कथ छु सनुनुय
 च़ु मॉज म्यॉनी छुसय संतान चोनुय
 अतुर मा द्रींठ्य गोमुत कैह ति म्योनुय

मे वन माँजी छु क्याह कारन मे वन चुय
 छु क्याह राजस प्योमुत गम बोजू हा ब्रुय
 वनुम माता सन्योमुत शूक क्याह सन
 वनुम माता बनेमुच यीच क्वसु हन
 छु कव राजस गोमुत अँद्री सँनिथ क्याह
 छि तिछ कथ किछ, तु आमुत युथ बँनिथ क्याह
 मनुच शाँती मे रौवुम जल वनुम सत
 व्वपाय छांडुन छु छांडस बो तिछुय वथ
 अवस्था राजु संज डीशिथ मे प्यव द्वख
 करार रोवुम तु वनु क्याह त्युथ लोगुम छ्वख
 चु माता व्वन्य मु कर संकोच पोज वन
 मे छय अँदुरी दजान चम माँज हन हन
 मे वन माता छु क्याह असि वलनु आमुत
 मे वन कुस दोद व्वगुलिथ अलनु आमुत
 करस वोदुथ दिमस बो प्रान पनुनुय
 प्यमस पादन मे छुम भगवान पनुनुय
 वनुम माता मु कर व्वन्य चेर येति योर
 करुन छुम चारु माता युथ नु व्वथि शोर
 स्यठाह कैकी बनेमुच ओस न्यरदय
 वुठन चापान, अँछन दुय, ओस न्यरभय
 पतव कैकी वनान गँय रामु चँद्रो
 कथा छनु कैह वनय क्या म्यानि गंदुरो
 द्वहा अख ओस राजन प्रन मे कोरुनम
 जु वर मँग्यमुत्य मे ओसिस, लोल बोरुनम

तिमय वर अज़ मे मँगिमस कांह कथा छा
 पनुन प्रन पूर करुनय, नॅव वथा छा
 यि बूज़िथ राज़सुय डोल मन तु गव कोल
 मे वनतम म्यानि पोथुरो क्याह छु अथ होल
 मे पृछुनम पानु राज़न वन गछी क्याह
 यि कॅछा छुय मंगुन, मंग ठाक कॅह छा
 यि बूज़िथ रामनुय वोन माजि कैकी
 छि क्याह तिम वर ज़ु वनतम पानु मॉजी
 छु योदुवय म्योन कांह ह्यतकार माता
 च़ु योद ज़ानान बु ह्यक़ सुय भार माता
 वनुम क्याह छुम करुन, व्वन्य च़ेर मय लाग
 करुन्य चॉन्य सीव माता, म्योन बोड भाग
 वोनुस कैकी दप्योमस रठ सतुच वथ
 दि भरुतस राज़ु गॅद्य छय अख ल्वक़ुट कथ
 दौयिम वोनुमस च़ु सोज़ुन राम वनवास
 यि बूज़िथ राज़नुय ज़न ख्यव त्युथुय त्रास
 मे दोपुमस बस च़्वदाहन वॅरियन गछुस छुस
 पतव लाकन तॅमिस फीरिथ ति युन छुस
 मे वनतम रामु चॅद्रो बॅड यि कथ छा
 करुन क्याह अथ मरुन छा, अथ डरुन क्याह
 युथुय श्री रामनुय बूज़ राज़ सुंद प्रन
 असुनि लोग माजि निश क्याह राम सत ज़न
 छे क्याह कथ मॉज अॅथ्य प्यठ राज़ु व्याकुल
 बु छुस तत्परबु द्रासय वुनि ति छम सुल

छु राजन प्रन यि कोरमुत कलु बु नोमुरान
तु तथ सुत्य चोन आंकार, राम संतान
चु बोज़ माता सु संतान भाग्यवान, शूर
करान माता प्यता सुंद युस वचन पूर
स्यठाह दूरलब लबुन युथ वीर माता
हर्श माता प्यता, युथ वीर माता
चु दिम ऑगिन्या बु द्रास वनवास माता
लग्यम क्याह कैह वैरी छिम, आस माता
भरत करि राजुसी टोट बोय म्योन्युय
भरत युथ टोट बु ति छुस टोट चोन्युय
वैनिथ यी राम, श्री राम द्राव जल जल
मनस मंज़ ताम वनवासुच गॅनिस कल



रामु सुंद वनवास नेरुन

पथर प्योमुत तु मुरछा ऑस राजस
 तु कैकी तार ज़न चॅटमुच यि साज़स
 कोरुन प्रनाम द्वशुन्य कुठि न्यबर द्राव
 डेकस द्रह कांह नु, पोज़ ओसुस मनस भाव
 न्यबर नीरिथ सु अति स्योद कोशल्लि निश गव
 स्यठाह श्रधायि सान तस परन प्यव
 तॅमिस कैकी हुंदुय स्योद हाल बोवुन
 पनुन नेश्रय अॅमिस तत्काल बोवुन
 दोपुन माजे मे छुय वनवास नेरुन
 च्वदॉह्य वहुर्य छुम मे मॉजी तोरु फेरुन
 भरत जीयस दियिव व्वन्य राज़ु गॅद्य म्यॉन्य
 यि कैकी अँद्र वोन ती छा यछा चॉन्य
 मे छुम ना राज़ु सुंद पोज़ वाख पालुन
 मे तॅम्यसुंद ऋन छुना नख्रु मॉज वालुन
 दोयिम येलि माजि कैकी ज़ोन यी जान
 मे छुम मानुन तसुंद तॅम्य सुंद ति संतान
 गछ्यम व्वन्य च़ेर, दिम वनवॉस्य वस्तुर
 मे दिम ऑगिन्या चु मॉजी नेरु ऑखुर
 यि बूज़िथ मॉज कोशल्ल्या लायिनय आय
 तॅमिस ज़न असुवनिस बुथिसुय पेयस हाय
 स्यठाह कोशल्लायि वोनूनस व्वन्य चु येत्य बेह
 चु गछुहम दूर यामथ बो ख्यमय वेह

कॉशुर रामायन - सरवानन्द कौल प्रेमी - देवनागारी कश्मीरी रूफ : म.क.रैना

चै रोस किथु पॉठ्य वनतम जिंदु बु रोज़य
 चै रोस्तुय क्याह करय, कति चोन बोज़य
 छि शूब यथ राज़ दारस चानि सुती
 चै रुस योद छिम मे संतान बेयि ति कुती
 च़ु छुख ना सारिनय टोठ, टोठ श्री राम
 मे पोत्रो चानि ज़्यनु नोव गाश हो आम
 च़ु रोज़ख दूर यामथ सूर सपद्यम
 च़ु रोज़ख येत्य मे कांक्षा पूर सपद्यम
 बु चोनुय पोत्रु दूर्यर ज़ांह ज़रय नो
 चै रोस श्री रामु म्याने बस मरय हो
 स्यठाह कोशल्यायि कोरुनस ज़ारु पारय
 च़ु योद वनवास नेरख पान मारय
 मे छुख ईह लूक परिलूक पान वंदुयो
 चै मंज़ छुम प्रान पोत्रो पान वंदुयो
 अँशिस लँज दार माजे कोशल्याये
 स्यठाह आमच़ स्व वलुनय पोत्रु माये
 वँरिथ दॉर माजि वोनुनस वन च़ु कोत द्राख
 छेसय मॉज, छुय चै मानुन माजि हुंद वाख
 चै मानुन यी, चै रोज़ुन राज़ दारस
 मरय बो योद च़ु करुहम माघ हारस
 दोपुस श्री रामुनय फीरिथ पज़र छुय
 मे मानुन चोन दोप पँज्य पॉठ्य ज़बर छुय
 मे छुम ना वाख पालुन मॉल्य सुंद जान
 चै छुय ह्योन शेरि पेठ्य स्वामी सुंदुय मान

कॉशुर रामायन - सरवानन्द कौल प्रेमी - देवनागारी कश्मीरी रूप : म.क.रैना

यि राजन वोन छु मानुन ती च़े मॉजी
 च़ु छख पतिवृत, करुन छुय यी च़े मॉजी
 यि बूज़िथ गॅयि कोशल्या कथि सॅनिथ बोज़
 वोनून रामस च़ु कर ती, साविदान रोज़
 अँनिन वस्त्र दितिन रामस सखर गॅय
 छुनिथ सँन्यॉस्य संद्य वस्त्र ज़बर गॅय
 युथुय श्री राम सीता द्राव वुछुने
 सु सीता टॉठ सीता आव वुछुने
 युथुय सीतायि वनवॉस्य ओत यिवान वुछ
 दँछिन्य खोवुर्य नज़र तँमिसुय करान वुछ
 युथुय वोत राम निशि हॉरान सपदेयि
 वुछिथ सीता तँमिस वॉरान सपदेयि
 यि क्याह रुफाह वॅरिथ छुम राम द्रामुत
 अँमिस छुम बोय लक्ष्मन सुत्य आमुत
 युथुय बूज़ुन छु राम वनवास द्रामुत
 यिहँय शेछ पानु श्री राम वनुनि आमुत
 युथुय रामन वोनूस अभिप्राय पनुनुय
 त्युथुय सीतायि तोग नय कँह ति वनुनुय
 दोपुस सीतायि बु ति नेरय च़े पथ राम
 येत्यन आसख च़ु तँत्यनुय छुम मे स्वखदाम
 दोपुस रामन येती रोज़ राज़सी भूग
 च़ु छख कोमल वनस मंज़ छी स्यठाह रूग
 च़ु कर सीवा येती राज़स तु माज्यन
 च़े छिय संतान भरत, लक्ष्मन, शत्रुघन

चृ खोचान छख वुछिथ लबि प्यठ यि वांदुर
 चृ कवु सीते वनन नेरख चृ छख शुर
 चै कर अज़ताम पँथुरे खोर त्रुवुथ
 चै कर अज़ ताम लूकन पान होवुथ
 चृ नेरख वनतु किथु पॉठ्य क्याह करख दोर
 खयन, खंबुर्यन, कंड्यन सुत्य क्याह करख ज़ोर
 चृ छख बूजन ख्यवान नाना प्रकॉरी
 वनन मंज़ कति चै मेलन तिम ति सॉरी
 दरुन वृत छुय गरा कंद मूल आसुन
 गरा छॅर्य त्रेशु गॅल्य पान छूल आसुन
 येत्यन स्वख छुय वनन मंज़ बस द्वखुय द्वख
 मे वन सीते चृ कवु चालख वनुक्य छ्वख
 चृ रोज़ येत्य राज़ दारस बोज़ म्योनुय
 यिमय जलदुय बु छुस श्री राम चोनुय
 स्यठाह श्री रामनुय सीतायि वोन ज्ञान
 यि बूज़िथ ओरु वॅन्यनस यिम शब्द जान
 बु छस त्रुय चॉन्य पतिवृत छुय धर्म म्योन
 चै सुत्यन छाय रोज़ुन यी कर्म म्योन
 बु छस चॉन्य अर्द अंगिनी रामु म्याने
 बु छस चॉन्य दास दॉसी राज़ म्याने
 चै रोस अख च्यूह मे वनतम रोज़ु किथु पॉठ्य
 चृ छुख सौरुय मे, चैय वंदुहॉय पनुन्य टॉठ्य
 चै सुत्य रोज़ुन मे छम बॅड भाग्यवॉनी
 छु द्वशुन्य सुत्य रोज़ुन स्वय छि जॉनी

यि वॅनिथुय द्रायि सीता रामसुय पथ
 छुनुन्य वनवॉस्य वस्त्र स्वय रॅटुन वथ
 अँती लक्ष्मन वुछान ओस क्याह छु सपदान
 सु सम्वाद दृश्वनी हुंद ओस बोज़ान
 तँमिस ख्वदुवय स्यठाह गव शूक अथ प्यठ
 यि बूज़िथ पानु अथ तँम्य दिच नु कैह ह्यठ
 अंदर चाव अँदर पुरिथ आव जामय
 यिथी यिथ्य राम लॉगिथ ओर आमय
 बु छुस अख दास चोनुय द्राव वॅनिथुय
 तु द्राव रामस पतय सँन्यॉस्य बँनिथुय
 स्यठाह रामन वन्योनस रोज़ येत्य चुय
 यिमय वनवासु फीरिथ वारु पॉठ्य बुय
 चु कर सीवा प्यताहस माजिनुय बोज़
 चु कर सीव राज़ भरुतस नॅर बँनिथ रोज़
 अमा लक्ष्मन यि बूज़िथ शडकिथुय गव
 गँडिन गुल्य रामु चँद्रस अदु परन प्यव
 वनान गव रामु चँद्रस कोत बु नेरय
 च़े पतु पतु दास बँनिथुय पानु फेरय
 चु नेरख पानु वनवासुक्य तुलान दुख
 बु किथु पॉठ्य रोज़ येत्य वनतम तुलान स्वख
 स्यठाह बूज़िथ यि श्री राम यूत गव कोल
 वॅनिथ अदु कैह ति ह्योकुनस नय सु मा डोल
 तु यिथु पॉठ्य द्रायि यिम वनवॉस्य बँनिथुय
 वँरिथ नज़रा कुनी सँन्यॉस्य बँनिथुय

न्यबर कथ द्रायि प्रजा आयि चँसिथुय
 दोछिन्य खोवर्य तु पँत्य ब्रूठ्य आयि वँस्यथुय
 स्यठाह क्रकुनाद वोथ लूख खून हारान
 ल्वकुट्य बँड्य तय पोरुश त्रुयि पान मारान
 अमा गव क्याह यि फुलुये डोंठ वँम्य त्रोव
 अमा यथ शॉदियानस माग वँम्य होव
 खंजान मस वछ चटान, पलुवन दिवान चाख
 च्वपौर्य हुय वोथ वदान सॉरी चटान बाख
 औनुख अख रथ सजॉविथ ब्रोंठ कुन जान
 खँसिथ गँय अथ रथस प्यठ वीर संतान
 गँडिथ गुल्य राजु दारस द्रायि त्रेनुवय
 परन पैयि सारिनुय कमि मायि त्रेनुवय
 प्रजा सॉरुय तु मंत्री माजि द्वक्षय
 यिमन पतु पतु दवान गँय योर त्रेनुवय
 नगर त्रॉविथ युथुय तमसा नदी वॉच
 बँठिस प्यठ सारिवुय क्वशुला कोरुख रॉच
 पगाह द्राय पथ वनन ननुवॉर्य वनवॉस्य
 प्रजा मंत्री तु सॉरी फीर्य व्वदॉस्य



दशरथ राजुन प्रान-त्याग

यपौर्य दशरथ स्यठाह शूकस अंदर गव
 तैमिस सोरुय मैशिथ गव ज़न पथर प्यव
 ह्योतुन दूह दूह गछुन न्यर्बल तु न्यर-आश
 क्वठचन रोव होश राज़स, गव अँछन गाश
 समय वोत राज़ अँखुर द्राव बोड धाम
 तैमिस ज़ेवि प्यठ युतुय योत राम बस राम
 करान गव राम ही राम, प्रान त्रॉविन
 यिती दूह अँस्य कर्मस तीत्य प्रॉविन
 भरत तय बेयि शत्रुगन राम तय शाम
 गौमुत्य तिम अँस्य मातामाल कर ताम
 तिमन सूज़ुख शेछा अख राज़ प्रारान
 स्यठाह यँचकाल तस वोत लोलु छारान
 युथुय तिम वॉत्य अति ओस नाश गोमुत
 अयोध्यायि, फुलयि ज़न ओस डोंठ प्योमुत
 न अति ओस राम नय लक्ष्मन न सीता
 न कुनि हर्शा व्वलासा नय सु व्वतुसा
 युथुय भरतन यि सौरुय वार्ता बूज
 गँछिथ निश माजि कैकी दम रँटिथ रूज़
 स्यठाह वँर ताडुना भरतन यि माजे
 दँपिथ क्या सूज़ुथन वनवास राजे
 पतव अदु कौरुख राज़स दाह संस्कार

गोमुत ओस शूकग्रस बस राजुँ दरबार



आदर्श संतान हँर वार्ता : श्री राम

सु संतान भाग्यवान वन कूत आसी
 येमिस माता पिता भगवान बासी
 स्यठाह द्वरलब बनून अज़ राम पानो
 स्यठाह द्वरलब लबुन युथ नाम पानो
 प्रभातन न्यथ करान युस पादुनय पूज़
 तँमिस माता पिता सोरुय, तँमी सूज़
 करान मॉलिस तु माजे पूर आदर
 गलान तस पाफ जन्मुक्य छी सरासर
 छु संतान सुय करान युस ऑगिन्या पूर
 छु संकट द्वशवनी हुंद युस करान दूर
 येमिस शब्दन अंदर छुय नम्रता भाव
 तँमिस पोत्रस प्यता ज़न पानु दय आव
 येमिस पोत्रस छु ऑशीर्वाद युहुंदुय
 तँमिस अथु रोट नेती भगवानु सुंदुय
 युथुय संतान लबान थँज़ गथ पज़र बोज़
 लबान सुय भवुसरस पँज़ वथ पज़र बोज़
 येमिस मूलय गुरु भगवान बासी
 तँमिस वनतम छूर्यर अदु क्याज़ि आसी
 तँमिस सोरुय छु वातान पॉन्य पानय
 तँमिस सोज़ान भगवान दानु दानय
 छु मॉलिस माजि क्युत युस हर्शु व्वलास

तॅमिस सोरुय ज़गत छुय गुल्य गॅडिथ दास
 येमिस अंतःकरन श्वध, ब्वध अथस यस
 दयस पूजा प्यता सुंज पूज छय तस
 करान सीवा छु मॉलिस माजि संतान
 प्रसन्न छिस यिम, प्रसन्न तस पानु भगवान
 तॅमिस मंदुरन गॅछिथ ऑखुर करुन क्याह
 तॅमिस ईह लूक परिलूक ह्यथ स्वरुन क्याह
 तॅमिस छी शिव तु शक्ती दारसुय मंज
 तॅमिस सिंधान यिम परिवारसुय मंज
 न्यबर नीरिथ तॅमिस दय कति छु छांडान
 ज़गत छाँडिथ तॅमिस कति पय छु छांडान
 तॅमिस दय छुय गरस मंज पय ति अँत्यनुय
 तॅमिस सोरुय छु ब्रॉह कनि ज़य ति अँत्यनुय
 प्यता सुंद अख शब्द तस गालि हथ पाफ
 प्यता सुंज सेज नज़र चँलुरावि हथ शाफ
 प्यता सुंद अख अंश संतान पँज्य पॉठ्य
 प्यता संतानसुय सत ज्ञान पँज्य पॉठ्य
 प्यता माता सतुक धनु द्वार पोटुरस
 छु सोरुय तस यिमय संसार पोटुरस
 गुरु ज्ञानान प्यताहस सुय छु प्रावान
 करान सीवा छु ज्ञानान छुम यि भगवान
 यिथिस पोटुरस छु जय जयकार म्योनुय
 तु ऑशीर्वाद बारमबार म्योनुय
 अमा कति राम अज़ श्री राम म्योनुय

छि मॅर्याद कति सु तॅम्य सुंद नाम म्योनुय
 अँकिस शब्दस प्यठुय वनवास प्रोवुन
 पित्र भक्ती तु संतान भाव होवुन
 तपस्या करनि अद् क्याह द्राव वनवास
 दिचुन लथ राज़ुसी भूगन कोरुन डास
 कॅरुन क्याह पालना कमि लोलु वचुनन
 स्यठाह हर्शस गॅछिथ द्राव पानु सत-ज़न
 कोरुन बलिदान सोरुय द्राव पानस
 दोपुन स्वख वाति अमि सुत्यन प्यताहस
 यि ओस करताम, करताम राम आमुत
 यि दशरथ राज़सुय संतान ज़ामुत
 यिहोय भगवान, यिहोय श्री राम सुय राम
 बँविन तस च़रनु कमुलन सोन प्रनाम



भीष्म पितामह

अमा कति साँ सु भीष्म मान तँम्यसुंद
 अमा कति मोल तस बलीदान तँम्यसुंद
 अकाँय कांक्षा तु स्वय मॉलिस वॅरुन पूर
 प्रतिज्ञा तिछ वॅरुन बूज़िथ गछान सूर
 दिचुन लथ राज़ुसी राज़स वौदुन प्रान
 ओनुन मॉलिस बजा बोल, द्राव संतान
 कोरुन प्रन, वाँसि नेथुर करु नु ज़ांह बो
 गछ्यम रोजुन प्यता प्रसन्न दुखी नो
 यिहोय भीष्म यिहोय संतान नोन द्राव
 जगत तनु प्यठु अँमिस तर्पन करान आव
 द्युतुस वरदान मॉली तीज़ प्रावख
 यछख येलि पानु, पनुनी प्रान त्रावख
 यिहोह संतान महाभारत करान आव
 यिहोय संतान अथस क्यथ प्रान ह्यथ द्राव
 योछुन येलि पानु पानय प्रान त्रॉविन
 खधिष्ठर राज़सुय थँद्य ज्ञान बाँविन
 यिथिस पोटुरस यि जय जयकार आसुन
 यि सोन प्रनाम बारम्बार आसुन



श्रवन कुमार

अमा पथ कालि ओसुय ब्याख संतान
 तँमिस ओस मोल मोज साक्षात भगवान
 प्यता माता तँमिस ऑस्य अँन्य तु रँन्य बोज़
 कुनुय संतान यिमनुय साविधान रोज़
 करान सीवा यिमन ओस द्यन किहो राथ
 यिमन निश दूर रोज़ान ओस नु अख साथ
 करान श्राना यिमन ध्याना करान ओस
 करान पूजा यिमन लोला बरान ओस
 यिमन च़रुनन तलुय भगवान तस ओस
 येत्यन यिम पानु दय सनिधान तस ओस
 यिमन तिर्थन तु दिवुयन हुंज़ गँयख कल
 दोपुख पोतुरस च़ वातुनाव पानु असि जल
 लबव अँस्य तार यथ भवुसागुरस जल
 च़ कर सॉन्य पूर मनि कामन लबख फल
 च़े छुय प्रथ सातु ऑशीर्वाद सोनुय
 च़ बोज़ख व्वन्य सतुक जयनाद सोनुय
 श्रवन कूमार पादन तल यिमन प्यव
 यिमन तिर्थन निनुक सुय संज़ करान गव
 बनोंवन त्रकरि पॉतुर जूर्य पानय
 नखस खॉरिथ वॅडिन श्रधायि सानय
 थँविन दून पॉतुरन मंज़ मॉज तय मोल
 नियन तिर्थन तु बोरुनख माय तय लोल

स्यठाह तिर्थन गॅछिथ लोब गाश यिमवुय
चौलुख संकट वुछुख प्रागाश यिमवुय
यि गॅयि बॅड पित्रु भक्ती, प्रावि अदु सुय
प्यता माता छु टोठ, दयि टोठ सुय छुय
यिहोय श्रवन कुमार क्युथ भाग्यवान ओस
प्रज़लवुन, गाश तारुख, तीज़वान ओस



ऑही

यिथ्यन संतानुनय गछि ना वंदुन प्रान
 करुन गछि राथ तय दूह पूज यिहुंद ध्यान
 वॅरिन स्यध तुहुंज मनि कामन सदा शिव
 वॅरिन रक्षा सुबुहन शामन सदा शिव
 स्व व्रथ दियिनवु दूहय भगवान म्योनुय
 स्यदथ बॅनिनवु तु लॅगिनवु प्रान म्योनुय
 रटुन गछि राम तय भीश्म पिता ज़न
 करुन गछि ध्यान यिहुंदुय न्यथ प्रभातन
 करुन प्रनाम यिमन न्यथ पादि कमलन
 तु ज़ानुन मोल तय मोज पानु भगुवन
 रटुन गछि पानु ऑशीर्वाद यिहुंदुय
 युथुय संतान पॅज्य किन्थ ज़य लबान छुय
 मे रोटुमुत प्रेमियन ल्वकुचारु प्यठु मोल
 प्यता म्योनुय गुरु अँम्यसुय बोरुम लोल



भरत जीयुन श्री राम फीरिथ अनुनि नेरुनुक सफर

वशिष्ट महाराज वनान गव भरत जीयस
 तु अँद्य अँद्य राजु मंत्री सुत्य आँस्य तस
 भरत जी व्वन्य स्यठाह शूकस अंदर ओस
 अँध्य अंदर यी मुनीश्वर अदु वनान गोस
 प्रथा यी, व्वन्य चु व्वथ रठ राजु गँद्य बोज़
 चु ब्रौह कुन राजुसी कर, साविधान रोज़
 अयोध्या वाँसीयन कर पूर रक्षा
 यिमन बर लोल यिम छी चाँन्य प्रज़ा
 चु व्वथ थोद राजु दशरथ द्राव पानस
 अयोध्या छय च़े प्रारान पूज़ करुनस
 यि बूज़िथ गव भरत हयबुंगु अँदुर्य मूद
 वशिष्ट जीयस सुय ब्रौह कुन गुल्य गँडिथ रूद
 गुरु महाराज मे वँन्यतव यी प्रथा छा
 मे ज़्युठ छुम राम श्री राम म्यॉन्य कथ क्याह
 बु किथु पाँठ्य राजु गदि प्यठ बेहमु राजन
 छु श्री राम पानु अधिकॉर्य कुस बु आसन
 बु गछु व्वन्य पानु वनवास राम छांडन
 अनन बो पानु श्री राम यूर्य राजन
 सत्तायि सुय छु अधिकॉरी बु कुस छुस
 छु श्री राम पानु भगवान छुस बु अदु कुस
 अनन बो पानु फीरिथ राजु श्री राम

अयोध्या वॉसीयन ज़ेवि प्यठ तसुंद नाम
बु छुस सीवक तसुंद अख दास तँम्यसुंद
अयोध्या वॉसीयन व्यश्वास तँम्यसुंद
दियिव ऑगिन्या बु गछु पानय वनन मंज
बु करु श्री राम फीरिथ अनुनुकुय संज
मे अख अख गॅर छि बासान ज्यूठ अख कोह
गछ्यम व्वन्य चेर राव्यम बेयि अँज्युक दूह
यि बूजिथ शूक चोल हर्शस अंदर गॅय
वशिष्ट महाराज तु मंत्री ख्वश ज़बर गॅय



भरत जीयुन नेरुन

भरत जी द्राव अदु क्याह वारु कारय
 तुजिन सेना स्यठाह सुत्य राजुदारय
 तैमिस सुत्य द्रायि मंत्रीगन ति साँरी
 कोशल्या बेयि स्वमित्रा सुत्य कैकी
 नगर वाँसी तु तस सुत्य द्रायि साँरी
 सजाँविथ सह तु गुर्य क्याह आयि साँरी
 दक्षन कुन सारिवय कोर पूर प्रस्थान
 तु जेवि प्यठ सारिनय ओस राम भगवान
 युथुय तिम वाँत्य श्रंगबीर पूर साँरी
 अँती डेरा द्युतुख लँग्य करनि ज़ाँरी
 अमा सनु आसि कति श्री राम सोनुय
 अमा द्राव कमि साँ वति श्री राम सोनुय
 करव दर्शुन करोस अँस्य पोशि वर्शुन
 अमा गँर आसि क्वसु येलि मेलि दर्शुन
 निखाद राजन युथुय बूज़ भरत जी आव
 सु पानय वुछनि सोरुय ओरकुन द्राव
 वुछिन सेना स्यठाह बेयि लूख वारा
 वुछिथ राजस अँदुर्य गव शूक वारा
 दोपुन आमुत भरत क्याह करनि आँखुर
 मे बासान छुस क्वट्यल मन नतु यि क्याह गर
 यि मा अज़ रामु चँद्रस कैह छु अति वार
 करुन पज़ि चारु व्वन्य कैह रोज़ तैयार

पनून्य सेना थँवुन तैयार यकबार
 क्वट्चल मन आसि यस करहोस यलगार
 सु योदवय आसि योर ख्वद्ध करनि आमुत
 करव अँस्य चारु ज़न नय आसि ज़ामुत
 मनस मंज़ यी व्यचारन द्राव पानय
 पनून्य सेना थँवुन दूर, आव पानय
 युथुय भरतन वुछुन निखाद यिवान
 दोपुन मंत्री सुमंतस वारु थव ध्यान
 यिवान छुय राज़ गोह युस छुय मेथुर म्योन
 यि छुय श्री रामु सुंद हितकौर्य मेथुर प्रोन
 खबर अँसुस कर्पौर्य द्राव राम भगवान
 पृछव अँम्यसुय कर्पौर्य नेरुन छु असि जान
 निखाद राज़ याम वोत निशि पानु भरतस
 कोरुन प्रनाम भरतस लोल बोरुनस
 थोवुन नज़रानु वाराह ब्रौठ कनि तस
 प्रयोज़न क्याह छु यिनुकुय पूर पृछुनस
 दोपुस भरतस छुसन बु राम छांडान
 गोहन वोनूनस तु सेना क्याज़ि लारान
 दोपुस भरतन मे छुम न्युन राम फीरिथ
 तँमिस क्युत राज़ सिंघासन छु शीरिथ
 मे छिम मंत्री तु सौर्य दरबौर्य सुत्यन
 मे छम मातायि परिवार सौर्य सुत्यन
 मनस मंज़ छुम मे सत शंका मँ कर कांह
 मे छुम टोठ राम, श्री राम त्रावना ज़ांह

सु छुम सोरुय मे छुम सोरुय तसुंदि सुत्य
 बु आमुत ज़ारु पारस ह्यथ तवय कृत्य
 यि बूजिथ गव निखाद राजस हर्श मान
 करुनि लोग पानु अदु भरुतस त्वता जान
 अयोध्या वॉस्य, मंत्रीगन तु सेना
 अँती रूद्य तिम वसान येति ऑस गंगा
 स्यठाह रातस तिमन ऑस बे-करँरी
 वुछोन कर राम, रातस कँरुख ज़ॉरी
 कोरुख व्वपवास सार्यव अदु नैदुर क्याह
 दपान ऑस्य राथ गछि ना गाश यियि ना
 वँथिथ गव प्रातुकालस अदु भरत याम
 कोरुन गंगायि तरनुक पानु संज्र ताम
 निखाद राजन अपोर द्योव तार सार्यन
 गुरुजन, मंत्रीगन, मातायि तार्यन
 अयोध्या वॉसीयन याम तार द्योवुन
 तु सेनायि तार दिथ, यश नाव प्रोवुन
 व्वखुल्य द्राय सॉर्य अति प्यठु राम छांडान
 लोबुख अदु दूरि बरदाज़ु आश्रम जान
 कोरुख बरदाज़ु मुनीयस युथ नमस्कार
 परन सॉरी पेयस कोरुहँस जयकार
 वुछिन भरुतस यि सेना सुत्य यामथ
 स्यठाह क्षूबस मुनी गव पानु तामथ
 पतव भरुतन वौनुस महारा अनन राम
 बु छुस सीवक तसुंद सुय म्योन स्वखदाम

बू छुस आमुत निमन श्री राम फीरिथ
 तैमिस क्युत राज़ सिंघासन छु शीरिथ
 यि बूज़िथ गव मुनीश्वर त्यूत हर्शस
 द्युतुन अद पानु ऑशीर्वाद भरतस
 दिचुख राथ अँत्य पगाह अद द्रायि सॉरी
 कँरुख श्री राम छांडनुच यँच तैयॉरी
 चित्रकूट वॉत्य अति प्यठु सॉर्य यामथ
 ज़नख राज़ा ति वोतमुत ओस तामथ
 युथुय तँम्य बूज़मुत ओस रामु सुंद पय
 ज़ि सीता ह्यथ तु लक्ष्मन कोर कुन गँय
 सु द्रामुत ओस अदु श्री राम लबुहन
 रँटिन सुत्य मंत्रिगन, परिवार राज़न
 अँती अदु बीठ्य दूश्वय द्युतुख ठीकान
 स्वरान सॉरी वुछोन कर राम भगवान
 स्यठाह ओस ग्रज़, करान सॉर्य राम श्री राम
 अयोध्या वॉस्य, सेना, लूख, हंगाम
 यपॉर्य श्री रामनुय बूज़ याम क्रकनाद
 अँनिन सीता तु पोवुन लक्ष्मनस याद
 वुछुन क्या लक्ष्मनन सेना छि क्वसुताम
 अमा ज़न छुख भरत सुत्य, वुछिव राम
 अमा पँज़्य पॉठ्य छा योर भरत आमुत
 रँटिथ छा राज़ गँद्य, ख्वद्ध करनि आमुत
 अमा श्री रामनुय बूज़िथ असुन त्रोव
 मनस तस ग्राय लँज नय लोल तँम्य बोव

भरत वोत ताम श्री रामस परन प्यव
 रोटुन राम नालुमति रामस शरन गव
 अँशिस तस दार लँज गंगा वसान ज़न
 कोरुन दर्शुन तँमिस व्वगुनेयि हन हन
 युथुय भरुतन वोनुस गव राज़ु स्वर्गस
 सु दशरथ राज़ु सोन बब रूद येति कस
 अयोध्या रॉवमुच्च प्रथ शयि न्यराशा
 च्वपॉर्य अंधकार तु वुन्यक्यन कुनि नु गाशा
 अनाथ सॉरी छि गॉमुत्य अँस्य करव क्याह
 अमा श्री रामसुय रुस अँस्य स्वरव क्याह
 यियिव फीरिथ रँटिव तोह्य राज़ु गँद्य जान
 तोही सॉन्य बब, प्यता, माता तु भगवान
 छि सॉरी यूर्य आमृत्य तुहंजि माये
 अचोध्या वॉसीयन अख तुहुंद साये
 छि अँस्य आमृत्य करान तोहि ज़ारु पारय
 यियिव फीरिथ अयोध्या वारु कारय
 अमा याम लक्ष्मनन बूज्य भरतु संद्य वाख
 स्यठाह आश्वर कोरुन सुती चँटुन बाख
 अमा गव क्याह, मे क्या रोवुम, कोरुम शख
 खबर ऑसा भरत छुम रामसुय डख
 स्यठाह गँय राम लक्ष्मन शूकु सुत्य गीर
 युथुय बूजुख प्यता गव आख ज़न तीर
 तु सुती बूज सीतायि त्युथ चँटुन बाख
 दोपुन क्याह गव, हेतिन दिन्य वस्त्रन चाख

अमा श्री रामनुय कोर दॉर कूताह
 वॅरिन सॉरी शांत वोनूनख ज्ञान त्यूताह
 पतव ह्योत सारिवुय श्री राम पूजुन
 वशिष्ट महाराज ज़नक राजुन ति बूजुन
 करान गॅय सॉर्य व्यनुती रामु चॅद्रस
 तु ब्रॉह कनि ज़न शरन ऑस्य राजु इंद्रस
 यिथा यूग्य रामु चॅद्रन लोल बोरुनख
 वॅरिथ सत्कार यिनस इनकार कोरुनख
 प्यता सुंज ऑगिन्या छम स्वय करुन्य पूर
 तसुंद छुम आत्मा ब्रॉह कनि, नु कैह दूर
 च्वदाहन वॅरियन करुम छुम पूर वनवास
 युथुय म्वकुलन वॅरी यिम, अदु त्युथुय आस
 गॅछिव फीरिथ वॅरिव तोह्य लोलु व्यवहार
 भरत जी, गछ चु रठ व्वन्य राजु दरबार
 प्रजा पालुन अयोध्या शूबरावुन
 नगर वॉसी चु अख अख शांत थावुन
 चु कर सीवा लूकन हुंज यिम च़े संतान
 बरुख पोज़ लोल टोठी पानु भगवान
 यि छय म्यॉन्य ऑगिन्या व्वथ कर यिहॅय पूर
 अयोध्या वॉसीयन सॉर्य द्वख गछन दूर
 यि बूज़िथ गव भरत लाचार लाचार
 स्यठाह गव क्षूबसुय मंज़ किथु लग्यम तार
 रॅटिन च़र्नारब्बंद रामस परन प्योस
 अँशिस लॅज दार तस ऑखुर शरन गोस

वॅरुन व्यनुती दुबारय रामु चॅद्रस
 दियिव तोह्य पनुनि अथु कॅह येति पनुन वस
 थवन बो ब्रॉठकनि सुय लोलु सिंधान
 ज़न ऑसिव पानु तति श्री राम भगवान
 तुहुंज़ ऑगिन्या यिथय पॉठ्य पालु अदु बो
 अदय दूर्यर तुहुंदुय च़ालु अदु बो
 यि बूज़िथ रामु चॅद्रस आश्वर गोस
 दिच़ुन च़्यथ याम यकदम ज़वन त्युथुय प्योस
 ख्वरन हुंज़ ख़ाव दिच़ुनस लोल बोरुनस
 स्व रॅट भरुतन तु ख़ावे म्यूठ कोरुनस
 रॅटिथ श्री रामु संज़ ऑही भरत आव
 कलस प्यठ ख़ाव ह्यथ रामस निशे द्राव
 नगर वॉसी, मुनीश्वर, राज़ दरबॉर्य
 तु सेना ह्यथ यि फीरिथ आयि अदु सॉर्य
 अयोध्यायि वॉत्य फीरिथ वारुकारय
 करुनि लॅग्य सॉर्य व्यवहार बेयि दुबारय
 भरत ब्यूठ पानु कति सिंघासनस प्यठ
 थॅवुन श्री रामु संज़ ख़ाव आसुनस प्यठ
 अवधपूरी न्यबर ओस गाम नंदुगाम
 भरत तपसी करान रुद राम श्री राम
 च़्वदाहन वॅरियन भरत बे-हाल हालय
 कोरुन प्रन योद नु यियि राम पान ज़ालय

श्री राम ब्रॉह पकान

चित्रकूट त्रोव रामन ब्रॉठ अदु द्राव
तु टॉठ सीता तु लक्ष्मन सुत्य ह्यथ आव
ऋशी अत्री, अनूसूया तँमिस त्रय
बिहिथ आश्रम कुटी मंज बॉच यिम जुय
ओतुय वॉत्य राम सीता बेयि यि लक्ष्मन
कोरुख सार्यव रेशिस प्रनाम चरुनन
अँती कुटियायि मंज रूद्य अत्रीयस निश
कोरुहख सत्कार करान यिथु पॉठ्य दूहदिश



पतिवृत धर्म व्वपदीश

ऋशी अत्री करान गव अस्तुती जान
 वुछुन याम राम, श्री राम, पानु भगवान
 कोरुन अति त्रेनवुनी रुत मान सत्कार
 कोरुन श्री रामसुय जयकार जयकार
 तु रातस बीठ्य अँत्य वनवॉस्य त्रेनुवय
 पगाह अति नेरनुक बस पूर नेश्रय
 ऋशी पत्नी अनूसूया तु तपसी
 येमिस भगवान साक्षात ओस सॉमी
 वुछिथ सीता ऋशी पत्नी हर्श गव
 तँमिस नॉरी धर्म सुती च्यतस प्यव
 द्युतुन सीतायि आँशीर्वाद पानय
 स्यठाह श्रंगार कोरुनस लोलु सानय
 पतव नॉरी धर्म वोनुनस स-व्यस्तार
 छु क्याह पतिवृत धर्म, पोज़ कर्म व्यवहार
 बनुन ह्यतकॉर्य बॉयिस माजि मॉलिस
 करुन्य सीवा स्व-मनु सत्कार वॉलिस
 दपान योद आसि आपथकाल प्योमुत
 यिमन च्वन हंज़ परीक्षा करुन्य वोनमुत
 गवडुन्य गछि दॉर परखावुन दर्यर छा
 धर्म पनुनुय दोयिम, सुती ज़बर छा
 त्रेयिम गछि पोज़ मेथुर परखुन अमा कुस
 द्वखस तय संकटन सहायत करान युस

तु चूरिम त्रय पनुन्य पतवृत पजी छा
 तु आपथ कालसुय त्रॉविथ गॅमुच छा
 अकोय नॉरी धर्म त्रुयि, वृथ, नियम तार
 करुन्य सीवा बरुन पोज़ लोल तय प्यार
 पनुन सॉमी अँकिस त्रुयि आसि नय ओर
 तु खदुवय आसि वृध, रूगी कनव ज़ोर
 यिथिस पतीयस करी खद नॉर अपमान
 तँमिस नर्कस अंदर छुय वास पोज़ मान
 पतीवृत त्रय छे प्वरुशस अरदाँगी
 तु पँज्य पॉठ्य त्रुयि भगवान सुत्य सॉमी
 यिहोय व्वपुदीश दिवान गॅय रॉत्य रातस
 अनूसूया अँमिस सीतायि पानस
 दोयिम दूह ओस अति यिम द्रायि सॉरी
 वनस मंज़ रेश्य तु मुन्य अति आयि सॉरी
 वोनुख सार्यव सँमिथ श्री रामसुय कुन
 पनुन्य बॉविख अँमिस दूख सॉर्य ब्योन ब्योन
 वनस मंज़ येति छि कॉत्याह ज़ीव भगवन
 दिवान कश्ट यिम छि असि क्याह राथ तय द्यन
 यिमन गछि तुहँदिवुय अथु नाश भगवन
 व्यनथ सॉन्य यी वॅरिव रक्षा महाज़न
 तथा अस्तु वॅनिथ अदु द्राव श्री राम
 महावन ओस येति तूर्य च़ाव श्री राम



यिथुपॉठ्य वोट
सरुनंद प्रेमी सुंद वोनमुत कौशरि रलडरनुक
दोयुड कंड डरने अयोधुडर वररुतु अंद।



त्रेयिम बोग
अरन्य कांड (वनवास)

व्योठ पूठ व्यस्तारः

१.	वनवास वारता	९०
२.	श्रुपनखा कथा	९२
३.	सीता हरन	९४
४.	श्री रामु सुंघ व्यदाख तु छांडव सीतायि हुंद	९७
५.	सीतायि हुंद पय लबुन	१००



त्रेयिम बोग

अरन्य कांड (वनस मंज)

वनवास वार्ता

पकान गॅय ब्रौह वनन मंज राम लक्ष्मन
 यिमन सीता, ज़नक, नंदनी ति सुत्यन
 दोछिन्य खोवुर्य वुछान गॅय न्यरज़नी वन
 खयव, खंबुर्यव, कंडचव पेठ्य द्रायि सत ज़न
 पकान ब्रौह ब्रौह यिमन ओस पानु श्री राम
 मंजस सीता ज़पान अँदुरी स्व ऑस राम
 यिमन द्वशुन्य पकान पतु ओस लक्ष्मन
 वुछान ब्वन कुन अँमिस ओस साविधान मन
 यि ज़ानुन राम ब्रह्म ओस पानु भगवान
 तु लक्ष्मन ज़ीव ज़ानुन आत्मा जान
 यिमन मंज बाग सीता ज़न तु माया
 स्यठाह दूरलब लबुन सथ, आसि काया
 पकान गॅय वॉत्य तिम डन्डक वनस मंज
 अँती कोर रोज़नुक ऑखुर यिमव संज
 दोछिन्य खोवुर्य वुछिख अति आश्रम कुत्य
 वुछिख अति रेश्य तु मुन्य, साधक यिमन सुत्य
 वुछुख अत्री मुनीश्वर अति करान थफ
 तँमिस सुत्य त्रय अनूसूया करान ज़फ
 सुतेखन र्योश वुछुख त्रेनुवय परन प्यॉस

द्युतुख तॅम्य पानु ऑशीर्वाद शरन गॉस
 अमा पॅक्य ब्रॉह यामथ ब्याख र्योश आव
 यि ओस आगस्त मुनी प्रारान ह्यथ भाव
 यिमव डंडवथ कोरुस, सत्कार कोरुहस
 मुनी हर्शस स्यठाह गव लोल बोरुहस
 दोपुस आगस्त मुनीयन व्वन्य येती रोज़
 चृ छुख श्री राम भगवान, म्यॉन्य कथ बोज़
 स्यठाह संकट पकुन ब्रॉठ अख त्रया ह्यथ
 येती रूज़िव मे निश ऑखुर छे क्याह कथ
 दोपुस रामन गछुन एकांत शाये
 तॅती रोज़व छि द्रामत्य जान राये
 डन्डक वन त्रोव यिमवय ब्रॉह पकान गॅय
 पकान गॅय पंचवटी वॉतिथ अमा पेय
 स्यठाह रमनीक यि अति ऑस जाय स्वंदर
 मनस गोख मूह, अॅती रोज़नुक सरासर
 परन कुटिया अती, आश्रम बनोवुख
 स्यठाह स्वंदर सजोवुख, शांत थोवुख
 कोरुख हवुना, प्रवेशा अदु कोरुख जान
 अॅती त्रेनुवय करान गॅय दयि सुंदुय ध्यान
 नॅदी गोदावरी अति ऑस यॅच जान
 करान अॅत्य राम लक्ष्मन श्रान तय ध्यान



श्रूपनखा कथा

दूहा सपद्यव अमा राक्षस कन्या अख
 स्यठाह स्वंदर शरीरस बस दिवान दख
 यि ऑस श्रूपनख यि आसुय रावुनुन्य कूर
 यि ऑस फेरान वनन मंज दूर तय दूर
 युथुय कुटियायि निश वॉच राम ड्यूतुन
 मनस लॅज ग्राय तस ज़न काम ड्यूतुन
 वोनुन रामस बु छस स्वंदर मै बर लोल
 मे वोत यॅचकाल छांडान छुम गोमुत होल
 वोनुस रामन व्यवाह कोरमुत मे छुम जान
 मे छम सीता पनुन्य त्रुय सुत्य पोज़ मान
 पनुन छुम बोय लक्ष्मन नेथरु रोस्तुय
 तॅमिस वन पानु योदुवय मानियेय सुय
 नकार दूशुय अॅमिस कोर च़ख अॅमिस खॅच
 बनोवुन रुफ व्यकुराल, क्रूध हॅच मॅच
 ह्योतुन सीतायि लारुन क्रूध खोरुन
 अमा गव राम कोत सन वारु छोरुन
 यपॉर्य लक्ष्मन स्यठाह क्रूधी सपुद ताम
 चॅटुन अदु नस त्युथुय अॅम्य श्रूपनखि याम
 दिवान क्रकृ तय छकान रथ श्रूपनखु द्राय
 व्यलाफ वॅर्य वॅर्य करान गॅय हाय तय हाय
 तॅमिस ऑस्य बाँय जोरा खर तु दोशुन
 तिमन निश वॉच वोनुनख हाल हन हन

कॉशुर रामायन - सरवानन्द कौल प्रेमी - देवनागारी कश्मीरी रुफ : म.क.रैना

पतव तिम आयि राक्षस वीर हे हे
 अमा खद करनि आमृत्य तीर हे हे
 स्यटाह बलवीर राक्षस मौर्य रामन
 तु खर दोशन अपोर अदु तौर्य रामन
 वेजे सपदिथ अमा गव पोशि वरुन
 तमी विजि आयि सीता करनि दर्शुन
 पतव बूज रावनन सौरुय यि अहवाल
 स्यटाह खोत क्रूध तस गव हाल बेहाल
 ओनुन परिवार सौरुय सौर्य मंत्री
 तिमन बोवुन यि बेनि हुंद हाल ज़ोरी
 कोरुन नैश्रय अनन बो चूरि सीता
 करन बो राम अदु आवारु वारा
 अँमिस वोन सारिवुय छुय राम भगवान
 तँमिस सुत्य खध करुन छुय क्रूठ यिछ हान
 अमा कथ मानिहे रावुन सतुच कथ
 अहंकारन तँमिस ऑस रावरुमुच वथ
 ओनुन मारीच रँटिथ बोवुन तँमिस हाल
 दोपुन तस चुय करख स्यध म्योन्य अख चाल



सीता हरन

बँनिथ मारीच स्वनु संज रूस्य कट आव
 येत्यन सीता व्वदन्य ऑस अदु तपॉर्य द्राव
 स्यठाह गव आश्वर सीतायि डीशिथ
 दोपुन रामस वुछिव स्वंदर तु पुरिथ
 यिहोय गोछ ना मे आसुन प्यार करहस
 यि रछि हन पानु बो पोज लोल बरुहस
 युथुय लक्ष्मन ओतन आव शेंक गॅयि तस
 यि छनु पॅज रूस्य कॅट, कुस ताम राक्षस
 युथुय रटहन अॅमिस, रूस्य कॅट चलान गॅय
 पतय अदु राम लार्योस आयस यि अथि नय
 अमा यॅचकाल तामथ राम नय आव
 पतय लक्ष्मन तॅमिस अदु छांडुने द्राव
 कुनी जॅन्य रूज सीता अथ कुटी मंज
 यपॉर्य कोर रावुनन सीता निनुक संज
 खॅटिथ ओस चूरि रूजिथ दूरि चरचान
 क्वटचल साधू बँनिथ आव ओर लारान
 कुटी अख मर्दु रुख अँद्य अँद्य अत्यन ऑस
 तु नेरन विजि यि दिचमुच लक्ष्मनन ऑस
 न्यबर रुखि द्रायि सीता हाय क्याह गोस
 तुलिथ नियि रावुनन साधू बँनिथ ओस
 नखस खॉरिथ वुडिथ आकाँश्य किन्य गव
 स्यठाह लॅज करनि व्यलाफ क्युथ समय प्यव

अँछव सीतायि कोताह खून होरुय
 करान आँस राम राम, तमि पान मोरुय
 स्यठाह परबथ व्वलँगिथ द्राव रावुन
 जटायू ओस वति बोज़ान कुनुय ज़ोन
 स्यठाह सीतायि हुंद क्रकृ नाद बूज़ुन
 त्युथुय ह्योर रामु सुंद जयकार सूज़ुन
 रछा सथ गँय अँमिस सीतायि कोर ज़ोर
 जटायू खोत युथुय ह्योर रावुनन मोर
 च़लान गव द्राव रावुन अदु दक्षन कुन
 तु अख अख वस यि सीतायि त्रोव ब्वन कुन
 युथुय यिम वॉत्य किशकंधायि बँठ्य किन्य
 नज़र त्रॉव रावुनन, कम ताम बँन्य किन्य
 बिहिथ ब्वनु पर्वतस प्यठ आँस्य वांदर
 प्यवान ब्वन कुन वुछिख वस्त्र बराबर
 अमा ह्योर कुन नज़र वँर याम तिमवुय
 वुछिख अबला वदान क्वसुताम यिमवुय
 पतव लाकन यि लंकायि वोत रावुन
 थँवुन सीता अशोक बागस अंदर ब्योन
 स्यठाह स्वंदर अशोक वाटिक वनव क्याह
 च्वपॉर्य स्वंदर छि पँल्यमत्य पोश यकजा
 रंगारंग पोश अति नाना प्रकॉर्य फल
 स्यठाह अति लूबवुन तय शूबवुन ज़ल
 यि सीता शूक ह्यथ, तस मन ति व्याकुल
 अँमिस ख्वद च्वंज़ु तु दायि सीवायि बिलकुल

कॉशुर रामायन - सरवानन्द कौल प्रेमी - देवनागारी कश्मीरी रूफ : म.क.रैना

अँमिस रातस दूहस ओस रामु सुंद ध्यान
 अँमिस ओस दून अँछन तल राम भगवान
 यपौर्य मारीच वँरिथ वध आव श्री राम
 तु लक्ष्मन जी ति वोत कुटियायि निश ताम
 वुछिख कुटिया छँरुय कति सनु छि सीता
 अमा दूश्वय दपान कोत गँयि यि सीता
 दँछिन्य खोवुर्य दिवान गँय नज़र यामथ
 करान धिकार पानस आँस्य तामथ
 स्यठाह गव शूक दूश्वुन्य, दूख वनव क्याह
 वनन मंज़ दूख तु संकट स्वख वँनिव छा
 त्यथुय अदु द्रायि दूश्वय दूर तिम गँय
 दपान आँस्य हाय सीतायि कति लबव पय



श्री रामु संद्य व्यदाख तु छांडव सीतायि हुंद

यि द्राव श्री राम तस सीतायि छांडान
 वनव मँज्य द्राव कस सीतायि छांडान
 दिवान वँन्य जायि जाये मायि होत राम
 कत्यन खोत सिर्यि कतिनस तस सपुद शाम
 पृछान गव सारिनय युस कांह समुख तस
 छु हारान ओश छु त्रावान व्वश स्यठाह बस
 अमा म्योन प्रान सीता कोत सना गँय
 स्व सीता मान सीता, कोत सना गँय
 मे क्या सपद्यव मे त्रॉवुम कुन्य तु कीवल
 वोलुस मायायि न्यूनस बो वँडिथ जल
 मे क्याह ऑसुम खबर सीता गछ्यम कोत
 ब्योनुय कुटिया व्वपर कुस वातिहे तोत
 तँमिस ओस रॉछ लक्ष्मन पानु संतान
 तँमिस ऑस मर्दु रुख कुटियायि शूबान
 मे छुम यी आश्वर वँम्य वँड सपुद क्याह
 अमा किथु पॉठ्य न्यबर वँम्य वँड सपुद क्याह
 कुल्यन तय बेयि क्वलन तय आबुशारन
 पृछान गव पानु श्री राम सब्जारन
 पृछान गव कोस्मन, पोशन, ग्वलाबन
 पृछान गव बुलबुलन तय जानुवारन
 पृछान गव वति पद्यन तय द्रमनि कानुजन
 यपॉर्य मा म्यॉन्य सीता टॉठ वुछुवोन

पृछान गव हरनु कचिनुय छालु मारान
 पृछान गव रूस्य कटिनुय शोलु मारान
 अमा त्वहि मा साँ वुछवोन म्यॉन्य सीता
 यपॉर्य नेरान डींठ्यवोन म्यॉन्य सीता
 वॅरिथ जटु कलु यि श्री राम ओस ननु वोर
 अजोध्यायि ओस यस क्युत राजु सुंद दोर
 वनन मंज सुय छु वुन्यक्यन ज़न अभ्यागत
 पनुन्य त्रय छांडुनि द्रामुत राम बे सत
 पृछान वति मांछ तुलर्यन तु बोम्बरन
 पृछान, यिम आसु गरु क्युत काठ सोम्बरम
 अमा हे काँसि मा वुछ म्यॉन्य सीता
 यि म्यॉन्य मृगु नैनी अख रॉन्य सीता
 ब्यहान कुनि कनि पलस प्यठ बस दिवान च्यथ
 कुनुय च्यूह अज़ तॅमिस बासान वॅरी ह्यथ
 पृछान वावस, हतो वावो च़े मा पय
 च़े मा पय कॅह, मनस छुख चुय करान खय
 पृछान पां चादुरन त्वहि निश स्व मा बीठ
 वनन फेरान च़ेयन मा त्रैशि हन मीठ
 अमा ब्वछि मा लॅजिस कुनि अन्न कोरुन ना
 अमा कुनि जायि श्री राम तमि सोरुन मा
 स्व मा आँस तिछ ज़ि खसु मॅशिराविहे राम
 तॅमिस ओस राथ दूह ज़ेवि प्यठ अकोय नाम
 तॅमिस खद आसिहे चलुनुय मे त्रॉविथ
 अजोध्या त्राविहे कवु पोश छॉविथ

मे सुत्य अदु क्याज़ि तुलिहे यूत संकट
 वनन मंज़ रोज़िहे छावान तलुक प्यठ
 स्व सीता कुच स्वंदर कुच ज़ॉविज
 स्व सीता कुच न्यर्मल कुच ऑविज
 वनस मंज़ येति नु बेहनस किच ति चॉंगिज
 प्यवान छुम याद फेरान दुब मे वॉलिंज
 नु कुनि तिम राज़सी वस्त्र नु कुनि स्वख
 वनन मंज़ द्यल छि वस्त्र बेयि दूखय दूख
 यिहॉय सीता मे सुत्यन रात तय दूह
 खसान अकि बालु तय व्वलंगान दौयुम कोह
 अमा स्वय म्यॉन्य सीता आसि कति व्वन्य
 प्रक्रथ मा सॉर तस मँशरावि वति व्वन्य



सीतायि हुंद पय लबुन

छि छांडान बाँय दृश्य कुनि नु पय केँह
 पकान ब्रौह कुन दपान यियि ना समय केँह
 अँकिस जाये अमा यिम वाँत्य अति ओस
 जटायू प्रान त्रावान, वनतु कति ओस
 गोमुत छवकुलद यि ओस, प्रारान रामस
 अदय लबि पर्मुधाम, छारान रामस
 पृष्ठुस रामन यि क्या छुय हाल कोरमुत
 मे वन पोऒ पोऒ च़े क्याह छुय सदमु प्योमुत
 वोनुस फीरिथ जटायू हे कोरुम वँम्य
 कोरुम ख्वद्ध रावुनस सुत्य पर च़ँटिम तँम्य
 तँमी नियि माँज सीता च़ूरि बूऒिव
 वदान आँस हाय सीता होशि रूऒिव
 वनान यी अदु जटायू प्रान त्राँविन
 पनुन्य अँद्रम यिमन छवख पानु हाँविन
 पतव कोर पानु रामन तस नमस्कार
 द्युतुन तस दाह, तु कोरुनस रुत संसकार
 लँबिथ पय राम लक्ष्मन द्रायि ब्रौह कुन
 दक्षन कुन छाँडुने सीतायि ब्रौह कुन
 स्यठाह संकट तुलुख तय व्यगुन छाँविख
 वनन मंऒ कृत्य राक्षस नैदुरि साँविख
 कम्बंध राक्षुस यिमन समख्योव वति मंऒ
 वोनुख तँम्य किथु वँरिव तोह्य छारनुक संऒ

गॅछिव तोह्य ब्रॉठ पम्पास्वर नगर जान
 तँती स्वग्रीव वांदुर राजु आसान
 तँमिस सेना स्यठाह बलवान बूज़िव
 करन तिम रावुनस फून्यफान बूज़िव
 गॅछिव स्वग्रीव बनॉव्युन यार पनुनुय
 कर्यव सुय पूर अथुरोट तार दियि सुय
 पकान गॅय ब्रॉठकुन अख आश्रम आव
 अँती अख भीलनी, शिबरी तँमिस नाव
 स्व ऑस प्रारान यपॉर्य कर राम वात्यम
 तसुंद दर्शुन अकॉय बस कामना छम
 युथुय श्री राम ड्युंतुन बस शरन गॅय
 वुछुन युथ राम औतार तस परन पेय
 पनुन्य छेट्च बेर ख्योवुन भावुनाये
 पनुन सत्कार होवुन भावुनाये
 स्यठाह हर्शस गॅछिथ खेयि बेर रामन
 छेट्चुक श्रुच्युक व्यचारुनय शांत तस मन
 तिथुय अदु प्रान शबरी त्रोव बूज़िव
 अँचिथ अँग्नस स्वर्ग तमि प्रोव बूज़िव
 अत्यन नीरिथ पकान गॅय राम लक्ष्मन
 तु वॉत्य पम्पासरी नदि बॉय सत ज़न



यिथुपॉठ्य वोट
सरुवनंद प्रेमी सुंद वोनमुत कौशरि रलडरनुक
अरनुड कंड डरने वनवरस वरुतु अंद।



चूरिम बोग**किश्कंधा कांड / किश्कंधायि मंज****व्योठ पूठ व्यस्तार :**

पम्पासरोवर वातुन	१०४
स्वग्रीव सोज़ान हनूमानस सीता छांडुनि	१०६



चूरिम बोग
किश्कंधा कांड / किश्कंधायि मंज

पम्पासरोवर वातुन

युथुय यिम वॉत्य पम्पास्वर नगर जान
 तँती स्वग्रीव, तस सुत्यन हनूमान
 यि स्वग्रीव महात्मा ओस जान राजा
 अँमिस ओस वांदुरन हुंज भारु सेना
 अँमिस ओस बोय अख बॉली तँमिस नाव
 अँमिस ओस बॉलीयस वॉरुथ क्वट्चल भाव
 स्यठाह स्वग्रीव तंग ओस लाटु आमुत
 यि ओसा बोय तस, ओस शँथुर ज़ामुत
 यिवान कम ताम वुछिन येलि दूरि राजन
 दितिन वँन्य कम यिवान यिम योर आसन
 ग्वडुन्य सूज पानु स्वग्रीवन हनूमान
 वुछुख यिम कम छि आमुत्य दूरि फेरान
 अमा यिम बॉलीयन मा सूज्य, वुछतख
 यिमन क्याह सनु प्रयोजन वारु पृछतख
 हनूमान गव यिमन निश ताम वोनूनख
 कपॉर्य आमुत्य, गछुन कोत, नाव पृछुनख
 युथुय बूजुन यि गव राम पानु औतार
 अँमिस सुत्य बोय लक्ष्मन, ज़न लोबुन तार

कॉशुर रामायन - सरवानन्द कौल प्रेमी - देवनागारी कश्मीरी रूफ : म.क.रैना

परन प्योख दूश्वनी प्रनाम कोरुनख
 स्यठाह सत्कार कोरुनख, लोल बोरुनख
 नियन स्वग्रीवसुय निश राजु दरबार
 स्यठाह आदर यिमन वोत, लोल व्यवहार
 यिमन सीता अनुन्य छोरिथ यिहोय वख
 हुमिस वॉली छु मारुन, यस यिहोय दूख
 यिमव कोर पानुवन्य अथुवास बूज़िव
 सहायतस अख अँकिस लछ सास बूज़िव
 समय वोत वॉलीयस अदु राम वोतुय
 कोरुस वध रामनुय, बोड धाम वोतुय
 कोरुख अंतिम सन्सकार बॉलीयस जान
 बन्योव स्वग्रीव किशकंध राजु सन्मान
 बनोवुख सुत्य अंगुद राजु कोमार
 तु तारा छय करान सत्कार, व्यवहार
 यिथय पॉठ्यन यपॉर्य वँहराथ आमुच
 क्वलन, नँदियन दशा बुकु बारु गॉमुच
 बिहिथ ऑस्य राम लक्ष्मन दूर ग्वफि मंज
 ह्यवान सीतायि छंडुनुक नोव करुन संज
 युथुय वँहराथ म्वकुलेयि रुत समय आव
 नँवी सामानु करुनस लोग चलेजाव
 ह्योतुख स्वग्रीवसुय मशवरु स्यठाह जान
 तु राजन ब्रौठकुन अदु ओन हनूमान



स्वग्रीव सोजान हनूमानस सीता छांडनि

दोपुस स्वग्रीवनय छुख वीर संतान
 पवन सत छुख च्छुख पॅज्य पॉठ्य हनूमान
 च्छे छुय श्री रामु सुंद अनुग्रह पज़र बोज़
 च्छु छुख बलवीर थोद सार्यन ज़बर बोज़
 च्छु व्वथ कड पानु व्वन्य सीतायि हुंद पय
 मे छुम नेश्रय च्छे सपदी अथ अंदर ज़य
 युथुय व्वन्य नेरिहे अति वीर संतान
 तिथुय श्री रामनुय रोट अदु हनूमान
 पनुन्य वॉज रामनुय वॅरुनस हवालया
 तु वौनुनस नेर छांडान रुति खयालय
 युथुय वुछहन च्छु सीता वॉज दिज़ि तस
 तॅमिस यियि पछ तु यियि तस वार वनुनस
 पतय स्वग्रीवनय सोम्बुरॉव्य वांदर
 देशायन सारिनय सूज़िन बराबर
 छि छांडान राथ दूह वांदर च्वपॉरी
 लोबुख नय कुनि ति पय न्यराश सॉरी
 अमा समख्यव यिमन वृद्ध ज़ामवंत जान
 वुछिन न्यराश सॉरी बैयि हनूमान
 वौनुन अदु क्याह हनूमानस वुछान छुख
 च्छे ऑशीर्वाद रामुन कवु छ्वकान छुख
 च्छु छुख बलवीर वाती कुस च्छे वनतम

पराक्रम चोन त्यूताह अदु कम्पुक गम
 छि नीमुच रावनन लंकायि सीता
 चु व्वठ दिथ सागुरस तर वन छे कथ क्याह
 ह्यकख चुय बस वॅरिथ युथ कार पॅज्य पॉठ्य
 लगी च़े सागुरस पोज़ तार पॅज्य पॉठ्य
 चु व्वथ नेर व्वन्य मु कर कॅह च़ेर जानय
 च़े छुय सुत्य राम पोज़ भगवान पानय
 अंगद द्राव सुत्य वांदर द्रायि सॉरी
 हनूमान द्राव यामथ आयि सॉरी
 सु यामथ वोत अदु सागुरस बॅठिस निश
 नज़र त्राँवन गॅयस अँद्री सथाह हिश



यिथुपॉठ्य वोत
सर्वानंद प्रेमी सुंद वोनमुत काँशरि रामायनुक
किश्कंधा कांड याने किश्कंधायि मंज़ लँड अंद।



पाँचिम बोग
सुंदर कांड / स्वंदर वार्ता

व्योठ पूठ व्यस्तार

१. हनूमान द्राव सीतायि छंडुनि	१०९
२. हनूमान लंकायि मंज	१११
३. अशोक वाटिकायि अंदर	११२
४. हनूमान सीता सम्वाद	११४
५. लंका दहन	११५
६. हनूमानु सुंद लंकायि नेरुन	११७



पाँचिम बोग
सुंदर कांड / स्वंदर वार्ता

हनूमान द्राव सीतायि छांडुनि

ह्योतुन श्री राम सुंद नावा ज़बर पॉठ्य
सहायतस आयि ज़न तस सासु बँद्य टॉठ्य
पवन सुंद टोठ याम लंकायि कुन द्राव
खँसिथ आकॉश्य सुय गव ज़न चलान वाव
नबस दोरा करान गव सागुरस वोत
कँरुन नज़रा च्ववापॉर्य बस ज़लुय योत
समंदर छालु मारान गथ करान ज़न
अनेक सँद्रस अंदर तारख ज़रान ज़न
नु कुनि तारा नु कुनि ओस सोथ यिवान द्रींठ्य
नु कुनि ओस तार लबनुक वार कुनि ब्रूठ्य
स्यठाह गोस आश्वर करु क्याह हनूमान
रौटुन बस पानु हृदुयस राम भगवान
ज़पान गव राम अँदुरी पादि प्रनाम
ज़पान गव राम, रामुय, राम श्री राम
करान गव ध्यान मनि मंज़ रामु सुंद जान
थँविथ पछ दृढ अँथ्य अंदर सपदि कल्यान
गन्योस अँदुरी प्रयुक बाव रामु चँदुरुन

हृदय संबलिथ नोवुय व्पाय छोरुन
दिचुन क्रख ज़न कोरुन आलव नबस कुन
वोनुन श्री रामु म्याने ज़न बबस कुन
तुजिन व्वठ गव खँसिथ यकबार आकाश
अमा अँद्य पँख्य वुछुन बोड सिरिं प्रकाश
च्चर्पोर्य गँयि दूर गटु चँज ज़ांड यकबार
द्युतुस श्री रामुनुय अथ सागुरस तार



लंकायि मंज हनुमान

वुछुन यामथ पनुन पान जान स्वंदर
 प्रसन्न गव याम वोत लंकायि अंदर
 ह्योतुन सीतायि हुंद अँद्य पँख्य कडुन पय
 नेबुर्य सीता अँदुर्य श्री रामसुय लय
 दिवान गव वँन्य स्यठाह नगरस च्वापोर
 वुछिन लंकायि स्वनु संज सास हथ पोर
 वुछुन बाज़र स्वंदर ज़न स्वर्गु दारा
 वुछिन वोसु द्रोस च्वापोर कारुबारा
 वुछिथ सोरुय नेबुर्य ओसुस अँदुर्य द्वख
 दपान ओस कति लबन सीता बल्यम छ्वख
 बे-शूक्य पॉठयन अचान गव राज़ दारन
 मंदोर्यन जायि जायि द्राव छारन
 लोबुन नय कुनि ति पय मातायि हुंद कांह
 हुरान गोस द्वख दपान नय छ्वख बल्यम ज़ांह
 कडुन छुम पय मे अज़ सीतायि हुंद पूर
 अदय गछि म्योन संकट तय यि द्वख दूर
 कुल्यन खोत, बागु पतु गव बाग छंडान
 छँडिन कम कम सुमीर गव नाग छंडान



अशोक वाटिकायि अंदर

दिवान छोह जायि जाये कोत सना गव
 अशोक वाटिक कपी वॉतिथ अमा प्यव
 फ्रखा त्रोवुन व्यचारस मंज सॅनिथ गव
 वुछिन बागस अंदर प्रथ तरफु ज़न रव
 लंजन फिर्य फिर्य वुछान पोशन हुंदुय गाह
 वुछुन अथ वाटिकाये तीज़ वाराह
 च्वपॉर्य फीरिथ पतव वोत जान जाये
 कुलिस प्यठ पानु ब्यूठ क्याह लोलु त्राये
 स्यठाह गोमुत न्यराश क्याह हय हनूमान
 मनस मंज तोति ओसुस राम भगवान
 च्यूहा गव अँछ वॅटिथ गव ध्यानसुय मंज
 ह्योतुन व्वन्य छांडुनुक बेयि नोव करुन संज
 अमा यकबार ब्वन त्रॉवुन नज़र याम
 वुछिन क्वसु ताम शूकस मंज बिहिथ ताम
 अँमिस ब्रॉह कनि व्वदुन्य ऑस ब्याख क्वसुताम
 करान गॅजगाह दिवान तस पादि प्रनाम
 यि ऑस सीता करान संज गालिहे प्रान
 यि छांडान अख त्योंगुल युथ ज़ालिहे पान
 व्यदाख दी दी गॅमुच ऑस तीच न्यर-आश
 च्वपॉर्य अंधकार ओसुस कुनि नु प्रकाश
 नु तति श्री राम नु कुनि ओस पानु भगवान

तुलिथ अँन्य रावुनन कति व्वन्य यी ठीकान
 अँछव ओश हॉर्य हॉर्य सागर खँसिथ आस
 दपान श्री रामसुय कुन कोनु जुव द्रास
 स्वरान यी राथ तय दूह ऑस सीता
 करान यी राथ तय दूह ऑस सीता
 समय क्याह ! याद स्वनु सुंज़ वॉज पॉवुन
 खँनिथ श्री राम यथ ओस ब्वन स्व त्रॉवुन
 अमा यकबार सीतायि आश्वर गव
 त्योंगुल जॉनिथ दिचुन थफ ज़न लोबुन रव
 वुछिन यामथ यि स्वनु सुंज़ वॉज नाँपान
 त्योंगुल अपजुय, यि किथु पॉठ्य आयि काँपान
 वुछुन याम अथ खँनिथ श्री राम सुंद नाव
 वचन अँछ मीठ्य वँर्यनस अख सतुक बाव
 वँरुन अथ जाय हृदयस लोल बोरुनस
 अँदुर्य मनु किन्य दयस प्रनाम कोरुनस
 नज़र ह्योर कुन वँरुन अस्त्वथ दयस कुन
 पेयस दृष्टी अमा अति वांदुरस कुन
 स्यठाह गोस आश्वर वांदुर वुछुन याम
 अमा कति वॉज कति वांदुर तु श्री राम



हनूमान सीता सम्वाद

रछा खूचिथ मुदय अमि वांदरस गँड
 हनूमानन वनुन्य हेचुनस पनुन्य खँड
 बु छुस अख सीवखा अख रामु सुंद बोज़
 बु छुस श्री रामु सुंद दूत साविदान रोज़
 बु छुस पय कडनि आमुत यी पज़र मान
 बु सूजुस रामु चँद्रन, टोठ भगवान
 मु खोच माता बु छुस संतान चोनुय
 चु थव मन साविधान श्री राम सोनुय
 छु श्री राम चानि बापथ त्यूत व्याकुल
 मे दिम ऑगिन्या निमस शेछ वुनि मे छम सुल
 पनुन ड्यकृ टिकृ द्युतुन तस रामु दूतस
 दोपुस तमि पछ करी राम याम वनुहस
 हेचुन सीतायि ऑगिन्या अदु न्यबर द्राव
 तसुंद चूडामनी ह्यथ पानु सुय आव



लंका दहन

न्यबर नीरिथ दोपुन वुछहन ब्र लंका
 ब्र वुछहन रावुननुय स्वनु लॉक तु सेना
 ब्र निमु हॉ योर सुत्यन हाल सोरुय
 ब्र वुछहन रावुननुय लॉक सास पोरुय
 यि चाव फीरिथ ह्योतुन बागस करुन डास
 अशोक वाटिक तबाह वॅर्य वॅर्य कोरुन फास
 युथुय शेछ रावुनस वॉच गव परेशान
 यि क्युथ वांदुर अमा कति आव लारान
 ओनुख यामथ रॅटिथ सुय रावुनस निश
 हेचोख मारुन, विबीशनस गॅयि दया हिश
 युथुय पृछुनस च्च कुस छुख कोरु आमुत
 छु स्वग्रीव राजु येति छुस तोरु आमुत
 ब्र छुस तॅम्य दूत त्वहि निश सूजमुत योर
 ब्र छुस ना वुछनि आमुत लॉकि हंघ पोर
 स्यठाह येलि वाद विवाद रूद सपदान
 दोपुख अदु रावुनन मॉर्यून हनुमान
 त्युथुय ह्योत बेयि विबीशनन ज्ञान सारुन
 छु आमुत दूत बॅनिथुय लागि नु मारुन
 पतव लाकन यि दूतस लचि द्युतुख नार
 सॅमिथ सार्यव वॅरुस दरबारु मंजु लार
 त्युथुय द्राव दूत अति तय फ्यूर नगरस

दिवान गव नार अति पदि पदि सु शहरस
मकानन तय मंदोर्यन बेयि गरन नार
हनूमान गव दिवान दार्यन बरन नार
च्चर्पोर्य वोथ हुय तु लंकायि सूर सपद्यव
यि केंछा ओस प्रथ जायि सूर सपद्यव
हनूमानस फिकिर लॅज वाटिका गव
सु सीता वुछनि वॉतिथ ताम ओत प्यव
वुछिन सीता कुनी जॅन्य वारु कारय
अमी आव वुछनि तस दूत बेयि दुबारय
वोनुन सीतायि बेयि अँस्य योर वातव
चु त्राव शूक राम ह्यथ अँस्य सॉर्य वातव



हनूमानु सुंद लंकायि नेरुन

कोरुन प्रनाम सीतायि बेयि सम्मान
 तु द्राव सागर कुनुय अदु क्याह हनूमान
 युथुय वोत सागुरस प्यठ ज़न ग्रज़ान आव
 वेंरुन छेतु लॅट तु आकॉश्य वुडान आव
 यपॉर्य वांदर जमाथा ऑस थारान
 अमा यियि कर हनूमान ऑस्य प्रारान
 वुछान ऑस्य सॉर्य वांदर हर्श प्रोवुख
 युथुय आकॉश्य यिवान तॅम्य पान होवुख
 स्योदुय स्वग्रीव ह्यथ आव रामसुय निश
 नॅवुय शोछ ह्यथ सु अदु चाव रामसुय निश
 पतव श्री रामसुय अदु हाल बोवुन
 हनूमान वनुनि लोग सीतायि हुंद हाल
 द्युतुन ड्यकु टिकु तॅमिस सीतायि हुंद माल
 युथुय रामन यि वुछ सीतायि हुंद वस
 स्यठाह शूकस अंदर गव राम बेबस
 पृछुनि लोग बेयि तु बेयि सीतायि हुंद तस
 स्व गॉमुच आसि न्यरबल, वनि ति तति कस
 हनूमानन वोनुस तस राम मनि मंज़
 तु बूज़िव व्वन्य स्व अननुच पज़ि करुन संज़
 युथुय बूज़ वांदुरव सौरुय समाचार
 कुनी क्रख गॅयि दोपुख अॅस्य सॉर्य तैयार

गछव अँस्य सॉर्य व्वन्य सीता अनून्य यूर्य
दिमव नार रावनून्य लंका करव सूर्य
पतव स्वग्रीव वनान गव रामु चँद्रस
तैयॉरी अँस्य करव लंकायि तरुनस
निमव सेना करव य्वद्ध रावनस सुत्य
अनोन सीता छि अँस्य येति वीर तिथ्य कृत्य



यिथुपॉठ्य वोट
सर्वानंद प्रेमी सुंद वोनमुत काँशरि रामायनुक
सुंदर कांड याने स्वंदर वार्ता अंद।



शुयलड डुग
लंका कलंड / लंका वेङुे

वुुठ डुठ वुुसुतर :

१.	रलवुनुनल डुरुकु	१२०
२.	रलडु डुँदुरुन सुड सुुथ	१२ॡ
३.	रलवुनुनुड डुल	१२ॡ
ॡ.	रलडु सुंघ वुललड तु हनुडलनु सुंङु	
	संङुवलन डुुडु अनुनुड	१२ॢ
ॡ.	दुडलरु वुवुदुड तु लंका वेङुे	१३२
ॢ.	सुुतलडुल हुंङु अगुनु डुरलकुषल	१३ॡ
ॣ.	वनवलस डुवकुलुडुव	१३ॣ



शेयिम बोग
लंका कांड / लंका वेजे

रावुननि द्रोक्

पतय स्वग्रीवनय सोम्बुराँव्य साँरी
करुनि लँग्य साँर्य व्वन्य गछनुच तैयाँरी
स्व सेना वांदुरन हुंज, आयि साँरी
कलन चुनि रुख वँरिथ अदु द्रायि साँरी
कोरुख लंकायि गछनुक प्रन बराबर
तु श्री रामस परन पेयि साँर्य वांदर
ग्रजान शोला करान बे वायि लारान
तु सेना वांदुरन हुंज ग्रायि मारान
पकान गँय ब्रौह पकान, ब्रौह कुन बराबर
तु वाँत्य तोत येयि यिमन बुथि आव सागर
अँती प्यठु राँत्य रातस नाद लायान
ग्रजान शोलान तु रातस शेंख वायान
यपाँर्य पय वांदुरन हुंद रावुनस लोग
अमा मंत्री पनुन्य सोम्बुरावुनस लोग
अँनिन साँरी त्युथुय दरबार लोगुन
स्यठाह बलवीर, स्यठाह दमदार लोगुन
दोपुन सार्यन रटोख अँस्य साँर्य वांदर

यिमन सुत्य राम लक्ष्मन ख्वद्ध बराबर
 बु छुस रावुन दोयुम जगि कांह मे ह्यु छा
 कर्यम क्या राम तय वांदर करन क्याह
 छु कुस स्वग्रीव, छि कम कम यार तँम्यसुंद्य
 मह्यन हुंद्य पॉठ्य छी दिलदार तँम्यसुंद्य
 तैयॉरी व्वन्य वॅरिव, तैयार रूजिव
 करुन ख्वद्ध रामसुय, हुशयार रूजिव
 मे छम सेना मे छिम बलवीर सुत्यन
 बु छुस इंद्राजु अँद्य अँद्य वीर सुत्यन
 छे क्या कथ वांदरन करु नाश पानय
 छु कुस, रामस अनस बो गाश पानय
 अमा दरबारु मंजु थोद वोथ विबीशन
 वोनून बाँयिस चु पॅज्य पॉठ्य राजु राजन
 चे छय ना साँ खबर छुय राम औतार
 तँमिस सुत्यन लडुन छुनु जान व्यस्तार
 सु छुय भगवान पानय योर आमुत
 सु दशरथ राजुसुय औतार ज़ामुत
 तँमिस वांदर छि सुत्य सेना स्पठाह जान
 तँमिस सुत्य ख्वद्ध करुन छुनु जान गछि हां
 यि बूजिथ रावुनस खोत क्रूध वारा
 दोपुस तँम्य छुम करुन ख्वद्ध छुम नु चारा
 ग्रजुन ह्योत रावुनन थोद गव वॅथिथ सुय
 दोपुन बाँयिस मे वनतम राम कुस छुय
 छु नैश्रय यी तु असि ख्वद्ध वाति करनुय

यिमन व्वन्य वांदुरन अज़ आसि मरनुय
 विबीशन बेयि करान गोस ज़ारुपारय
 स्यठाह व्यनुती करान गोस बेयि दुबारय
 वोनून बाँयिस वॅर्यूस सीता हवालय
 दयावान राम छुय गछि कालु कालय
 करख ख्वद्ध म्यानि बाये सूर सपदी
 च़े काह शथ पोर जाये सूर सपदी
 यि लंका साँन्य लंका कुनि नु रोज़ी
 खबर छा पानु श्री राम कोर सोज़ी
 स्यठाह कोर रावुनन अपमान बाँयिस
 न्यबर नीरिथ दोपुन गछि हान बाँयिस
 च़वतुर-वेदी तु शठ शास्त्री यि रावुन
 अहंकार ओस तस क्याहताम हावुन
 विबीशन वोथ तु बेयि दूह द्राव सुबुहय
 समंदर लाँगिथुय तोर आव सुबुहय
 गवडुन्य समख्योव स्वग्रीवस विबीशन
 तँमी न्युव रामु च़ंद्रस निश सु सत ज़न
 विबीशन रामु च़ंद्रस अदु शरन गव
 स्यठाह ज़ॉरी वॅरिथ अदु तस परन प्यव
 पनुन्य बो बाँय बांधव त्रॉविथुय आस
 अकॉय आशा बु चॉनी थॉव्यथुय आस
 शरन आमुत बु छुस ना दास चोनुय
 दयावान छुख च़ु श्री राम वास म्योनुय
 शब्द बूज़िथ हर्श गव रामु च़ंद्रस

रोटुन अदु नालु मति पोज़ लोल बोरुनस
ओनुन लक्ष्मन वोनून तस वांदुरन वन
छु व्वन्य लंकायि हुंद राज़ा विबीशन
ओनुख ज़ल सागरुक अभिशेक कोरुहस
तु सारिवुय वांदुरव जयकार पोरुहस



रामु चँदरुन सुम सोथ

स्यठाह थँद्य शिल्पकाँरी नील तय नल
 यिमन दून सोथ गंडुन, पोज़ ओस त्युथ बल
 ह्योतुख सँद्रस गंडुन सोथ वांदरव जान
 अन्यख अदु शेलु तय परवत पलव सान
 तिमन ओस सारिनय श्री राम श्री राम
 नज़र वँर रामु चँद्रन ओस अभिराम
 बँनिथ गव रामु चँदरुन सोथ स्यठाह जान
 हर्श गव सारिनय प्रोवुख थज़र मान
 ग्वडुन्य तोर पानु श्री राम पानु भगवान
 तु पतु पतु तोर विबीशन सत ज़ना जान
 पतय स्वग्रीव तु सेना साँर लारान
 तु वांदर नाद लायान, छालु मारान
 तु यामथ वीर वाँत्य लंकायि साँरी
 बँठिस प्यठ सागुरस निश आयि साँरी
 अँती ठीकानु द्युत अदु रामु चँद्रन
 अँती प्रारेयि सेना साँर्य सत ज़न
 युथुय पय वांदरन हुंद रावुनस लोग
 त्युथुय गव गीर अदु ज़न तावुनस लोग



रावनुन्य छल

ह्योतुन अदु गुपचरन हुंद ज़ाल वाहरुन
 पनुन्य किन्य वांदुरन क्युत काल वाहरुन
 हेतिन अदु शूर सोज़ुन्य वीर सोज़ुन्य
 तु वांदुरन मारुनस बलवीर सोज़ुन्य
 स्यठाह कोर छल कपट अँम्य रावुनन कूत
 सफलता कुनि नु तस गँय साविदान त्यूत
 वँरिन छल बल ति काँत्याह हान सपज़ुस
 अहंकारन वँडुस छठ, वान सपज़ुस
 दोपुन कँचन गँछिव तोह्य राम मॉर्यून
 तँमिस सुत्य बोय लक्ष्मन तारु तॉर्यून
 युसुय अख वांदुरन निश ओत यिवान ओस
 सु हॉरथ पॉन्य पानय वेह ख्यवान ओस
 स्यठाह गव रावुनस दुख क्याह करव व्वन्य
 कपॉर्य किन्य रामु संज़ सेना हरव व्वन्य
 यपॉर्य बूज़ याम सीतायि रामु सुंद पय
 स्यठाह शूकस अंदर गँय सपदि कर ज़य
 अँमिस रावुन वनान ओस ओर तय योर
 करान ओस छल कपट कारस अपुज़्योर
 अमा गँयि त्रय विबीशनु संज़ अँमिस निश
 द्युतुन सीतायि दॉर वँरुनस सथा हिश
 दोयिम दूह वोत अंगद सूज़ रामन
 दोपुन तस रावुनस वन श्वद्ध करुन मन

दपुस सीता अनुन यूर्य वारु कारय
 अनुहन नय सूर गछि लंकायि यारय
 अंगद गव आव फीरिथ हाल बोवुन
 तु रामस ब्रौठु कनि अहवाल त्रोवुन
 तु बेयि दूहु वांदुरव यलगार क्याह कोर
 तु लंकायि जायि जाये वार क्याह कोर
 स्यठाह लोग क्रूर ख्वद्ध अदु फान सपद्योख
 तु लंका वॉसियन क्याह हान सपद्योख
 स्यठाह लूख मारु गॅयि लंका वुजारय
 करान गॅय ज़ोर वांदर बार बारय
 क्वलन जोयन अंदर गव रक्त जॉरी
 तु हाहाकार, क्रकुनाद बस च्वपॉरी
 स्यठाह बेवायि राक्षस मारु क्याह गॅय
 अख अँक्यसुंद रूद कति ऑखुर यिमन पय
 अमा राक्षस त्रयव क्रकुनाद क्याह कोर
 ख्रंज़ान गॅय मस तु अशि सुत्य सागर तिमव बोर
 करान कैह रावुनस ऑस्य ज़ारु पारय
 दपान ऑसिस करख ना सोन चारय
 च़ु बोज़ सोन रामु चँद्रस दिन च़ु सीता
 तु योरय वारु पॉठ्यन निन च़ु सीता
 क्षमा करि पाफ़ चोनुय पानु श्री राम
 छु श्री राम पानु भगवान सुय परम धाम
 तँमिस सुत्य ख्वद्ध करुन बस हान ऑखुर
 तु यथ लंकायि सॉरिसुय फान ऑखुर

सु रावुन वुठनु आमुत ओस पाँपी
 तँमिस ब्वध रॉवमुच्र ऑस, ओस शॉपी
 मरुन तस रामु सुंदि अथु ओस लीखिथ
 गछुन लंकायि नाश ती गोस लीखिथ
 तँमिस सॉरी पोथुर मूद्य अथ ख्वद्धस मंज़
 तँमिस वीर ज़िंदु कति रूद्य अथ ख्वद्धस मंज़
 तँमिस बोय रावुनस अख क्वम्बुकरुन ओस
 श्वंगान युस शेन र्यतन अदु सुय मरन ओस
 सु यामथ वांदुरन सुत्य करनि ख्वद्ध द्राव
 स्यठाह बलवीर ज़ॉनिथ ब्रॉह पकान आव
 अकोय तीर लोय रामन क्वम्बुकरुन मूद
 छ्योनुस कलु रथ वसान धरती प्यठन रूद
 पतय आव मेगनाद ज़न पानु रावुन
 ह्योतुन वीरन पनुन बल, ज़ोर हावुन
 अमा अख तीर लोयुन, प्यव यि लक्ष्मन
 अँमिस गँय मूरछा, प्यव पथर सत ज़न



रामु संद्य व्यलाफ तु हनूमानु संज संजीवन बूटी अनुन्य

युथुय लक्ष्मन पथर प्यव राम निशि आव
 अत्यन गव चस, हनूमान अँथ्य अंदर चाव
 वुछुन येलि पानु लक्ष्मन मूरछा तस
 अँमिस गव शूख वारा ज़न डोलुस ह्यस
 कोरुन पँहरा व्यचारा क्या करुन जान
 मे पज़ि नेरुन करुन कैह सोरि सामान
 हनूमानन तुलिथ ओन वाव पानय
 वोनुख तँम्य गछि संजीवन बूट्य जानय
 त्युथुय द्राव अदु हनूमान द्रोण पर्वत
 अनन बो बूट्य पानय अदु गछ्यम सथ
 परन प्यव रामु चँद्रस अदु हनूमान
 हेचुन ऑगिन्या मनस मंज़ राम भगवान
 बिहिथ गव पानु श्री राम लक्ष्मनस सुत्य
 वुछुन यामथ अँमिस गव व्वश बरान कुत्य
 अमा व्वन्य अर्द राथ गँय कोनु वुनि आव
 पवन सुत टोठ म्योनुय येति सुली द्राव
 तुलुन लक्ष्मन यि क्वछि मंज़ पानु ललुवुन
 रोटुन ख्वनि मंज़ पनुन टोठ लोलु सलुवुन
 यि दूख चोन म्यानि बायो, किथु ज़रय बो

स्यटाह रुत चोन स्वभाव क्याह परय बो
 पिता माता चै त्रॉविथ म्यानि बापथ
 वनन हुंघ दूख चै बूगिथ सानि बापथ
 अमा कोत गव सु अनुराग म्यानि बायो
 व्वथख ना थोद चु व्वन्य हे लक्ष्मनो हो
 मे योद आसिहेम खबर लक्ष्मनु चलख हाय
 वनन मंज़ टाठि कुन ज़ोन त्रावुहम वाय
 बु ऑगिन्या कति प्यता सुंज़ मानु हॉ ज़ांह
 मे योदुवय प्रान तामथ साविहे कांह
 यि परिवार, गरु तु बेयि दार बेयि बनान छुय
 तु बॉयिस रुस छु युस अदु क्या करी सुय
 यि ज़ॉनिथ म्यानि टाठ्यो थोद व्वथख ना
 अमा ज़गुतस अंदर बोय ज़ांह बनन छा
 छु यिथु पॉठ्य पखु चॅटिथ कांह जानवारा
 तिथय पॉठ्य छुस बु वुन्यक्यन अख आवारा
 अयोध्या वन तु किथु पॉठ्य गछु बु लालो
 चै रौस लक्ष्मनु मे वनतम क्याह मे हालो
 मे मा वनुनम अमा सीतायि बापथ
 पनुन बोय टोठ लक्ष्मन त्रोव अँम्य पथ
 मे छुम अपवाद चोनुय टाठि लालो
 चै छुय ना लोल म्योनुय टाठि लालो
 चु पनुने माजि हय संतान कुन छुख
 चु तँम्य सुंद प्रान आधार मान कुन छुख

अथस रँटिथुय मे कोरुनख तमि हवालय
 वनस क्या वनतु फीरिथ म्यानि लालय
 व्वतुर क्याह तस बु दिमु वन म्यानि लालो
 व्वथख ना थोद चलयम शूक म्यानि लालो
 स्यठाह शूकस अंदर गव पानु भगवान
 छु गालान शूक लूकन पानु नारान
 अमा गव पानु करूनाकर रँहिथ ज़न
 अत्यन साँरी समेमुत्य शूक सार्यन
 अँछन दार रामु चँद्रस ओश हरान गव
 स्यठाह द्वखुलद तु ज़ाँरी सुय करान गव
 वुछिथ वांदर कैह हाँरान क्याह गँय
 व्यलाफ श्री रामु संद्य बूज़िथ पथर पेय
 वुछान साँरी नबस कुन खून हारान
 अमा यियि ना हनूमान छालु मारान
 संज़ीवन बूट्य अनिहे हर्श बनिहे
 यि लक्ष्मन मूरछा युस शब्द वनिहे
 छु त्रावान व्वश वुछान आकाश श्री राम
 दपान करु क्याह हनूमान कोनु वुनि आव
 अमा वाँतिथ हनूमान बस त्युथुय प्यव
 द्वखस शूकस अंदर अदु पोज़ हर्श गव
 युथुय वाँच बूट्य तामथ रँट स्व वाँदन
 त्युथुय वाँदन स्व पानय ख्योव लक्ष्मन
 अमा तत्काल लक्ष्मन आव होशस
 हुर्यर सेनायि गव यकबार जोशस

त्युथुय लक्ष्मन दुबारय थोद वॅथिथ गव
त्युथुय श्री रामसुय पादन परन प्यव



दुबारु ख्वद्ध तु लंका वेजे

ह्योतुन बेयि ख्वद्ध करुन तय बान चोरुन
 तुलुन अख तीर तय मेगनाद मोरुन
 यि बूज़िथ रावुनस डॅल्य होश सॉरी
 दिवान बारव छि सॉरी हय च्वपॉरी
 वोनुन व्वन्य पानु गछु बो राम मारन
 करस सेना बु नाश आकाश खारन
 स्यठाह लोग गूर ख्वद्ध ऑखुर यिमन दून
 छु अकि पॉर्य राम तय बेयि पॉर्य रावन
 समय वोत ऑखुरस ख्वद्ध ज्यून रामन
 तु किथु पॉठ्य दयि सुंदे अथु मूर रावुन
 हुपॉर्य मंदोदरी कॅर्य लाफ व्यलाफ
 अमा ओसुम मे क्याह सनु जन्मुकुय शाफ
 छु पॅज्य पॉठ्य राम श्री राम पानु भगवान
 छु अॅमिसुय अथि यि सोरुय मान अवमान
 ब्वद्धी नाशस गॅयम अदु सॉमीयस हाय
 अॅनिन सीता तुलिथ रॉवुस ब्वद्धी वाय
 विबीशन आव वुछुने बॉय सुंद शव
 तॅमिस ओश अदु तिथय जॉरी अॅछव गव
 दिलासा अदु द्युतुख श्री रामनुय क्याह
 वोथुरनख ओश तु वोनुनख ज्ञान वाराह
 कॅरुख अंतिम क्रिया तस रावुनस जान
 तॅमिस ओस मूक्ष करुनस पानु भगवान

पतव कोर राजु अभिशेक रामनुय जान
सपुद लूकन स्यठाह अदु श्वभ तु कल्यान
थोवुख क्याह राजु गदि प्यठ अदु विबीशन
धर्मवान तय कर्मवान राजु सत ज़न
वेजे लंकायि मंज़ सपदेयि रामस
च्वर्पोर्य जयकार गव सुबुहस तु शामस
ह्योतुन लंकायि जय जयकार सपदुन
च्वर्पोर्य श्री रामु सुंद सत्कार सपदुन



सीतायि हुंज अग्नी परीक्षा

पतव ओन नाद दिथ रामन हनूमान
 दोपुन राजस दियूस तोह्य ऑगिन्या जान
 अँन्यून सीता मे निश श्रंगार वँरिथुय
 वँन्यूस श्वभ सूचना म्यॉन्य लोल बँरिथुय
 अँनिख सीता युथुय श्री रामसुय निश
 वुछिथ यँचकॉल्य दृशुन्य गँयि सथा हिश
 कोरुन दर्शुन युथुय अमि शामु स्वंदुरस
 परन पेयि पानु सीता रामु चँद्रस
 अमा रामन युथुय नज़रा अँमिस वँर
 वुछिन सीता हरेमुच बरु गँमुच थँर
 हनूमान बेयि विबीशन सुत्य ऑसिस
 तिमन रुस बेयि ति सत ज़न कुत्य ऑसिस
 स्यठाह सीतायि अति सत्कार कोरुहस
 तु वांदर यिम ति अति ऑस्य लोल बोरुहस
 अमा रामन स्वीकार वँर नु सीता
 पनुन्य अँम्य टॉठ सीता वँर नु सीता
 वोनुन सीतायि रोज़ख चुय मे निशि दूर
 स्यठाह काल रावुनस निश तस मनस चूर
 मे वनुनम लूख किथु पॉठ्य रूज़ सीता
 अशोक बागस कुनी जँन्य ऑस ना क्या
 अमी किन्य किथु करथ बो वन स्वीकार
 खबर क्या छम च़े क्युथ तति रूद व्यवहार

परीक्षा चॉन्य कुनि रंगु योद नु आस्यम
 च्चु छख नेशपाप वनतम किथु मे बास्यम
 पनुन पान छुय च्चे ज़ालुन नारसुय मंज़
 च्चु कर व्वथ म्यॉन्य सुते व्वन्य अम्युक संज़
 अमा सीता यि बूज़िथ शडकिथुय गॅय
 तॅमिस अमि ज़ॉव्यजारुक ओस नय पय
 पतीवृत ऑस सीता मान सीता
 स्व ऑस पॅज़्य पॉठ्य न्यष्पाप जान सीता
 तिथुय अदु नार चंद्रनुक ज़ालुनय आव
 अॅथ्य अंदर चायि सीता नार नोन द्राव
 गॅडिथ गुल्य रामसुय सीता शरन गॅय
 स्वरान मनु किन्य स्व श्री राम तस परन पेयि
 गॅरा गॅयि नार छ्यतु गव पोशवुय सुत्य
 तु सीतायि स्वर्गु वस्त्र वलनु आयि कूत्य
 स्व दीवी, नारु मंज़ु गुलज़ार सपद्योस
 दयस निश तस सतुक व्यवहार सपद्योस
 पतीवृत द्रायि सीता नारु मंज़ु स्वन
 स्व ऑस न्यष्पाप दीवी तस ग्वनुय ग्वन
 यि डीशिथ आयि आकॉश्य हर्षु वर्षा
 च्चवपॉर्य कॅर देवताहव पोशि वर्षा
 पवित्र ऑस सीता द्रायि सीता
 स्व लॉगिथ स्वर्गु वस्त्र आयि सीता
 वुछिथ अदु ब्रॉठ पोक श्री राम पानय
 रॅटन त्रय नालुमति क्याह लोलु सानय

च्चर्पर्य कूर सारिवुय जयकार जयकार
हर्ष व्वलास बुथ्यन प्यठ आव यकबार
यि सीता राम, रामस सुत्य सीता
परन प्यॉख, जय करान र्गय कुत्य सीता



वनवास म्वकल्योव

तु अँथ्य सुत्य रामु सुंद वनवास म्वकल्योव
 वेजे लंकायि हुंद येति हास म्वकल्योव
 यपोर्य रामन विबीशन नाद दिथ ओन
 अयोध्या नेरनुक अँम्य पानु तस वोन
 पगाह वातुन अयोध्या आसि लारान
 भरत असि सारिनय तति आसि प्रारान
 नगर वॉसी करान विलुजार आसन
 गर्यन, च्यूहन करान शूमार आसन
 विबीशनन द्युत अँमिस पुष्पक व्यमाना
 कोरुन सार्यन स्यठाह सत्कार माना
 त्युथुय खोत राम सीता ह्यथ व्यमानस
 तुलुन अदु बोय लक्ष्मन सुत्य पानस
 स्यठाह वांदर ति खँत्य पुष्पक व्यमानस
 स्यठाह स्वंदर व्यमान खोत आसुमानस
 अयोध्यायि कुन सु यामथ द्राव व्यमान
 अथ अंदर अख प्रजा ह्यथ ओस भगवान
 च्वपोर्य जयकार बारंबार सपद्यव
 च्वपोर्य आकाशु जय जयकार सपद्यव
 यि म्योन जयकार बारंबार रामस
 छु आनंद सर्व आनंद तार रामस



यिथुपॉठ्य वोट
सर्वानंद प्रेमी सुंद वोनमुत कॉशरि रामायनुक
लंका कांड याने लंका वेजे अंद ।



सँतिम बोग**उत्तर कांड / अयोध्या फीरिथ वातुन****व्योठ पूठ व्यस्तार :**

१.	भरतजीयुन प्रारुन	१४०
२.	श्री राम वोत अयोध्यायि	१४४
३.	श्री राम सुंद राज़ त्यलख	१४८



सँतिम बोग

उत्तर कांड / अयोध्या फीरिथ वातुन

भरतजीयुन प्रारुवुन रोजुन

समय वोत रामु चँद्रन वाख वोन जान
 अयोध्या वातुनुक वोत वख हनूमान
 हनूमानस दोपुन दार मनशु रूफ नेर
 भरत छुय प्रारुवुन निस शेछ मु कर चेर
 अकोय दूह व्वन्य छु असि प्रारुन पज़्या ज़ांह
 अयोध्या असि छु वातुन फेरु अथ छा
 यपौर्य प्रारान भरत ओस च़िव सु गँज़ुरान
 दपान ओस कर वुछन बो राम भगवान
 नगर वॉसी वुछान आँस्य आरु वँक्त्य आँस्य
 दपान आँस्य राथ गछि ना, मारुमँत्य आँस्य
 स्यठाह स्वंदर नगर वॉसी करान ज़फ
 वुछोन श्री राम सफल सॉनी गछन तफ
 नच़ान सॉरी पृछान कर वाति श्री राम
 गरन मंज़ कांह ति नय रूद आँस ज़न लाम
 यपौर्य भरतस दोछिन्य अँछ फोरुने लँज
 दपान अँदुरी समय वोत राथ व्वन्य गँज
 अमा श्री राम वनतम कोनु आमय
 करान वोतुम अँज्युक ताम रामु रामय

छुसा बो यूत पाँपी हय कोरुम क्याह
 बु रूदुस दूर रामस हय फोरुम क्याह
 बु कोताह कर्महीन ओसुस मे क्याह गव
 बु रामस लीन ओसुस हय मे क्याह गव
 यि कोताह भाग्यवान ओस म्योन लक्ष्मन
 वॅरुन थफ रामसुय चर्नारब्बंदन
 अधम ओसुस बु कूताह त्रोवनस बो
 यिमन वॅरियन कन्यन कुन छोवनस बो
 यि दूह योदुवय गछ्यम नीरिथ करय क्याह
 यियम नय राम अदु व्वन्य बो सरय क्याह
 मे योद रोजन पनुन्य यिम प्रान सुती
 वुछन नय अदु करन धिकार कूती
 तिथय प्यव पानु वॉतिथ क्याह हनूमान
 सु ब्रह्मन रूफ दारिथ पानु भगवान
 वुछुन यामथ भरत होखुमुत, शिठ्योमुत
 बिहिथ सुय दर्बु गासस प्यठ रुन्योमुत
 वसान ओश दारि ओसुस श्रान सपदान
 स्यठाह स्वख क्या लोबुन अदु मन प्रसन्न गोस
 हनूमानन वोनस श्री राम आवुय
 तॅमिस सुत्य माँज सीता छय, यिवान छुय
 छु लक्ष्मन सुत्य तस आमुत प्रसन्न रोज
 यिहॉय शोछ ह्यथ बु आमुत यी पज़र बोज़
 यि बूज़िथ दूख तॅमिस चोल बेयि फोलुस मन
 अमा अँक्य त्रेशि हँत्य अमृत लोबुन ज़न

हनूमानस वोनुन छुख कुस मे वन पूर
 चु कति प्यठु आख पोज वन शख गछ्यम दूर
 पवन सुत छुस तु छुस ना बुय हनूमान
 बु छुस सीवक मे छुम श्री राम भगवान
 यि बूजिथ वोथ भरत थोद माय बँरुनस
 रोटुन क्याह नालुमति थँज जाय वँरुनस
 वुछुन अदु पानु ज़न श्री राम भगवान
 कोरुन दर्शुन वुछुन यामथ हनूमान
 पृछान रूदुस अकॉय कथ बार बारय
 मे वन सीता तु राम छा वारुकारय
 शरन रामस परन प्यव अदु हनूमान
 वँरुन ग्वन कीर्तन श्री रामु सुंज जान
 भरत लोग पृछनि तस अदु बस अकॉय कथ
 बु मा मँशिरोवनस रामन मे वन सथ
 स्यठाह छुख टोठ रामस पोज चु यी मान
 मनस मंज छुख चु रामस प्रान चुय प्रान
 वँनिथ यी द्राव अदु फीरिथ हनूमान
 च्वपॉर्य गँयि प्रथ गरस क्रख आव भगवान
 गँछिथ हर्षस भरत बूजिथ समाचार
 नगँर कुन द्राव पानय करनि जयकार
 अमा तेलेयि कथ अज वाति श्री राम
 नगँर वॉसी ल्वकुट्य बँड्य द्रायि लँज लाम
 हेचुन मंदुरन अंदर घंटा वज़ुन्य जान
 च्वपॉर्य गँयि प्रथ गरस क्रख आव भगवान

पृछुनि लॅग्य अख अँकिस सॉरी यिहॉय कथ
चै मा वुछतन अमा भगवान वन सथ
अवधपूरी स्यठाह अदु शूब्रॉवुख
स्यठाह स्वंदर वॅरिथ श्रंगार थॉवुख
च्ववापॉरी बंदन वारव सजॉवुख
वतन कोचन स्वगंध प्रथ शायि त्रॉवुख



श्री राम वोत अयोध्या

त्रयव हेत्य सारिवय वनुवन्य स्वंदर गान
 गरन दारन अंदर ओस पूर कल्यान
 दिवान गॅय नज़रु यियि कर पानु श्री राम
 वुछेन कर पानु नेत्रव व्वन्य सु श्री राम
 वुछान साँरी अमा आकाशसुय कुन
 गॅछिथ हर्षस वसान ओश दारि ब्वन कुन
 यिवान तामथ वुछुख नबु पेठ्य व्यमाना
 स्यठाह हर्षस अंदर गॅय रुत समाना
 अमा यामथ व्यमान वोथ वारु वारय
 न्वबर नगरस निशे धरती करारय
 चॅसिथ अदु भरतसुय सुत्य आयि साँरी
 करन श्री रामु दर्शुन, द्रायि साँरी
 वुछुख यामथ न्यबर द्रामुत यि श्री राम
 धनुशदौरी व्वदुनि लूकव वुछुय ताम
 वशिष्ट महाराज ग्वडुन्य आव रामसुय कुन
 परन प्यव राम गवरुसुय शांत साँपुन
 पृछान गव शेछ खबर सार्यन ज़बर जान
 मुन्यन बेयि ब्रह्मनन ब्योन ब्योन सु भगवान
 पतय यामथ भरत पादन परन प्योस
 वुछिथ श्री राम अदु ज़न सुय मुहिथ गोस
 रॅटिन श्री रामु सुंद्य रचनारब्यंद जान

अँछव अँश्य दार लँज तस म्यानि भगवान
 पतव तुल पानु श्री रामन भरत थोद
 तु द्वशुन्य ओश अँछव वोथ सारिवुय वोद
 युथुय लक्ष्मन तु शत्रुगन ति ब्रौह आव
 वँरिथ दर्शुन तिमन ज़न जुव नोवुय चाव
 परन पादन प्यवान गँय वारु वारय
 भरत सीतायि पादन प्यव दुबारय
 वुछान सॉरी च्ववापॉर्य राम श्री राम
 प्यवान पादन करान जयकार ह्यथ नाम
 युथुय माजव ति बूज तिम आयि लारान
 तु कोशल्यायि सुत्य सारेय आयि दोरान
 छि आसान छ्यनु गॉमुत्य वँछ्य कामधीनन
 तिथय ज़न छ्यनु गोमुत ओस राम माज्यन
 वुछिथ वँछ्य कामधीन लारान यिवान ताम
 तिथय लारान यिम आयि युथ वुछुख राम
 वुछिथ रामस अमा हर्षस स्यठाह गँय
 रोदुख राम नालुमति सार्यव लँबुख ज़य
 वनव कोताह प्रसन्न गँयि कूत सॉरी
 वुछान फिर्य फिर्य चलान छेख बे-करॉरी
 कोशल्य बेयि सुमित्रा ब्रौठ कुन आय
 तिमन ओस बोस फोटमुत अदु पँटिथ द्राय
 स्यठाह शरमंदुगी कैकी अमा ऑस
 यिनस ब्रौह कुन तँमिस लज़्जा हना ऑस
 युथुय माज्यन समुख संतान लक्ष्मन

त्युथुय पादन यिमन प्यव पानु सत ज़न
 तु कैकी निशि सु पानय आव लारान
 रँटिन तस पाद ज़न ओस माजि गारान
 वँरुख माज्यव स्यठाह ऑही सरासर
 तु माज्यव योरु रोट आदर बराबर
 यपौर्य सीता हश्यन अकि अकि परन पेय
 तिमन निश पानु ऑही पँज़ रटन गँय
 वँडिथ आलथ यिमन अदु पूर दर्शुन
 कौरुख अदु त्रेनुवयी अति पोशु वरुशुन
 अयोध्या ज़न यिहॉय स्वर्गापुरी पोज़
 च्वपौर्य नाना प्रकौर्य गायन हँरी बोज़
 करान गँय सौर्य दर्शुन रामु सुंद जान
 नगँर वॉसी वुछान गँय राम भगवान
 पतव यामथ पनुन गरु आव श्री राम
 ग्वडुन्य कैकी निशे अदु च़ाव श्री राम
 वुछिन कैकी लज़्ज़ा ऑस तस हना ज़न
 अमी गव तस निशे ग्वडु पानु भगवन
 पतव अदु च़ाव निज भवनस अंदर राम
 बन्योव अदु सौरिसुय अति पूर स्वखदाम
 युथुय पतु पानु श्री राम च़ाव मंदुरन
 वशिष्ट महाराज तँमिस सुत्य आयि ब्रह्मन
 स्यठाह गँयि सौर्य हर्षस तीज़ प्रोवुख
 नोवुय अख पानु सिंघासन सजोवुख
 पतव सिंघासनस प्यठ ब्यूठ श्री राम

च्चर्पर्य गव ज़ोरु जय जयकार अभिराम
वशिष्ट जीयन वोनुख ब्रह्मन छि सॉरी
वॅरिव व्वन्य राज़ अभिशेकुच तैयॉरी



श्री राम सुंद राजु त्यलख

अवधपूरी स्यठाह स्वंदर बनोंवुख
 रंगा रंगी बंदन दारव सजॉवुख
 च्वपॉर्य ओस ज़न स्वर्ग रुत ओस दर्शुन
 करनि लॅग्य देवता नबु पोशि वर्शुन
 रॅतन-दीप ह्यथ अथन क्यथ ऑस्य सॉरी
 च्वपॉर्य अदु पोशु वर्शुन गव यि जॉरी
 अॅनिख सीवक करान गॅय श्रान सॉरी
 ह्योतुन व्वतुसव गछुन आरम्भ तैयॉरी
 भरत करुनोव रामन पानु अदु श्रान
 जटा अदु शीरुनस स्वंदर स्यठाह जान
 तु सॉरी बॉय अकि अकि ब्रॉठ कुन आय
 छुनिथ नाना प्रकॉर्य वस्त्र छॅलिथ द्राय
 हशव सीता त्युथुय अदु पानु पॉरॉव
 रंगारंग वस्त्रव सुत्य पानु वस्त्रॉव
 अॅमिस नाना प्रकॉर्य भूशन छुनिख नॉल्य
 च्वपॉर्य जयकार गव आकाश पातॉल्य
 तु श्री राम आव पुरिथ अंग अंग तु वस्त्र
 तु लॉगिन दिव्य भूशन दिव्य अम्बर
 वॅसिथ आकाशु सॉरी दीवता आय
 करान गॅय पोशु वर्शुन पूर पॅज़ माय
 सिंघासन दिव्य स्वंदर शूबि सानुय

तु अथ प्यठ ब्यूठ भगवान राम पानय
 खोवर्य सीता दँछिन्य किन्य बॉय सॉरी
 हनूमान ब्रोंठु कनि पतु दीव सॉरी
 ह्योतुन अदु वीदु मंथुरव ग्रज़ व्वथुन ताम
 परनि लॅग्य सॉर्य अदु श्री राम श्री राम
 ह्योतुन आकाश ग्रज़ुन जयकारवुय सुत्य
 करान अँड्य पोशि वरुंन आरती कुत्य
 त्यलक आव राज़सी हुंद करनु रामस
 वुछिथ दृश्य वॉत्य ज़न सॉर्य परमु धामस
 भरत, लक्ष्मन तु शत्रुगन अँती सॉर्य
 अथन क्यथ छँत्र च़ामर पोशि गँद्व बॉर्य
 मुकट जॅर्य जॅर्य अंगद तय बेयि हनूमान
 कपी सॉरी अत्यन स्वग्रीव तु भगवान
 छोटिस मंज़ बोज़ अति ओस हर्ष व्वलास
 यिवान प्रथ तरफ़ अति ओस स्वरगुनुय भास
 च्वर्पोर्य जयकार ग्रज़ प्रथ तरफ़ जय जय
 यसंज़ गंधर करान गायन अकॉय लय
 नच़ान आकाश वछु ब्वन अप्सराये
 तु जय जयकार करुवुनि जायि जाये
 यि श्री राम सोन श्री राम पानु औतार
 छु ज़गुतस पानु आमुत करनि व्वधार
 शरन युस भक्त ज़न गव रामसुय जांह
 तँमिस स्यध कामना छय दृख नु तस कांह
 यिहोय श्री राम टूठिन प्रेमीयस व्वन्य

सहायक राम रूज़िन प्रेमीयस व्वन्य



यिथुपॉठ्य वोत

सर्वानंद प्रेमी सुंद वोनमुत कॉशरि रामायनुक
उत्तर कांड याने श्री राम सुंद वनवास फीरिथ युन अंद।



ऑटिम बोग**उत्तर रामायन / पँतिम हन रामु कथायि हुंज****व्योठ पूठ व्यसतार :**

१. सीता वनवास	१५२
२. वाल्मीक आश्रम	१५४
३. अश्वमेध जग	१५६
४. लव तु क्वश राजु दारस मंज	१५९
५. सीतायि अनान यज्ञस प्यठ	१६१
६. सीतायि हुंज दँरथी मंगुन्य जाय	१६२
७. महा प्रस्थान	१६४
८. म्यँन्य त्वता	१६५
९. समाप्ती	१६६



ऑटिम बोग

उत्तर रामायन / पँतिम हन रामु कथायि हुंज

सीता वनवास

दूहा सपद्यव दोबाह अख ओस बूज़िव
 तसंज अख वार्ता ह्यथ ध्यान रूज़िव
 तँमिस ऑस त्रुय गँमुच रातस कोतामथ
 युथुय फोल गाश वॉतिथ पेय स्व तामथ
 स्यठाह क्रूधी, अमा गव दोब तु वोनुनस
 मे वन ऑसुख चु कति दूर रँत्य रातस
 छुसा बो राम करु सीता स्वीकार
 स्व सीता ऑस य्वसु त्रॉविथ पनुन दार
 स्व रूज़ुय रामु चँद्रस दूर कति ताम
 स्व ऑस लंकायि मंज कति दूर तस राम
 यिथय पॉठचन स्यठाह अपवाद फॉल्यव
 स्यठाह शंकायि लुकु अपवाद तेल्यव
 यि बूज़िथ राम गव कूताह परेशान
 यपॉर्य किन्य राज़सी बेयि पॉर्य बलिदान
 करुन्य तस पालुना राज़स अंदर ऑस
 थवुन्य मँर्याद सतुची तस ज़बर ऑस
 अमा किथु पॉठ्य हेकिहे यूत चॉलिथ

अँछन तल कति सु हेकिहे धर्म गॉलिथ
 यिमव शंकायिवुय अपुवादवुय सुत्य
 धर्म गछि लूपसुय नेरन क्वडर कुत्य
 स्यठाह शूकस अंदर गव, गव व्यचारान
 वथा अथ राजु धर्मच रुद छारान
 कोरुन न्यश्चय मे सीता वाति त्यागुन्य
 योतुय तामथ मे सीता ऑस भागुन्य
 ओनुन लक्ष्मन वोनुन तस बाव पनुनुय
 जि सोरुय शूक तय दुख त्राव पनुनुय
 चु निन सीता तु त्रावुन गछ वनस मंज
 सखर कर व्वथ चु कर व्वन्य नेरनुक संज
 युथुय सीतायि बूज श्री रामु सुंद वाख
 अँछव लँज दार तस वॉलिंजि वँछुस श्राख
 परन पादन स्व पेयि श्री रामुसुय ताम
 स्वीकार ऑगिन्या वॅर्यथुय जपान राम
 रथस प्यठ खॉर सीता लक्ष्मनन बोज
 पतव अदु क्याह सपुद बोज ध्यान ह्यथ रोज
 वनन मंज दूर त्रॉविथ आस लक्ष्मन
 कुनी जँन्य ऑस सीता अति नु कांह जन
 च्वपॉर्य गँयि वँन्य दिवान तय खून हारान
 गँछुस कुनि जाय छपुनस द्रायि छारान



वाल्मीक आश्रम कथा

स्यठाह दूर वाल्मीकी आश्रम ओस
 ओतुय वॉतिथ स्व पेयि दॉरा हना गोस
 महर्षी वाल्मीकी ओस ज्ञानान
 छु क्याह सीतायि लेखान पानु भगवान
 रँटन सीता रँटन अति कूर जॉनिथ
 रँछिन अति ज़न पनुन शश कूर मॉनिथ
 तँमिस गर्भस अंदर संतान ओसुय
 तँमिस अथि रामु चँदरुन प्रान ओसुय
 गँछिथ कैह काल तस संतान ज़ाये
 ज़ु बालक लव तु क्वश ज़न्मस यि आये
 महर्षी ज्ञानुवाना, राजदाना
 त्रिकाल दर्शी यि र्योश बोड धर्मुवाना
 रँछिन बालक तिमन वेद्या दिचुन जान
 बडान गँय लव तु क्वश यिम राज़ संतान
 महर्षी ग्वर तिमन दून बालुकन ओस
 स्यठाह दून बालुकन हुंद राग क्याह ओस
 लक्षन दून बालुकन हुंघ क्याह पँटिथ द्राय
 दूहन मंज़ लव तु क्वश ज़न वँथिथ आय
 धनुर्वेद्या यिमन दिच़ महर्षीयन
 ब्वधी बल तय शँरीरुक बल ति हन हन
 स्वंदर वॉनी यिमन दिच़ पानु रेश्य जान

यिहुंज वॉनी करान वश पॅश्य तु इनसान
 यिमन वुछ वुछ रेशिस असि हर्ष सपदान
 कथा ओस रामु सुंज व्यस्तारु लेखान
 दूहस लेखान यि केंछा, बोजुनावान
 तु ऑस सीता ति बोजान याद थावान
 महर्षी बालकन दून ओस वखुनान
 अकी लटि बूजिथुय कंठस्त करान जान
 यिहॉय कथ रामु सुंज पॅज रामु चँद्रुन्य
 यिहॉय अज ताम जगुतस परुन्य गँजरुन्य
 यिहॉय कथ लव तु क्वश ऑस्य बोजुनावान
 स्यठाह स्वंदर तिहुंज वॉनी जबर जान
 यिहोय बोजान गछान सुय रूज्यथुय ओस
 सु वातान पर्मु धामस बूज्यथुय ओस
 स्यठाह समया यिथय पॉठ्य आव नेरान
 वनन मंज लव तु क्वश अति ऑस्य फेरान
 करान अति ऑस सीता रामु रामय
 मनस मंज ध्यान तँम्यसुंद सुबह शामय
 करान सीवा स्व वाल्मीकी रेशिस ऑस
 रछान जीवस बरान लोलाह पॅशिस ऑस
 करान सीवा स्व सार्यन अतिथीयन जान
 करान बस नम्रतायि सत्कार तय मान
 यिथय पॉठ्य द्यन गुजरान छयन नु साथा
 जपान श्री राम मनु किन्य ऑस सीता



अश्वमेध जग

समय वोत रामनुय अश्वमेध जग कोर
 युथुय ईह लूक परिलूक राजनुय सोर
 गुरा बलवान अख श्रंगार शीरिथ
 स्यठाह स्वंदर विलक्षन पॉठ्य पुरिथ
 यिहोय त्रोवुख तु द्राव गुर फ्यूर दीशव
 यपॉर्य दोरान दवान वुछ राजु रेश्यव
 अमा काँसी ति राजन कोर नु जूरथ
 च्वपॉर्य गव वाव नीरिथ गव चटान वथ
 यि बूज़िथ रामु चँदरुन गुर छु द्रामुत
 अश्वमेध गुर रट्यस कुस, कुस छु ज़ामुत
 कलस चुनि रुख सु कुस करि, कुस छु बलवान
 रँटिथ कुस राजु हेकि गुर वाव बासान
 यिथय पॉठ्य वोत गुर दीशन दिशायन
 पतव लाकन सु वोत येति र्योश यि सत ज़न
 यिथुय वोत आश्रम निश गुर यि ठँहर्योव
 अँमिस गँयि रटनि लव क्वश ब्रॉठ अख पोव
 यिमव रोट गुर तु यकबार द्रायि सीता
 वुछिथ गुर बालुकन निश आयि सीता
 स्यठाह हर्षस तु शूकस गँयि स्व यकबार
 यिमन वननस तँमिस नय ओस कैह वार

वुछुन श्री राम सुंद गुर रुत कोरुन ध्यान
 वॅरिथ थफ तस वुछिन पनुनी ज़ संतान
 व्यचारान गॅय अँदर्य अभिराम पानय
 पनुन गुर निनि यियख श्री राम पानय
 वुछान सोरुय महर्षी पानु यी ओस
 यि ज्ञानान ओस, सपदान पूर ती ओस
 स्यठाह हर्षस गछान ओस राग व्वपदान
 वुछान ऑस्य लव तु क्वश अति क्याह छु सपदान
 यपॉर्य सूज राम चँद्रन कुच सेना
 शत्रुगन द्राव ह्यथ सुत्य राज़ वारा
 वुछुख याम बालुकव गुर क्याह छु रोटमुत
 अमा गुर्य कूत मँज़िल आसि च़ोटमुत
 वुछिथ बालक यिमव असुनाह स्यठाह कोर
 पनुन मन हर्ष सुत्यन क्याह यिमव बोर
 दोपुख क्याह ख्वद्ध करुन छा बालुकन सुत्य
 अमा अदु क्याज़ि आमृत्य योर अँस्य कृत्य
 छे क्या कथ गुर निमोन अँस्य सुत्य पानस
 यिमन दून बालुकन रॉछ क्याह छे पानस
 युथुय वुछ बालुकव सेना च्ववापॉर्य
 तिमव वोन आयि असि ख्वद्ध करनुची वॉर्य
 पतव लाकन यि आरम्भ ख्वद्ध अत्यन गव
 धनुर्वेद्या वुछिथ शँथरुय पथर प्यव
 स्यठाह गॅय वीर योद्धा प्रान त्रॉविथ
 यिमव थँव्य बालुकव कम पथर पॉविथ

स्यठाह लोग घूर ख्वद्ध अंधकार व्वपुद्योव
 च्वर्पोर्य बालक नचान जयकार सपद्योव
 शॅत्र ग्वन गव पराज्यथ शूक सपद्योस
 हनूमान बेयि तॅमिस स्वग्रीव छ्यनु गोस
 हनूमान ओस कोरमुत बालुकव बंद
 तॅमिस सुत्य ओस स्वग्रीव पानु पाबंद
 वुछिथ सॉरी स्वठाह आश्वर करान ऑस्य
 यिमन दून बालुकन लोलाह बरान ऑस्य
 युथुय म्वकल्योव ख्वद्ध सीता ओतन आय
 यिमन दून बालुकन केंछा बरान माय
 वोनूख सीतायि त्रॉव्यूख पानु यलु यिम
 हनूमान बखुत्य स्वग्रीव यिम पनुन्य छिम
 गॅछिव त्रॉव्यून यलु गुर राजु पोथुरव
 छु त्वहि जयकार ऑही म्यॉन्य बॅड छव



लव तु क्वश राजु दारस मंज

अश्वमेध जग अयोध्यायि ओस जॉरी
 नेमंत्रन सारिनय अति राजु सॉरी
 महर्षी वाल्मीकी ताम ओत आव
 स्यठाह अति रामु चंद्रन होवुनस भाव
 महारेश्य लव तु क्वश अँन्य सुत्य पानस
 तु पानस सुत्य चॉनिन राजु थानस
 युथुय यिम राजु दरबारस अंदर चाय
 तु दूश्वय बाल रामायन ग्यवान आय
 स्वंदर वॉनी लुकव बूज आयि दोरान
 चॉसिथ आय नगर वॉसी, आयि लारान
 युथुय बूजख कथा दूख लद छँटख बाख
 वनन मंज वार्ता त्रुयि हुंज गँयख चाख
 नेबुर्य लूकन अँशिस लँज दार यकबार
 दपान ऑस्य कूत न्यर्दय गव यि संसार
 युथुय बूज्य राजु रामन पानु व्यदाख
 तँमिस गँयि बूज्य बूज्य हृदयस अँदुर्य चाख
 अंदर बालख अँनिख श्री राम व्वशुल्योव
 वुछिन याम लव तु क्वश इंद्राजु तंबुल्योव
 पृछुख राजन वँनिव तोह्य कुहुंघ संतान
 यि रामायन छु वँम्य त्वहि बोवमुत जान
 छु महर्षी वाल्मीकी सोन गुरुदीव

छि शेश्य तँम्यसुंद्य करान आमुत्य तँमिस सीव
 तँमी वँरमुच यि रचना वारु बूजिव
 कथा श्री रामु सुंज व्यस्तारु बूजिव
 छि त्रय पनुन्य खसु त्याग वँरमुच
 तँमिस रेश्य कोरि ग्रँज छन माय बँरमुच
 छि संतान अँस्य तँमिस सीतायि हुंद्य बोज
 अन्याय कोरमुत छु राजन सावदान रोज
 युथुय बूज वार्ता रामन सँनिथ गोस
 तँमिस ओश वोथ दशा अँदुरिम खटन ओस
 कथा बूज राजनुय वेश्वास सपद्योस
 मनस मंज राग तय अबिलाश व्वपद्योस
 यि ज़ोनून पूर पॉठ्यन लव तु क्वश जान
 छि पँज्य पॉठ्य यिम ज़ु बालक म्यॉन्य संतान
 बिहिथ निशि रामु चँद्रस वाल्मीक ओस
 तँमिस कुन फ्यूर श्री राम यी वनान गोस



सीतायि अनान यज्ञस प्यठ

छि योदुवय म्यॉन्य सीता पापु रोस त्रुय
 अँन्यून यूर्य तोह्य स्वीकार अदु करन बुय
 छि य्वद न्यष्पाप सीता पान हॉविन
 येत्यन यज्ञस प्यठुय प्रमान हॉविन
 तथा अस्तु वोनुस रेश्य सानि राज़ा
 पगाह योत सिर्यि खसुनय वाति सीता
 रेशी तप्सी मुनी सॉरी पगाह आय
 नगर वॉसी चँसिथ पनुन्यव गरव द्राय
 तु दीशव बेयि दिशायव राज़ु सॉरी
 यिमय वॉत्य राज़ु दरबारस च्वपॉरी
 स्यठाह अबिलाश ओसुख मेलि दर्शुन
 करव सीतायि सॉरी पोशि वर्शुन
 प्रज़ा सॉरुय मुनीश्वर बेयि तपेश्वर
 वुछान प्रारान स्व सीता वाति योत कर
 स्व अकि पॉर्य आयि सीता वारु वारय
 पकान पतु पतु महर्षी यस दुबारय
 स्व सीता ऑस न्यरमल ऑस कोमल
 व्वदॉस्य सीता वुछान ब्वन कुन स्व न्यरमल



सीतायि हुंद दॅरथी मंगुन्य जाय

युथुय वॉच यॅङ्ग मंडुपस निश स्व रॉनी
 गॅडिथ गुल्य आयि ब्रॉह कुन ज़न अज़ॉनी
 दिचुन क्रख म्यानि दॅरथी मॉज बोजुम
 छसय न्यष्पाप सॉखी पानु रोजुम
 ब्रु य्वद न्यरमल तु न्यष्पाप छेस रछुम लाज
 रटुम मॉजी मे ख्वनि मंज़ सुय मे बोड बाज
 युथुय क्रख गॅयि तु दॅरथी फॅट गॅयस चाख
 ब्रंज़िस मंज़ क्याह सपुद प्रखट्योव तसुंद वाख
 स्यठाह स्वंदर जॅरी जालारु पुरिथ
 सिंघासन द्राव अति प्रज़लान शीरिथ
 अॅथ्य अंदर गुल्य गॅडिथ न्यष्पाप त्रय च़ाय
 अॅकिस क्षन मात्रस सीतायि रॅट जाय
 सिंघासन द्राव सीता ह्यथ तु गव क्रम
 त्युथुय दॅरथी ति वटुनय आयि यकदम
 वुछान ऑस्य लूख सीता कोत अमा गॅय
 यपॉर्य ओस पोशि वरुन तय यपॉर्य जय
 स्यठाह क्रकु नाद वोथ हुय वोथ च़ववापॉर्य
 अॅशिस लॅज दार सार्यन ज़न रॅहिथ सॉर्य
 रेशव मुनियव कोरुस जयकार सीते
 च़े जय जयकार बारंबार सीते
 दवान गॅय लव तु क्वश सीतायि छांडान

दपान कोत गॅयि अमा मॉज आयि लारान
वुछिथ श्री राम अँदुरी गव व्यचारान
भरत लक्ष्मन शत्रुगन ऑस्य हॉरान
पतीवृता स्व सीता द्रायि न्यष्पाप
अँदुर्य श्री राम चँद्रस रूद संताप
यि गव पथ कुन ति गव अख क्रम पकान रूद
स्यठाह समयस यि राम राजुत करान रूद
प्रजा स्वखु सान तु श्री राम राजु सत ज़न
यि रामुन राज अज़ ताम नोन छु हन हन



महा प्रस्थान

दृहा सपद्यव तु राजस वोथ व्यचारा
 छु व्वन्य नेरुन तु गछुनस केह नु चारा
 अँनिन मंत्री तिमन अभिप्राय बोवुन
 लवस तय क्वशस अधिकार सोपुन
 यि बूजिथ नगँर वॉसी आयि लारान
 चटान वछ तिम अँछव किन्य खून हारान
 महा प्रस्थान श्री राम द्राव करुने
 नगँर वॉसी तँमिस जयकार करुने
 गँडिथ गुल्य सारिवुय वँन्यहस कुनी कथ
 यपॉर्य नीरिव तु सॉरी स्वय रटव वथ
 नियिव असि पानुसुय सुत्य सानि भगवन
 वँरिव असि मूक्ष पानय पानु सत ज़न
 दोयिम दृह ओस नदि प्यठ द्रायि सॉरी
 पतय श्री रामुसुय सुत्य आयि सॉरी
 कोरुख सँर्यो नदी प्यठ श्रान ध्याना
 कोरुख मंथुर व्वचारन, रुत समाना
 त्युथुय आकाशि वँथ्य दिवता व्यमान ह्यथ
 खँसिथ गँय सॉर्य आकाशस यिमन क्यथ
 त्युथुय सपद्यव आकाशि पोशु वर्शुन
 यिहोय ओस वैक्वठस श्री रामु दर्शुन



म्याँन्य त्वता

खगन हुंघ खग गौंमुत्य श्री राम औतार
प्रनाम सोनुय तँमिस बारंबार जयकार
सु मॅर्यादा छु प्वरषोत्तम श्री राम
सु पॅज्यपौठ्य कलि खगस मंज परम धाम
सु रक्षाकार पालनहार सोनुय
बु प्रेमी तस शरन भवु तार सोनुय
तँमिस सोरुय पनुन पुशरोवमुत छुम
तँमिस पादन पनुन पान त्रोवमुत छुम
तँमिस पूर कामना म्याँनी करुन्य छय
कथा लीखिथ तसुंज प्रेमी करान जय



समाप्ती

छु अज़ कलि खग च़्चपॉर्य अंधकार अंधकार
 अँथ्य अंदर प्रेमीयुन धरमुक यि व्यवहार
 रोटुन श्री राम सुंद अख नाव हृदयस
 थोवुन तँम्यसुंदि सतुक अख भाव हृदयस
 स्यठाह सुय दुख तु संकट खद तुलान आव
 लुकव बोर लोल तस पनुन्यव कोरुस नाव
 पकान गव ब्रॉठ कुन दयि नाव ह्यथ ओस
 अमा पँज्य पॉठ्य तस श्री राम टोठ्योस
 करान अस्त्वथ दयस पदि पदि बु प्रेमी
 लबान अनुग्रह तसुंद वति वति बु प्रेमी
 छु सम्वत सतु रेशन हुंद काश्मीरस
 छु पाँचन सासुनुय शैयितॉज स्वमीरस
 छु र्यथ पोह, दय छि त्यथ गट पछ र्यतस थव
 तु सम्पूरन यि रामायन ज़बर गव
 व्ममा छम टॉठ तस अज़ माजि हुंद श्राध
 स्व छम त्रय सुत्य सुत्य दय गालि अपराध
 करान श्री रामसुय दुश्चय छि ज़ॉरी
 च़ु कास असि व्याध तय अपराध सॉरी
 च़ु कर रक्षा च़ु रक्षाकार सोनुय
 थवुन स्वख़ सान रछुन परिवार सोनुय
 छु प्रेमी गुल्य गँडिथ संतन तु सादन

श्रधावानन तु भक्त्यन लोलु पादन
 कृपा तिहुंजे, दया तिहुंजे छु बोड राश
 छि ह्यथ जगुतस अंदर तिहुंजुय सतुच आश
 भरत देशस दूहय पोज़ गाश आसुन
 सँतीसर काश्मीर प्रागाश आसुन
 रंगारंग अंग यिमय प्रज़लान रूज़िन
 पज़िच शेछ जगतसुय बावान रूज़िन
 यिहॉय ऑही यि आशीर्वाद म्योनुय
 वेंगरिन श्री राम अथु रोट पानु सोनुय
 तँमिस चरुनन यि जय जयकार ऑसिन
 तँमिस प्रनाम यि बारंबार ऑसिन



यिथुपाँठ्य वोट
 सर्वानंद प्रेमी सुंद वोनमुत काँशरि रामायनुक
 उत्तर कांड रामायन याने राम कथायि हुंज
 पँतिम हन लँड अंद।

